

## **Árúka Ebeq sáhnsahwe ahtebé ehwehne.**

Árúkawe íre Asiu anínéna we nahnsó aní míowe. Wega téh sóteh arámbéhríéna anehe Pora kérena séhréh atowe. Árúkaga Sísane arambehri wene auranka íre tagéna peh Sísá tago keyábé kasenína kawerue ahtebéna mah pukú sehiranúwe. Nahnsó kegá mah pukú sáhnsahwe Sísane ehweh kawerue siahtebéra wensabé aiq pútare atageheéna sehiranúwe. Anehe Árúkaga Eqmaro Kene ehweh pukú sehiranúwe.

### **Árúkaga mah kawéq éhwéh sehiranúwe.**

*Árúkaga Tíópírása ebeq sehiranú ehwehne.*

<sup>1</sup> Tíópírása anotah wahnáh ánino, ite míaraunarabeq áhnte kegá Manikánka miraurai naneqsabé iwíáhéra sehiranurowe. <sup>2</sup> Sehiranuro kegá Manikáne ehweh teri terinera wega miraurai naneq tagaro kené ehweh irera teniátówe. <sup>3</sup> Téhwe tago kereq sehiranuro kereqsabé kasenína sene ehweh iwíáhue tagaraugé. Anehe ínégá moq mi ehwéhnsabé tábúsoqme sehiranéna areba eqmarahnah sáhnsahinkéhe. Tíópírása kawéq anino, <sup>4</sup> arega aiq pútaq ehwéh irankeheéna sehiranue teawúge.

*Íópeqté ánínká Sóni éhweh pahsuo ehwéhne.*

<sup>5</sup> Súría marákórápéq wahnahnú aní Érótiga wahnahnútaq Manikáne ehweh mibeq mahbeq aritéh aní wenáwíq Sékáráía ména we Ábíya kahnáh mibeq mahbeq arito ani míowe. Wene ahre Áróni kahnáh íní ména wenáwíqmé Érisábétie. <sup>6</sup> Mi akéqká kaweqtaq méra Manikánka sehgióro ú ehwehnikákáq wene sánsánkákáq moke tábúsoqme sehgiúye. <sup>7</sup> Se orení ákéq méra Érisábéti orahini puara se íre aninkákáq míoye.

<sup>8</sup> We kahnáhnká arambehriutaq Sékáráíaga Manikáne ehweh mibeq mahbeq arito ani ména arambehriúwe. <sup>9</sup> We kahnáhnká sene sánsánéra Manikánsabe iwíáh iwíáh atáh náhtápéq kaweq kunkúni naneq pariankeheéra Sékáráía eqmarówe. <sup>10</sup> Pare tanahráq áhnte kegá máhpeq méra púreruwana Sékáráíaga webataq nahupeq kibekéna mi kawéq kunkúni naneq tahberapeq pariowe. <sup>11</sup> Pariowana Maniká míéhrabeq íópeqté ánínká ábóraragéna tahbe ayehrápéq iriwe míowana <sup>12</sup> Sékáráíaga we tagéna kurináhnéna iwíáh kikiréna áhreúwe. <sup>13</sup> Áhreúwana íópeqté ánínká wensabé, Sékáráíao, íre áhreúno. Manikánka arega púreróna ehwéhmé aiq íréhnsábé arene ahre Érisábétiga animai maqmiankéhe. Maqmiahnaraq arenahninsábé Sónie ue áwírato. <sup>14</sup> Maqmiahnaraqmé arene arupipeq eyoyóue iwíáh iwíáhinkehe. Áhnte mó kegá moq iwíáh iwíáhigehe úwe. <sup>15</sup> Iwíáh iwíáhigehe éna, Maniká itene Wahnahnka wensabé, Are anotah aní míahno atanawire. Ahriahri we náhniáq sera anonkakaq píahakáq awehriinkehe. Wenanone arupipeq míahnaraq ahriahri Manikáne Awanka

wereq mía míainkehe. <sup>16</sup> Wereq mía míairana wega Manikáne ehweh teri terinínaraq áhnte Ísara kegá Maniká itene Wahnahne sánsá kawerue sehgiéhe. <sup>17</sup> Éráísa Manikáne ehweh irarú ani marakóipeq míotaq anotah aní ména págegeue síwáhnorúnserah itene Wahnahka sinaitaq arenahninká ebeq séna síwáhnorinkehe. Minayabe sibowárehreq sene animárínseq insahwé aritankéhe. Itene Wahnah sína tanáhráq áwénunighboq ahababáq kega arenahniné ehweh irera sene ahababáq suera kaweqtaq míagehe teawuwe.

*Íopeqté ániné ehwehnsabé íre aiq pútare ató ehwehne.*

<sup>18</sup> Íopeqté áninká mi ehwéh Sékáráíá teawuwana Sékáráíaga wensabé, Íné ore úkugana néne ahre moq orení míehre. Minayabe arega iraréna ehwéhmé árahue aiq pútaraginabo úwe.

<sup>19</sup> Úwana íopeqté áninká wensabé, Néníwíq Kébárie. Íné Manikáne auranabiahtapeq iriwe mía míau aní múge. Mah kawéq éhwéh teawinkeheéna wega, Koreawo éna eqmaq núwéhre éna, <sup>20</sup> Írátiahno. Arewe néne ehweh íre aiq pútare aintahne. Minayabe mókake are ehweh íre irarerahóne. Ínéga teawú éhwéh aiq pútaragínaraq arega ehweh irarerahóne úwe.

<sup>21</sup> Máhpeq míó kega Sékáráíá áwénunéra iwíáhéra, We aneqsabé íre wahto tanáhráq Manikánsabe iwíáh iwíáh atáh náhúpéq peh míehro uwe. <sup>22</sup> Uwana wega tueyokútaq we ehweh íre irarerahúwe. Ehweh íre irarerahéna wene ayahnkaratáté áwíqme teriena ehwehnurá íre

irarerahúwe. Máhpeq mío kega mirau tagéra, Manikánsabe iwíáh iwíáh atáh náhúpeq miéhtáq wenawanka tagehre íwíáhuwe. <sup>23</sup> Iwíáhuwana we ehweh íre irarerahéna wene arambehri tanáhráq parabagútaq wene nahtapeq pokúwe.

<sup>24</sup> Mi tanáhráq parabagúwana wene ahre Érisábéti kía ména moberíáh ío wene nahtapeq peh míowe. <sup>25</sup> Mitaq ména mahraréna, Íné orahini míarautaq áhnte niyehitaraire. Manikánka ínénsabe arutaboiraíntena séhréh aintárái puana amahnága íné íre niyehitehre úwe.

*Íopeqté ánínká Máhriánsabé, Sísá maqmarankéhe ú ehwehne.*

<sup>26</sup> Érisábéti abapete morá ío kía míowana Manikánka íopeqté ání wenáwíq Kébári Kehrari marákórápéq Néhsara suwahpeq eqmarowe. <sup>27</sup> Eqmarowana wega Máhria Néhsara suwahpeqte áhráribá tuwe. Máhriawe mó weh mahbíreq íre nogu ahrárá wíre. Tébiti kahnáh máhbi wenáwíq Sósépa míowana Máhriaga we kéranaútaq Kébáriga weba tuwe. <sup>28</sup> Webá tuena wensabé, Aiq míahno éna Maniká itene Wahnahnka arensabé anotahtaq arutaboiratena arereq miéhre úwe. <sup>29</sup> Úwana Máhriaga mi ehwéh iwíáhue tagéna wewe náhenéna, Aneq ehwéhpómo. Íre niahteboge éna iwíáh kikirúwe.

<sup>30</sup> Iwíáh kikirúwana íopeqté ánínká wensabé, Máhriáo, íre áhreúno. Manikánka arensabé anotah arútábóiratéhre. <sup>31</sup> Minayabe are kía míaniewóne. Are kía mé animai maqmíéhnaaq Sísae ue áwírato. <sup>32</sup> We anotah aní míahnara áhnte kegá wensabé, Maniká Iteribone ahninkáwá wíre ataneherawoe.

Maniká itene Wahnahnka wensabé, Tébiti arene aigaqnaga Ísara ke wahnahnúnserah arega moq se wahnahniniewóne atankéhe. <sup>33</sup> We Sékópa kahnáh ánímárí ahriahri wahnahnaritena wene wahnahné tanáhráq íre parabaginawire úwe.

<sup>34</sup> Íópeqté ánínká teawuwana Máhríaga wensabé, Íné íre wehreq nogú ání púana árahue kía míaninkono úwe.

<sup>35</sup> Úwana íópeqté ánínká wensabé, Manikáne Awanka areba tuena nonahwega marakó akariuríéhnserah areba moq akariuriankehe. Manikánka págege atena kawerue auráq matiankehe. Minayabe mó kegá arega maqmíéhna anínsábé, Kaweqtaq mía míai aní mire éra we Manikáne ahninkáwá wíre ataneherawoe úwe. <sup>36</sup> Íópeqté ánínká mó mahraréna, Mó kegá arenawahrah iní wenáwíq Érisábétinsabé, Orahinine atárówana we orenínéna amahnága kía míéhre. We abapete morá íó kía ména animai maqmiankéhe. <sup>37</sup> Manikánka moke miraorahi mino úwe.

<sup>38</sup> Úwana Máhríaga wensabé, Íné Manikáne arambehriu ahráríúge. Arega aiq irarénanserah Manikánka mirainkehe úwana íópeqté ánínká we auwena pokúwe.

*Máhríaga Érisábéti koragó ehwehne.*

<sup>39</sup> Mi tanáhráq Máhríaga Érisábéti koraganieéna apubúue sokahuena pokue Súría marákórápéq áhnte sawéh korabeq kiuwe. <sup>40</sup> Kiena Sékáráíane nahupeq kibekéna Érisábéti mehweh atowe. <sup>41</sup> Mehweh atowana irotaq wene arupipeq

mío anínká anotah kabau kabauúwe. Kabau kabauúwana Manikáne Awanka Érisábétiba séna iwíáh atowe.

<sup>42</sup> Iwíáh atowana Érisábétiga anotahtaq mahraréna, Máhríao, Manikánka mó inínsónsábé arutaboíréna peh arerensabé anotahtaq arutaboíratéhre. Manikánka arega maqmíéhna anínsábé anotahtaq arutaboíratéhre. <sup>43</sup> Íné pehgáriq iní múge. Néne Wahnahne anowagá aneqsábé ínéba seno? <sup>44</sup> Írátíahno. Amahnága arene ehweh írótaq ínéga maqmíáhna aniné arupipeq eyoyói puana nirupipeq kabau kabauire. <sup>45</sup> Arega Manikánka eqmatai aniné ehwehnsabé aiq pútaraginawire iwíáhurónayabé Manikánka arensabé, Kaweróne atéhre úwe.

*Máhríaga igonkónú ehwehne.*

<sup>46</sup> Máhríaga mahraréna, Néniwanka itene Wahnahnsabé iwíáh iwíáh atéhre. <sup>47</sup> Manikánka íné kaweraintéh ánínsábé iwíáh iwíáh atóge. <sup>48</sup> Ínéwé pehgáriq inínéna Manikáne arambehriu iní míóganawe wega íné tagéna ínénsabe arutaboíraintéhre. Mókake ómi kehinánká ínénsabe iraréra, Manikánka ínénsabe anotahtaq arutaboíratéhre igehe. <sup>49</sup> Maniká peh anotah pagégé ánínéna íné áhnte séhréh aintáráirara sega mirarue irarigehe. Manikámé anotah kawéq áwíqkakaq aní míéhre. <sup>50</sup> Manikánka mó tanáhráq mó tanáhrárue ahriahri wensabé áhteno keyábé arutaboírarítéhre. <sup>51</sup> Wewene ayahtate págege sansánue sokigi aíre. Mó kegá, Itewe anotah anímári múne

íwíáhéra píribahriowana Manikánka mi ke kaqsúéhrara kobeq séberagowe. <sup>52</sup> Wega anotah wahnáh ánímáí wahnahnorabeqte kaqsuena pehrápeqte ánímáínsábé wahnahnoro arítéhre. <sup>53</sup> Wega sirupibii ke kaweq naneqmarí náriena áhnte kéh ké íre náriasa pehipi kaqsúéhre. <sup>54-55</sup> Manikánka Ébáráhmareq wene anahwareq itene igaqnaréhreqsabé, Ahriahri nírutaboíraitanauge ire. Wega mi ehwéh ahreraq matawéna wene arambehri anímáí Ísara keyábé arutaboíraritena séhréh arítéhre úwe.

<sup>56</sup> Máhríaga mi ehwéh iraréna apahtáro íótáq kaegaeéna Érisábétine nah suena wene nahtapeq pokúwe.

*Sóni maqmaro ehwéhne.*

<sup>57</sup> Wene maqmare tanáhráq sútaq Érisábétiga animai maqmarowe. <sup>58</sup> Manikánka wensabé anotahtaq arutaboíratéhre éhwéhnuwara wene iyahnaboreq wenawahraheqka irera wereq moráraq íwíáh íwíáhuwe.

<sup>59</sup> Iwíáh íwíáhéra mi aní abapete apahtáro wéhékáh míotaq sega wene áú amurúruanehéera séra mahraréra, Wenabo áwíq Sékáráíá wire. Mah karíq ánínsábé moq abowá áwíq Sékáráíáe atanéhe uwana <sup>60</sup> wenanoga, Ahqáho aritena, Sónie ue áwíratayehetauye úwe. <sup>61</sup> Úwara sega wensabé, Mi awíqmé íre arenawahrah síwíq míre éra <sup>62</sup> wenabonsabé siyahnkaratáté áwíqme kasená, Arenahnínsábé arega inse ataníbo uwe. <sup>63</sup> Uwana Sékáráíaga ayahnkaratáté awirena, Pépahq menio

úwara pépahq áwúwana wega sehiranéna, Wenáwíq Sónie ue sehiranúwara áhtenuwe. <sup>64</sup> Áhtenuwana Sékaráiane áwéh kaweragúwana wega apubúue irarerahéna Manikánsabe pahsuqme iwíáh iwíáh atowe.

<sup>65</sup> Mibeqté kégá mi otáq sánsá tagéra áhre aguwara Súría marákórápéqté kégá sáwéhrapeqté mitaq teri mahtaq terinuwara moke írówe. <sup>66</sup> Mi ehwéh író kega sirupipeq iwíáhue tagéra, Mah aní mókake aneq mirainkehbo éra Manikánka we págegeue séhréh atanawire iwíáhuwe.

*Sékaráíaga irarú ehwehne.*

<sup>67</sup> Manikáne Awanka mi aniné abowá Sékaráíaba sure iwíáh atowana wega kahna naneqsabé mahraréna, <sup>68</sup> Maniká itene Wahnahnka Ísara ke meirena kaweraitanieéna si puaq iwíáh iwíáh atone. <sup>69</sup> Wega anotah aní ite kaweraitahna aní omaq atéhre. Mi anímé Tébiti kahnáh ánine. <sup>70</sup> Minayabe Manikánka wene ehweh iraru ke naho iwíáh aritowara teiúwe. <sup>71</sup> Itensabé iuwahrieh ke itene naruoga ite saiqnaríahnsábé sega iubíyehoéna wega meirena kaweraitankéhe. <sup>72</sup> Manikánka omasa éhwéh aiq ahreraq matawéna itene igaqnaréhyabe arutaboiraritena séhréh aritowe. <sup>73</sup> Wega itene igaqna Ébárahma mirainauge ú ehweh teawena, <sup>74</sup> Itene naruoga saiqnaríáhtáq koweiraníe úwe. Minayabe íre áhreia peh wene arambehri miraonehqmúne. <sup>75</sup> Moke itene ogamé tanahráq Maniká awahbeh sansánéq kaweqtaq méq wene arambehri tábúsoqme miraoneheqmúne úwe.

<sup>76</sup> Manikáne Awanka mó iwíáhatowana Sékaráíaga wenahni Sóninsabé mahraréna,



Nénahnino, mó kegá arensabé, Maniká itene kiotaiqme Wahnáhné ehweh iraréna aní móne ataneherawoe. Itene Wahnahne ah kawerarankéhboq arega ebeq pokinkehe. <sup>77</sup> Manikánsabe áwíahraqso ke oganúq sitankéhboq se merirena sene ahbabáqsabe kaweraritankéhe ue terinkéhe. <sup>78</sup> Manikámé áhnte arútábóiraitéh aní mía míaire. Pópoqnahga áhníbórá kiembogina inserah Manikánka ite áhníbórá kaweraitanaire. <sup>79</sup> Sunkíkírirabeq pukoraho ke tagagehboq Manikánka ahtapeq téhraitankéhe. Minayabe wega iahnkahrínaq ite iru ukiq ítéh áhtápéq nogoráhúne úwe.

<sup>80</sup> Manikáne Awanka iwíáh atowana Sékarááaga mi ehwéh wenahni Sóni teawuwe. Mi aní anonurena Maniká awahbeh sansánsabé arutaboirána sehgiuwe. Wegá Ísara ke ehweh terie tanáhráq íre suriotaq peh abatapi úpeq kaegaeúwe.

## 2

*Máhríaga Sísa maqmaro ehwéhne.  
(Mátíyu 1.18-25)*

<sup>1</sup> Mi tanáhráq anotah wahnáh aní wenáwíqtare Sísáhri Ógáhsátu moke Aroma keráq wahnahna-tiowe. Wegá moke wehuke síwíqmari púkuipéq sehiranoro aritowe. <sup>2</sup> Mi tanáhráqmé Aroma kegá ebeq síwíq sehiranu tanáhráre. Wehukení wenáwíq Kúwíríníáhsi Síría marákórápéqté kéné wahnah míotaq sehiranue meyowe. <sup>3</sup> Aroma wahnáh kegá moke síwíqmari meyanehéera ómiga sensuwahpeq pokuwe.

<sup>4</sup> Sósépawe Tébiti kahnáh aní ména Néhsara suwahpeq Kehrari marákórápéq suena Súría

marákórápéq Pétáriéma suwahpeq Tébiti kahnáh suwahpeq kíuwe. <sup>5</sup> Sensíwíq terieyeheéra Sósépareq wene ahre ararí Máhriareq Néhsara suwahpeq kíúye. Máhriawe anotah kia míowe. <sup>6</sup> Segá Néhsara suwahpeq kíúyataq we ani maqme tanahráq wahtonúwe. <sup>7</sup> Páhsintía nahmáris máhriq íre ko púara sega káhone nahtapeq káúye. Mitaq Máhriaga wene ebeq piah anímái maqmarena ambanta ánáhnkiwe mi kané táhutahuq kunúbáipéq suge atowe.

*Íopeqté ánínká sipisípiq wahnahnu ke teriu ehwéhne.*

<sup>8</sup> Mi ke suwahpeqte áhnánsáhrápéq sipisípiq wahnáh anímáris uworapeq méra sene kamarítáq wahnahnuwe. <sup>9</sup> Wahnahnuwana íopeqté ánínká ábóraragúwana Maniká itene Wahnahne téhreh naneqka anotahtaq téhrówara sega anotah ahré aguwe. <sup>10</sup> Íopeqté ánínká sensabé, Íre áhreoro. Írátíáhro. Mah kawéq éhwéh teinieéna suge. Teiú éhwéhnká ómi kehináné sirupipeq anotahtaq eyoyó aritankéhe. <sup>11</sup> Tébiti kahnáh suwahpeq ite meirena kaweraitahna aní inokáhpeq maqmíéhre. Manikánka we omaq atowana we anotah Wahnáh aní ména ite meirena kaweraitahna aní míre. <sup>12</sup> Aniné ambanta ánáhnkiwe káhone táhutahuq kunúbáipéq míéhre tagéq we wire ue ahtebagehe úwe.

<sup>13</sup> Úwara peh íregáritaq íopeqté kégá ábóraragéra Manikánsabe iwíáh iwíáh atera mahraréra, <sup>14</sup> Maniká kiotaigme aníniraq wensabé iwíáh iwíáh atone. Mah marákó marákóipéq Maniká awahbeh sansá sehgíra ke siru ukiqsitankéhe uwe.

*Sipisípiqtaq wahnahnu kegá Sísa korago ehwéhne.*

<sup>15</sup> Íópeqté kegá se suera íópipeq tuekutaq sipisípiqtaq wahnahnu kegá seye náhenéra, Manikánka teí ánínsábé Pétáriéma suwahpeq koraganehboq pokonehe uwe. <sup>16</sup> Pokonehe éra pehbeheráh pokue anebahruwana mi aní káhone táhutahuq kunúbáípeq sugowara Máhriareq Sósépareq míóya tagowe. <sup>17</sup> Tagéra pokue íópeqté áníné ehweh mitaq teri mahtaq terinuwe. <sup>18</sup> Terinuwara író kegá sipisípiq wahnáhmáriné ehwehnsabé iwíáhue tagéra, Aneq ehwéhpómo iwíáhéra áhtenuwe. <sup>19</sup> Máhriaga moke mi ehwéh ahrreraq matawéna wene arupipeq iwíáh atawéna tagowe. <sup>20</sup> Sipisípiq wahnáh kegá kouwekéra sega író ehwéhnkákákq tago naneqsabéákákq Manikánsabe iwíáh iwíáh atówe. Iwíáh iwíáh atera, Íópeqté ánínká teínserah aiq pútaragire uwe.

*Sega Sísaie ue áwírató ehwehne.*

<sup>21</sup> Máhria íre kía míotaq íópeqté ánínká wensabé, Are ani maqmíéhnaaq Sísaie ue áwírató úwe. Minayabe mi aní maqmarowara abapete apahtáro wéhékáh míotaq sega wene áú amurúruera Sísaie ue áwíratówe.

*Símióniga Sísa tagéna pahsuo ehwéhne.*

<sup>22</sup> Mósísiga sehgióro ú ehwehnká irarinserah sene wánítapeq mósosue tanahráq parabagútaq Sósépareq Máhriareqka Sísa Sarúsarama suwahpeq meqmera Manikánsabe, Arene ani míankehe uye. <sup>23</sup> Minayabe itene Wahnahne ehwehnsa mahraréna, Itene ebeq piah anímáigáú ómi meriqme Maniká ménáwéro ire. *(Wok Pris 12.1-8)*

24 Itene Wahnahne ehwehnka mó mahraréna, Téhtaré kibókíraré náwétao. Kiboki írakaunínaraq téhtaré píná áráhqtaré náwétao ire. (*Wok Pris 12.8*)

Sega mi ehwéh sehgioyeheéra Sísá meqmera kíúye.

25 Sarúsarama suwahpeqte kóré wenáwíq Símiónie. Wega Maniká awahbeh sansánsábé arutaboirána kaweqtaq mía míaéna Ísara ke kawerarite tanáhráqsábé áwénunúwe. Áwénunúwana Manikáne Awanka wereq mía míaéna 26 ehweh teawena, Arewe pehipi íre pukiniewóne. Írakaumo. Ebeqme ite meirena kaweraitankeheéna itene Wahnahka omaq ato aní tagé anehe pukinkehe úwe.

27 Manikáne Awanka mi koré iwíáh atowana wega Manikánsabe iwíáh iwíáh atáh náhúpéq kibekúwara Sísane anoibo akéqká Mósísiga sehgióro ú ehweh sehgioyeheéra Sísá meqmera mitaq kíúye. 28 Kíúyana Símióniga tagéna Sísá sawiwena Manikánsabe iwíáh iwíáh atena mahraréna, 29-30 Néne Wahnahno, arene arambehri aní míóge. Arega eqmarahna anímé ite meirena kawaraitahna anímé néne niuranka amahnága aiq tagoge. Minayabe arega aiq teniátóna ehwéh aiq pútaraginkehboq niru ukiq intehnana pukono.

31 Ómi kehiná míáhrabeq arega kaweraitahna aní eqmarahne. 32 Wega téhrehnka inserahnínaraq nahnsonka kaweq ah tagagehe. We míéhnsábé Ísara ke arenawahraha iwíáh iwíáhigehe úwe.

33 Símióniga Sísá éhweh mahrarúwara Sísane anoibo akéqká mi ehwéhnsábé áhtenéra áhnte iwíáhuye. 34 Iwíáhuyana Símióniga sensabé,

Pehwehrue miáhtao éna wenano Máhríansabé mahraréna, Mah anínká áhnte Isará ké séhréh aitankeheéna Manikánka we omaq atéhre. Séhréh aitanharaq mó kegá we sinehepeq suehrara mó kegá wensabé aiq pútare atagéhe. Wega Manikáne sansá sokigi ínaraq áhnte tagehra kegá wensabé éhruru atehrana <sup>35</sup> sirupipeqté áhbábáq ábóraq aginawire. Minayabe sogiqka agaréq áwítáq anotah erinserah arene arupipeq anotah eragínah pukorahuge íwíáhiniewóne úwe.

*Áhna korenínká miraúnsabe ehwéhne.*

<sup>36</sup> Manikáne ehweh irarú iní wenáwíq Áhna mitaq míowe. We Pánúérine ayahunkawa ména Áséra kahnáh iní ména naho kóréní míowe. We wehkútaq abapete téhtaré ópéq wenawehqseq míowana <sup>37</sup> wenawehq pukúwana íregáritaq ópéq peh kéweiní ména we 84 ópéq míowe. Wega Manikánsabe iwíáh iwíáh atáh náhúpéq íre suena peh mitaq mía míaéna Manikánsabe iwíáh iwíáh atotaq wega táhutahuq awehriéna púreq aruqarurúwe. Wega mitaq wéhékáhnkakaq inokáhpeqkákáq Manikánsabe iwíáh iwíáh atowe. <sup>38</sup> Mi tanáhráq wega Sísa tagéna Manikánsabe iwíáh iwíáh atena Sarúsarama suwahpeqte ké merirena kaweraritahna anínsábé áwénunu ke Sísa éhweh teriuwe.

*Sósépa akéqká Sísa meqmera Néhsara suwahpeq kouwekuya ehwéhne.*

<sup>39</sup> Wenanoibo akéqká moke Mósísine ehweh sehgiara mitaq suera sensuwahpeq Kehrari marákórápéq Néhsara suwahpeq kouwekuye. <sup>40</sup> Kouwekuyana mitaq Sísa anonurena págege

ahtébiá ání úkúwana Manikánka wensabé arutaboíréna séhréh ata ataúwe.

*Sísaga Manikánsabe iwíáh iwíáh atáh náhúpéq kibekú ehwehne.*

<sup>41</sup> Sísane anoibo akéqká mó opéq mó opérué sótaikú siahreraq ko tánáhráq Sarúsarama suwahpeq táhutahuroyeheéra poku pokuye.

<sup>42</sup> Sísá anotah anímái úkútaq airápété téhtaré opéq míotaq wereq wenanoibo akéqseqka Sarúsarama suwahpeq pokuwe. Segá Asiu kené sánsá sehgoneheéra pokuwe. <sup>43</sup> Táhutahuq

tanahráq parabagúwara mi akéqká mitaq suera sensuwahpeq kouwekuyana Sísaga Sarúsarama suwahpeq kowíowara wenanoibo akéqká minayabe íre íróye. Segá íre irera, We itene iyahnabo anímárinseq nogíre iwíáhéra peh morá wéhékáh nogúye. <sup>44</sup> Wega seba íre súwara wensabé anebahréra sensuwahraheq sene iyahnabo anímárinseqsabé, Sísá tagaho ue kasenuye.

<sup>45</sup> Anebahruyana we íre ábóraq míonsabe sega Sarúsarama suwahpeq anebahroyeheéra kiwekuye. <sup>46</sup> Segá anebahréra téhtaré wéhékáh íre

ábóraqmarera apahtáróráq Manikánsabe iwíáh iwíáh atáh náhúpéq anebahréra Sísá mitaq tagoye. Tagoyana Sísaga íwáhnoru kené ehweh iranieéna sereq tútuue ména wega iwíáhu ehweh kasenúwe. <sup>47</sup> Kasenúwana moke wene ehweh író kega iwíáhéra, Mah anímé áhnte ahtébiá áníne.

Wega peh ahtebia éhwéh pahsúéhre iwíáhuwara <sup>48</sup> wenanoibo akéqká mina tagéra áhtenuye. Wenanoga wensabé, Nénahnino, arenaboreq ínereqka are áhnte anébáhréta irupipeq anotahtaq págegeúye. Aneqsabé itensabé íre iwíáhía

miraono úwe. <sup>49</sup> Úwana Sísaga sensabé, Aneqsabé ninebahroyo? Nánibone nahtapeq míahrahume íre tagariehyo úwe. <sup>50</sup> Úwara sega mi ehwéh áwahewé íre ahteboye. <sup>51</sup> Sísaga Néhsara suwahpeq se kérérena sene ehweh kawerue sehgiuwana wenanoga minayabe moke ahreraq matawéna iwíáhúwe. <sup>52</sup> Sísa mó anonurena anotah aní ahtebia aní míowara Manikánka wensabé arutaboírúwara wehukega wensabé iwíáh iwíáhuwe.

### 3

*Sóni wání meri merinú anínká teriu ehwehne.*  
(Mátíyu 3.1-12; Máhka 1.2-8; Sóni 1.19-28)

<sup>1</sup> Anotah wahnáh aní wenáwíqtare Sísáhri Táíbériúsa míowe. Wega 15 opéq wahnahnúwana mó wahnáh aní wenáwíqtare Póntiása Páhiráti ména Súría marákórápéq wahnahnúwe. Mi tanáhráq Érótiga Kehrari marákórápéq wahnahnúwana wenábáq wenáwíq Pírípi ména Ítúria marákóákáq Tárakóníti marákóákáq wahnahnúwe. Wahnahnúwana mó wahnáh aní wenáwíq Árisánia ména Ábíreni marákórápéq wahnahnúwe. <sup>2</sup> Wahnahnúwara Ánásareq Káiyápásareqka Manikáne ehweh mibeq mahbeq arítáh kéréq wahnahnuye. Mi tanáhráq Sékaráiane ahninkáwá wenáwíq Sóni abatapi míowana Manikánka terie arámbéhrí atowe. <sup>3</sup> Terie arámbéhrí atowana Sóniga moke Sorana aroipéq wahtotaq ko marákórápéq kure ehweh teriuwe. Teriena, Manikánka itene ahababáqsabe kaweraitankéhboq ahababáq sansa sueq kaweqtaq míáhro. Itene ahababáq sansa sueq kaweqtaq

míéh rataqmé wání meiníe úwe. <sup>4</sup> Minayabe Manikáne ehweh irarú ani wenáwíq Áísáíaga naho púkuipéq sehiranue mahraréna,

We uworapeqté sawai sawaiéna mahraréna, Itene Wahnah sína ahmé aborisahro. Wene ah kaweraráhro.

<sup>5</sup> Mi ah obarirankeheéq nonsuwewarí akariaruqme anotah sawéhwárínkákáq káriq sawéhwárínkákáq apansuqme mi ah tábúsoq maráhro. Aesa áh obaríqme sabahro. Ebah masahpawe kaweroro.

<sup>6</sup> Manikánka kaweraitahna arámbéhrí mah kehiná kéhínánká tagagehe ire úwe. (*Aisaia 40.3-5*)

<sup>7</sup> Áhnte wehekéqká wání meyanehéera Sóniba suwana wega sensabé, Itewe wehene animarí móe. Manikánka anotahta q kamah ainehboq pehbeheráh pokoro insega teiro? <sup>8</sup> Itene ahbabáqmari sueq kaweq sansánoro. Mirairataq Manikánka tagéna ite amahnága mó sansánowe íwíáhinkehe. Ébárahma itene igaqna míéh púaq itewe kaweq ke míone éq iteitensabé irariyeho. Manikánka mah ebáhmáritáté Ébárahmane anahwaréh mirarahráhire. <sup>9</sup> Wehukenínká awanká áwaheraq tehsúme maréhrana kaweq será íre íyéh áwánká moke apiwe ira pariankéhe úwe.\*

<sup>10</sup> Sóniba su kegá wene ehweh irera wensabé, Aneronehnikono uwe. <sup>11</sup> Aneronehnikono uwana wega sensabé, Téhtaré síótí matíéh ánínká íre síótiakáq ání peh morá síótí náwo. Áhnte topáh matíéh ánínká tabonah ke wehwehúno úwe.

\* **3:9:** Mi ehwéh áwahewé aigarápéqté éhwéh Mátíyu 3.10 tagáhno.



12 Táhkísi moné meyháh kegá wání meyanehéera Sóniba séra wensabé, Íwáhnoraníno, ite aneronehnikono uwe. 13 Aneronehnikono uwana sensabé, Wehukene móné pehipi meyhéboq peh morá táhkísi móné meyháho úwe.

14 Sóntía kegá wensabé, Itewe aneronehnikono kasenuwana wega sensabé, Mó kené ménsámehnsá meyanehéeq wehuke subiqmareq pehipi meyhého. Sensabé péhe éhwéh ariteq sene ménsámehnsá pehipi meyhého. Itene arambehriyabé meyháhna apéq awehraq kéhre íwíáho úwe.

15 Manikánka Asiu, ke merirena kawerari-tankeheéna peh morá ání omaq atowara Asiu kegá we áwénunuwe. Asiu kegá Sónine ehweh irera éhnehéera iwíáhéera, Sóniwe itega áwénunúna anípómo uwe. 16 Uwana Sóniga sensabé ayahqme teriena, Inehe si anímé anotah aní ména íné kiotaiqme aní míre. We anotah aní púana ínéga wene súu nahniáq pugereyabe íre awehrari aní múge. Wegá Manikáne Awa iteba eqmarankéhe. Wehukeníká uworapeq kekiaréhra anotah irárehnserah Manikáne Awanka iteba tuinkéhe.

17 Wehukega ayu siqmíáhtáq sega kaweq ayú sene nahtapeq sáharera íre kaweq ayú iraipéq súáhwe. Mira onserah Manikánka eqmaréh ánínká kaweqtaq míáh keyábé, Néne mátaburapeq ki-wíáhro aritena ahbabáq keyabé, Íre puinkorahi iráipéq mía míaoro aritankéhe úwe.

18 Sónine ehweh író kega iwíáhigeheéna wega áhnte mó mina tahnsa éhwéh pahsuena oga mé ehweh teri terinúwe.

*Érótiga Sóni karabúsiipéq móato ehwéhne.  
(Mátíyu 14.3-4; Máhka 6.17-18)*

<sup>19</sup> Érótiga wenábáqne ahre Éróríása meywana Sóniga minaakaq wene mó ahbábáqkákáqsábé abiahnsa atena íre kaweróne atowe. <sup>20</sup> Íre kaweróne atowana Érótiga sóntía keyábé, Sóni táhtoqme karabúsiipéq móátáhro úwara táhtoqme karabúsiipéq móátówe. Minayabe Érótime ahbabáq áhnte agúwe.

*Érótiga Sóni karabúsiipéq íre móatotaq Sóniga Sísa wání meawu ehwéhne.  
(Mátíyu 3.13-17; Máhka 1.9-11)*

<sup>21</sup> Sóniga áhnte ke wání meriena Sísa moq wání meyawuwana púrerútaq sabona sawekúwana <sup>22</sup> Manikáne Awanka tunse kiboki tahnsanéna Sísa mārūnsurahúwe. Marūnsurahúwana íopeqté éhwéhnká mahraréna, Are niruní nénáhní móne. Arensabé nirutaboiruge úwe.

*Sísane aigaqnaréh síwíqmari kéh éhwéhne.  
(Mátíyu 1.1-17)*

<sup>23</sup> Sísaga wene arambehri áhwárótaq we 30 opéq marakóipeq míowe. Wehukega iwíáhéra, Sísawe Sósépane ahninkáwáe uwe.

Sósépawe Érine ahninkáwáe.

<sup>24</sup> Ériwe Mátátine ahninkáwáe.  
Mátátiwe Áríwáine ahninkáwáe.  
Áríwáiwé Mékine ahninkáwáe.  
Mékíwe Sánáine ahninkáwáe.  
Sánáiwé mó Sosépáne ahninkáwáe.

<sup>25</sup> Sósépawe Mátátíásane ahninkáwáe.  
Mátátíásawe Émósine ahninkáwáe.

Émósiwe Náhúmane ahninkáwáe.  
 Náhúmawe Ésarine ahninkáwáe.  
 Ésáriwe Nágáine ahninkáwáe.  
 26 Nágáiwe Matane ahninkáwáe.  
 Matawe Mátátíásane ahninkáwáe.  
 Mátátíásawe Séménane ahninkáwáe.  
 Séménawe Sósékane ahninkáwáe.  
 Sósékawe Sórane ahninkáwáe.  
 27 Sórawe Sóánánane ahninkáwáe.  
 Sóánánawe Árésane ahninkáwáe.  
 Árésawe Sérúbábérane ahninkáwáe.  
 Sérúbábérawe Séátíérane ahninkáwáe.  
 Séátíérawe Nériine ahninkáwáe.  
 28 Nériwe Mékine ahninkáwáe.  
 Mékiwe Éráine ahninkáwáe.  
 Éráiwe Kósámane ahninkáwáe.  
 Kósámawe Émárámane ahninkáwáe.  
 Émárámawe Éane ahninkáwáe.  
 29 Éawe Sósúane ahninkáwáe.  
 Sósúawe Ériésárane ahninkáwáe.  
 Ériésárawe Sórímane ahninkáwáe.  
 Sórímawe Mátátine ahninkáwáe.  
 Mátátiwe Áríwáine ahninkáwáe.  
 30 Áríwáiwe Símiónine ahninkáwáe.  
 Símióniwe Súrane ahninkáwáe.  
 Súrawe Sósépane ahninkáwáe.  
 Sósépawe Sónámune ahninkáwáe.  
 Sónámuwe Ériákímane ahninkáwáe.  
 31 Ériákímawe Mériane ahninkáwáe.  
 Mériawe Ménane ahninkáwáe.  
 Ménawe Mátátane ahninkáwáe.  
 Mátátawe Nétánine ahninkáwáe.  
 Nétániwe Tébitine ahninkáwáe.  
 32 Tébitiwe Sésine ahninkáwáe.  
 Sésiwe Óbétine ahninkáwáe.  
 Óbétiwé Póásine ahninkáwáe.

Póásiwe Sámónine ahninkáwáe.  
 Sámóniwe Násónine ahninkáwáe.  
<sup>33</sup> Násóniwe Ámínárápáne ahninkáwáe.  
 Ámínárápawe Átínine ahninkáwáe.  
 Átíniwe Áránine ahninkáwáe.  
 Árániwe Ésárónine ahninkáwáe.  
 Ésáróniwe Pérésane ahninkáwáe.  
 Pérésawe Súrane ahninkáwáe.  
<sup>34</sup> Súrawe Sékópane ahninkáwáe.  
 Sékópawe Áhísáhkine ahninkáwáe.  
 Áhísáhkiwe Ébáráhmane ahninkáwáe.  
 Ébáráhmawe Térane ahninkáwáe.  
 Térawe Náhórane ahninkáwáe.  
<sup>35</sup> Náhórawe Sérúkane ahninkáwáe.  
 Sérúkawe Áréune ahninkáwáe.  
 Áréuwe Pérékane ahninkáwáe.  
 Pérékawe Ébérane ahninkáwáe.  
 Ébérawe Sérane ahninkáwáe.  
<sup>36</sup> Sérawe Káínane ahninkáwáe.  
 Káínawe Ápásátine ahninkáwáe.  
 Ápásátiwe Síémane ahninkáwáe.  
 Síémawe Nóahne ahninkáwáe.  
 Nóahwe Áramékane ahninkáwáe.  
<sup>37</sup> Áramékawe Métúsárane ahninkáwáe.  
 Métúsárawe Ínókune ahninkáwáe.  
 Ínókuwe Sárétane ahninkáwáe.  
 Sárétawe Máhrárarine ahninkáwáe.  
 Máhráráriwe Káínánane ahninkáwáe.  
<sup>38</sup> Káínánawe Énósane ahninkáwáe.  
 Énósawe Sétine ahninkáwáe.  
 Sétuwe Éhrámane ahninkáwáe.  
 Éhrámawe Manikáne ahninkáwáe.

## 4

*Owainawanka Sísa áhwárawe tagó ehwehne.*

*(Mátíyu 4.1-11; Máhka 1.12-13)*

<sup>1</sup> Manikáne Awanka Sísa req mía míaúwana Sísa Sorana aroipéq suena pokúwana Manikáne Awanka abatapi móatowe. <sup>2</sup> Móatowana abatapi ména áhnte wehekáh 40 wehekáh mitaq míowana owainawanka weba séna Sísa ahabárinkeheéna áhwárawe tagéna áwíoqnówe.

Mi tanáhráq Sísa táhutahuq awehriéna 40 wehekáh parabagútaq anotah arúpibíúwe.

<sup>3</sup> Anotah arúpibíúwana owainawanka wensabé, Are Manikáne ahninkáwá míahna puah mah ebáhmáránsábé tópah úkúno ato úwe. <sup>4</sup> Úwana Sísa wensabé, Manikáne ehwehnka aiq mahraréna, Tópahnka wehuke íre oganúq sitahráhi nanere ire úwe. *(Lo 8.3)*

<sup>5</sup> Úwana owainawanka Sísa meqmena moke mah marákó marákóipéqté wáhnáhné arambehri apubúue sokigi atena <sup>6</sup> wensabé, Ínéwé iwíáhue omaq atáhna anínká moke tagáhna ke wahnahninkehe. Mina omaq ate arámbéhrí peh ínénéne arambehri wire. <sup>7</sup> Arega ínénsabe arehunseraráq mé iwíáh iwíáh aintehnana arega moke tagáhna ke wahnahnúno ataníe úwana <sup>8</sup> Sísa wensabé, Manikáne ehwehnka aiq mahraréna, Maniká itene Wahnahnsabé iwíáh iwíáh ateq webataq we awahbeh arámbéhrí miraoro ire úwe. *(Lo 6.13, 10.20)*

<sup>9</sup> Úwana owainawanka Sísa meqmena Sarúsarama suwahpeq Manikánsabe iwíáh iwíáh atáh náh nahnsorapéq móatena wensabé, Are

Manikáne ahninkáwá míahna puah maraipéq ahkuagúno úwe. <sup>10</sup> Ahkuagúno éna wega minayabe Manikáne ehwehnka aiq mahraréna, Manikánka wene íópeqté kényábé are wahnahnatiáhro aritankéhe. <sup>11</sup> Ebahtaq arene aigará peraq míéhneho éra sene siyahnkaratáté are pankeragéhe ire úwe. *(Buk Song 91.11-12)*

<sup>12</sup> Úwana Sísaga ahqáho atena wensabé, Manikáne ehwehnka mó mahraréna, Maniká arene anotah Wahnáh áhwárawe tagé áwíoqnéhneho ire úwe. *(Lo 6.16)*

<sup>13</sup> Úwana owainawanka mi tanáhráq mó íre áhwárawe tagéna peh túbáh agúwe. Sísaga anotah-taq ahqáho atonsabe owainawanka iwíáhéna, Mó tanáhráq kouwekinie éna we auwena pokúwe.

*Sísaga Kehrari marákórápéq wene arambehri áhwáró ehwehne.*  
*(Mátíyu 4.12-17; Máhka 1.14-15)*

<sup>14</sup> Manikáne Awanka Sísá págege atowana wega Kehrari marákórápéq kouwekúwara we éhweh mitaq teri mahtaq terinuwe. <sup>15</sup> Mirauwana we Asiu kené momiwí nahmáritápéq síwáhnorúwara ómiga wensabé iwíáh íwíáh atówe.

*Néhsara suwahpeqte kégá Sísansabé anotah abíáhnsá ató ehwehne.*  
*(Mátíyu 13.53-58; Máhka 6.1-6)*

<sup>16</sup> Sísaga wenawahpeq Néhsara pokéna ahrena ahrena wehekáh wene sánsánéna Asiu kené momiwí nahtápéq kibekúwe. Kibekéna Manikáne ehweh sáhnsahinieéna iriwe míowe. Iriwe míowara <sup>17</sup> mitaqté kégá Áísáiaga sehiranú pukú Sísá

áwúwana mi pukúípéq kabarue mah ehwéh kotaq sáhnsahuwe. <sup>18</sup>Wega sáhnsahwe mahraréna,

Manikáne Awanka ínéba ména págege aintena, Tabonah ke néne kaweq ehwéh korerio éna eqmaq núwéhre. Saiqnariéh keyábé sabirue ehweh korerio. Aura pira keyábé siura ebioráho ehwéh korerio. Síwíoqnahwara sirupipeq umehi keyábé sabirue ehwéh korerio. <sup>19</sup>Manikánka kaweraritahna tanáhráqsábé korerio éna eqmaq núwéhre úwe. *(Aisaia 61.1-2)*

<sup>20</sup>Sísaga aiq sáhnsahwe parabaruenta mi pukú wahnah aní awena tútuue míowara moke mitaq míó kega we ebitiówe. <sup>21</sup>Ebitiówana wega sensabé, Ínéga sáhnsáhú éhwéh íráhtáq ibora mi ehwéh aiq pútaragire úwe. <sup>22</sup>Úwara moke míó kega wene ehwehnsabé iwíáh íwíáhéra seye náhenéra, Kaweq ehwéhne éra áhtenuwe. Áhtenéra árahue mi kawéq éhwéh irarerahiro éra mah anímé peh Sósépane ahninkáwá míéh mino uwe.

<sup>23</sup>Uwana Sísaga sensabé, Iteriborehga mah pabéqmé éhwéh iraréna, Are sóteh aní miahna puah arerene awahre kawerúno ewe. Itega ínénsabe, Arega Kápénéáma marákórápéq ótaq sansá miraónaq irone íwíáhéq arega mitaq mirauronanserah mahtaq arenawahpeqkakáq moq miraúno íwíáhoo? <sup>24</sup>Teiníboq írátiáhro éna, Wenawahrahga Manikáne ehweh irari anínsabé, Are íre Manikáne ehweh iraréna aní móne ata ataowe. <sup>25</sup>Aiq pútaq ehwéh teiníe. Naho Manikáne ehweh irarú ani Éráisa marakóipeq míowana apahtáro ópéq mó opéq ákáhtaq íre ibonsúnsabe

moke mi marákóráq anotah ehwéhrówe. Mi tanáhráq áhnte kewéinínsó Ísara kené marakórapeq míowana <sup>26</sup> Manikánka Éráisa seba eqmaroo? Írakaumo. Manikánka we nahnso kewéiní Sárépáta suwahpeq Sáiróna marákórápéqté inípá eqmarowe. <sup>27</sup> Manikáne ehweh irarú aní Érisa oga míotaq áhnte Ísara ke anotah naonkákáq ké míówe. Manikánka Érisa séhréh atehrana wega áhnte kaweraritoo? Írakaumo. Peh morá Síria marákórápéqté náhnsó wéh aní wenáwíq Néáma anotah naonkákáq míowana kaweratowe úwe.

<sup>28</sup> Úwara moke mitaq momiwíu kegá irera anotah abíáhnsá atówe. <sup>29</sup> Abiahnsa atónsabe iriwe méra Sísa táhtoqme sensuwahpeqte áhnánsáhrápéq abariwe móátówe. Mitaq mentú kowara sega Sísa mentúpipeq pagunsuaneheéra móátówana <sup>30</sup> wega mi wehekéq ákáhpitaq kure pokúwe.

*Sísaga owainawa kaqauwo ehwéhne.  
(Máhka 1.21-28)*

<sup>31</sup> Sísaga pokéna Kehrari marákórápéq Kápénéáma suwahpeq tunse ahrena ahrena wehekáh Asiu kené momiwí nahtápéq síwáhnorúwe. <sup>32</sup> Págegeue síwáhnorú púara sega áhtenuwe. <sup>33</sup> Áhtenuwana owainawanka subiqmaq subiqmarú aní Asiu kené momiwí nahtápéq míowana owainawanka iwíáh atowana anotahtaq mahraréna, <sup>34</sup> Sísao, are Néhsara suwahpeqte aní móne. Arega itewe aneraitaníbo? Iubiq iuanie seno? Arewe Maniká míéhrabeq kaweqtaq mía míaóna aní móne. Arewe aiq tagaríóge úwe.



35 Úwana Sísaga owainawansabé awehgu atena, Ehiya mé we auwe pokúno atowana owainawanka wehekeq ákáhpi mi aní aunúnkaq márunsurahúwana íre subisa pehipi auwena pokúwe. 36 Pokúwara ómi míó kega anotah ahténéra seye náhenéra, Aneq pagégé éhwépo? Anotah wahnáh ánínká síwáhnorinserahnéna Sísaga pokúno éhwéh págegeue teriuwara owainawamarínká mi aní auwera pokowe uwe.

37 Sísaga éhweh mitaq teri mahtaq terinuwara ómi mi marákórápéqté kégá írówe.

*Sísaga Pítane ahrahnawa kawerato ehwéhne.*

*(Mátíyu 8.14-15; Máhka 1.29-31)*

38 Sísaga Asiu kené momiwí nahtápéq suena Sáimónine nahtapeq pokúwana Sáimónine ahrahnawa osoro awáhréúwara míó kega Sísansabé, Kawerato uwe. 39 Uwana Sísaga awahre inípá kure wene máhriqtaq iriwe ména iraró awáhréyábé, Túbáh agúno atowana kaweragúwana mi inínká apubúue irigéna táhutahuq tíwe náriuwe.

*Sísaga áhnte awáhré ké kawerarito ehwéhne.*

*(Mátíyu 8.16-17; Máhka 1.32-34)*

40 Íó tupekútaq awahre kené iyahnabo animárínká se sehgiwera Sísaba mórítówe. Mórítówana Sísaga wene ayahnkaratáté moke awahre ke moraní moranínue táhtorowana sene awahre kaweragúwe. 41 Kaweragúwara owainawamarínká mó ke suanaútaq ehwehna abaéra Sísansabé, Are Manikáne ahninkáwá wóne éra mi ke suera pokuwe. Pokutaq Sísaga sensabé, Ehiya míahro aritowe. Owainawamarínká, Sísawe Manikánka wehuke kaweraritankeheéna omaq

ato aní míre éra sirupipeq we tagaríónsabe Sísaga ehíyansá aritowe.

*Sísaga mó ke suwahpeq kure kaweq ehwéh teriu ehwéhne.*

*(Máhka 1.35-39)*

<sup>42</sup> Ahyahbinkerotaq Sísaga mitaq suena abatapi pokúwe. Mibeqté kégá we anebahrue kure tagéra wensabé, Pokinehboq iteba sewíahno atówe.

<sup>43</sup> Atówana Sísaga sensabé, Ínéwé mó kehiná suwahpeqkakáq Manikánka wahnahnirabeqte éhwéh wene kaweq ehwéh koreriníe. Manikánka, Korerio éna eqmaq núwátáire úwe. <sup>44</sup> Sísaga Súría marákórápéq Asiu kené momiwí nahmáritápéq mi ehwéh koreri terinúwe.

## 5

*Sísaga sípiipéq tútuue síwáhnorú ehwehne.*

<sup>1</sup> Sísaga Kénésáréti kawéhú\* áhnopeq iriwe ména síwáhnorútaq su kegá Manikáne ehweh iraneheéra weba kowíórabeq áhnte ke soruparíó puana mitaq kígiúwe. <sup>2</sup> Pahnsábátáhru kegá sene sípiraré áhnopeq marera arahwéraq sene kahwewarí pabeq paberuwana Sísaga mi sipíraré tagówe.

<sup>3</sup> Su kegá pagu pagununsabé Sísaga Sáímónine sípiipéq kie irigue wensabé, Mahtaq sue móbeq móatiahno úwe. Úwara sípiipéqte kégá wene ehweh sehgiúwana wega mi sipíipéq tútuue ména áhnopeq míó keyabé síwáhnorúwe.

*Pítarehga sene sípiakáq suera Sísá kéro ehwehne.*  
*(Mátíyu 4.18-22; Máhka 1.16-20)*

---

\* **5:1:** Kehrari kawéhúme mó awíq Kénésáréti kawéhúne.

4 Síwáhnorú ehweh parabagútaq wega Sáímónirehyabe, Pah meyagéhboq púrúrúia káwéhútápéq pokue kahwe tuparuqme uwe tagahro úwe. 5 Úwana Sáímóniga Sísansabé, Anotah aní móne. Itega inokáhpeq uwe taga tagaéwonana írakaunire. Peh arega tenienayabé mó uwe taganie úwe. 6 Sega sene kahwewarí tuparuqme uvera áhnte pah maqmíówe. Peh íregárita q pah maqmíówana sene kahwewarí surakinaúnsabe 7 sega mó sipíípéq mío iyáhnábó ánimáínsabé siyah sahnupéra seséhréh aítáhiro uwara sure mi sipíráréipéq pah márówana umehúnsabe sípiraré wánínkorahúwe. 8 Sáímóniwe we mó awíq Pítæ. Wega mina tagéna Sísane auranabiah tapeq arehunseraráq ména wensabé, Néne Wahnahno, ínéwé áhnte ahabábáq aní mío púah arega nue pokúno úwe. 9 Se áhnte pah maqmíónsabe Pítareq wereq mío kereqka anotah ahténuwe. 10 Pítane iyahnabo anité sensiwiq Sémísireq Sónireqme Sébérine ahninkáwáraré mío ye. Pítarehga iwíáhunserah sega moq mira iwíáhuye. Sísaga Pítansabé, Íre áhreúno. Ibora arega kahweipéq pah maqmiahnanserah mókake wehuke ínéba meriqme sinkehe úwe. 11 Úwara sega sene sípi áhnopeq arahwéraq abariue marera moke suera Sísá kéro we.

*Sísaga anotah naonkákáq aní kawerato ehwéhne.  
(Mátíyu 8.1-4; Máhka 1.40-45)*

12 Sísaga mó ke suwahpeq míotaq anotah naonkákáq ánínká we tagéna áhtenú púana arehunserarárue wene ayahqno káuqmunurawéna Sísansabé pagu pagunéna, Anotah aní móne.

Are awahbáhnaraqmé kaweraintahráhóne úwe. <sup>13</sup> Úwana Sísaga ayahnkahkahrue wenaneq táhtorena wensabé, Aiq mirauge. Are awaho ani míahno atowana mina irarútaq wene náonaba apubúue wagúwana kaweragúwe. <sup>14</sup> Kaweragúwana Sísaga wensabé, Are kaweratónsábé mó ke teríneho. Írakaumo, Manikáne ehweh mibeq mahbeq aitéh ánípá pokue arene anonka móreawo. Are awaho ani úkire ighboq Mósísiga irarúnserahnue Manikánsabe titirúno úwe. <sup>15</sup> Úwara Sísaga miraú ehweh mitaq teri mahtaq terinuwara áhnte kegá wene ehweh iraneheéra suwe. Awahre kegá, Sísaga kaweraitankéhe íwíáhéra weba suwe. Áhnte kegá weba suwana <sup>16</sup> wega ahriahri miraúnserahnéna púrerinieéna abatapi pokúwe.

*Sísaga aiayah pukia ání kawerato ehwehne.  
(Mátíyu 9.1-8; Máhka 2.1-12)*

<sup>17</sup> Sísaga síwáhnorútaq Péhrasi† kereq Mósísine ehweh síwáhnoru kereqka mitaq tútuue méra írówe. Sega sensuwahpeqme Sarúsarama suwahpeqkakáq moke Kehrari marákórápéqté ké suwahpeqkakáq Súría marákórápéqté ké suwahpeqkakáq sensuwahpeq suera Sísane ehweh iraneheéra suwe. Manikánka Sísá págege atena séhréh atowana wega awahre ke kaweraritowe. <sup>18</sup> Mó kegá aiayah pukia ání wene sehitaq Sísaba móataneheéra sehgiwera suwe. Sísá míéh náhtápéq móatanehe íwíáhéra <sup>19</sup> áhnte wehekéq nahupeq kígiunsabe sega íre

† 5:17: Aigárápéqté éhwéh Mátíyu 3.7 tagáhno.

kioráhuwe. Íre kioráhéra nahnsorapéq kire abogéh piruqmarera abahrabahrútaq aiayah pukia ání wene máhriqkákáq sehitaqmaqme wehuke míópi Sísane auranabiahtapeq márúnátówe. <sup>20</sup> Sega iwíáhéra, Sísaga kaweratanawire iwíáhuwana Sísaga sene iwíáh tagéna aiayah pukia ánínsábé, Náníbáq móne. Arene ahbabáq aiq kaweratóge úwe.

<sup>21</sup> Úwara Péhrasi kereq Mósísine ehweh síwáhnoru kereqka seye náhenéra, Mah anímé Manikánsabe íre kaweq ehwéh atéhre. Ahbabáqsabe insega kaweraritahráhiro? Manikánka webataq wehukene ahbabáq kaweraritahráhire uwe. <sup>22</sup> Uwana Sísaga sene iwíáh irena sensabé, Itene irupipeqmé aneqsabé mira iwíáho? <sup>23</sup> Aiayah pukia ánínsábé aneq ehwéh teawinínkono? Arene ahbabáqsabe kaweratóge teawinínkono? Are irigue ah nogo teawinínkono? Íre págege ehwéhmé ahnabo? <sup>24</sup> Íné wehukení úku anínká mah marákó marákó wehukene ahbabáq kaweraritahráhuge. Sokigi ainíboq tagaríáhro éna aiayah pukia ánínsábé, Teawiníboq iro. Irigue arene máhriq mewe arene nahtapeq pokúno úwe. <sup>25</sup> Úwana ómi ke míótaq mi anínká apubúue irigéna wene máhriq mewena Manikánsabe anotahtaq iwíáh iwíáh atena wene nahtapeq pokúwe. <sup>26</sup> Pokúwara tago kegá anotahtaq áhtenéra Manikánsabe iwíáh iwíáh atera seye náhenéra, Iboramé ótaq sansá tagóne uwe.

*Sísaga Mátíyunsabé, Íné séniro ú ehwehne.  
(Mátíyu 9.9-13; Máhka 2.13-17)*

27 Sísaga tuekúwana táhkísi moné meyo ani wenáwíq Áríwái‡ tagówana wega táhkísi moné meyorabeq tútuue míowana tagéna Sísaga wensabé, Íné séniro úwana 28 wega irigue moke mitaq ko naneq suena Sísá kérowe.

29 Áríwáiga wene nahtapeq Sísá kiraboúwara áhnte táhkísi moné meyo kereq mó kereqka Sísarehreq táhutahuruwe. 30 Táhutahuruwara Péhrasi kereq Mósísine ehweh síwáhnoru kereqka mina tagéra Sísá kéro keyabé kasenéra, Táhkísi moné meyáh kéreq mó ahbábáq kéreqme itewe aneqsabé moráráq naho éra abiahnsa arítówe. 31 Sísaga sene ehweh irena sensabé, Sótehgá awaho ke márahsíni íre náriasa peh morá awahre ke nárire. 32 Mina inserah ínéwé kaweqtaq míáh ké séhréh aritanieéna íre suge. Peh ahbabáq ke kaweraritanieéna suge úwe.

*Sísaga táhutahuq awehrio sansánsabé síwáhnorú ehwehne.*

*(Mátíyu 9.14-17; Máhka 2.18-22)*

33 Wehukega Sísansabé, Sóni kéréh kégá mó wehekáh mó wehekáhnue kawerue púreroneheéra táhutahuq awehriowe. Awehriowara Péhrasi ke kérérah kégá moq mira aruqaruowe. Peh are kéréh kégá íre awehriéra pehipi nahwe uwana 34 Sísaga pabeqme ehwéh teriena, Pahuwirotaqmé o menáhwé míéhtáqmé itega wene iyahnaboyabé, Táhutahuq awehrioro terieráho? Írakaumo. 35 Mókake o menáhwé seba íre míahnaraqmé mi

---

‡ 5:27: Mátíyuwe mó awíq Áríwáie. Mátíyu 9.9 tagáhno.

tanáhráq wene iyahnaboga táhutahuq awehrigehe úwe. §

<sup>36</sup> Sísaga mó pabeqme ehwéh mahraréna, Wehukenínká nahonáh sáhkétí kawerinieéna o sahkétí subansuqmaqme mi subánsátáté párúwe nahonáh sáhkétí kawerinabo? Írakaumo. Miraitaq tahirímé nahonáh sáhkétí mó subanki irino.

<sup>37</sup> Wehukenínká o nahníaq sera ano naho naho méméné áúyahwa antéhyápípéq íre ahkíre. Miraitaq tahirímé sera anonka muinaraq nahonáh antéhyá tapoagirana sera ano marakóraq antigi irino.

<sup>38</sup> Wehukenínká o será ano o antéhyápípéq ahkíre. Wehukega ahkírataq mi tehtaré náneqme kawerue kanae. O será anome kawerue kanae. Antehyamé moq kawerue kanae úwe. \*\* <sup>39</sup> Naho sérá ano neh anínká iwíáhime, Naho sérá ano áhnte tei puana mi anónká o será ano kiotaikire íwíáhire úwe.

## 6

*Sísaga ahrena ahrena wehekáh arambehriéyabe irarú ehwehne.*

*(Mátíyu 12.1-8; Máhka 2.23-28)*

<sup>1</sup> Ahrena ahrena wehekáh Sísareq we kéro kereqka páréti mirao naneq será sotápéq kótaikutaq we kéro kega mi será késabariqme késabariqmeue kure ayahnué ái poruwe nowe.

<sup>2</sup> Nowara Péhrasi kegá sensabé, Ahrena ahrena wehekáh íre mirao naneq sansá míre. Aneqsabé miraoo uwe. <sup>3</sup> Uwana Sísaga sensabé, Ítewe Manikáne púkuipéqté séhíramé Tébitireq we kéro

---

§ 5:35: Mi ehwéh áwahewé aigárápéqté éhwéh Mátíyu 9.15 tagáhno.

\*\* 5:38: Mi ehwéh áwahewé aigárápéqté éhwéh Mátíyu 9.17 tagáhno.

kereqka sirupibiútaq mirau sansámé íre sáhnsahwe ahtebaho? <sup>4</sup> Wega Manikánsabe iwíáh iwíáh atáh náhúpéq kibekue Manikánka tagankeheéra máró paretí mewe néna we kéro ke náriuwara sega moq nowe. Mósísine ehweh irarunka mi paretíwé pehipéqté kégá íre nah nanere. Peh morá Manikáne ehweh mibeq mahbeq arítáh kégá nahrahowe ire. *(1 Samuel 21.1-6)*

<sup>5</sup> Sísaga sensabé, Íné wehukení úku anínká ahrena ahrena wehekáh wahnah wahnahnuge úwe.

*Sísaga ahrena ahrena wehekáh sawenkahnia áyáhnkákáq ání kawerato ehwehne.*

*(Mátíyu 12.9-14; Máhka 3.1-6)*

<sup>6</sup> Mó ahrena ahrena wehekáh Sísaga Asiu kené momiwí nahtápéq kibekue síwáhnorúwana mitaq sawenkahnia áyáhnkákáq ání míowe. <sup>7</sup> Mósísine ehweh síwáhnoro kereq Péhrasi kereqka mitaq méra Sísaga ehweh ataneheéra ahrena ahrena wehekáh wehukení kaweratanabiramo éra ebitiówe. <sup>8</sup> Ebitiówana Sísaga sene sirupipeqté iwíáh aiq tagéna ómi kégá tagotaq sawenkahnia áyáhnkákáq ánínsábé, Iriwe míahno úwana we irigue míowe. <sup>9</sup> Irigue míowana Sísaga míó keyabé, Itensabé kaseninie. Mósísine ehwehnikawé ahrena ahrena wehekáhnábé anere teiro? Kaweq sansá miraonéhnkono? Íre kaweq sansá miraonehnkono? Wehuke kaweraritanehéq séhréh aritanéhnkono? Íre kaweratanéhnkono éna <sup>10</sup> míó ke aurankaue tagéna sawenkahnia áyáhnkákáq ánínsábé, Arene ayahnkara obariro úwana wene ayah obarirowana kaweragúwe. <sup>11</sup> Kaweragúwara mi kégá tagéra anotah



abíáhnsánéra sío síoéra, Sísawe aneronehnikono uwe.

*Sísaga we kéro ke omaq sito ehwehne.*

*(Mátíyu 10.1-4; Máhka 3.13-19)*

<sup>12</sup> Mitaqkake Sísaga púrerinieéna sáwéhrapeq kiwéna moke mi inókáhpéq mitaq púrerúwe. <sup>13</sup> Púreréna ahbiahipeq we kéro ke síáhrabéna airápété téhraníte omaq sitowe. Sensabé eqmaro kee ue síwíraritowe. <sup>14</sup> Omaq sito ke síwíqmarimé mahraue Sáimóninsabé Pítæ atowe. Pítæné ábákawawé Ehntarue. Mó anímárí síwíqmarimé mahraue Sémísi, Sóni, Pírípi, Pátórómíyu, <sup>15</sup> Mátíyu, Tómáhsi, Ápíásane ahninkáwá Sémísi, Sáimóni Séróti kahnáh aní, <sup>16</sup> mó Sémísine ani Súrása, mó aní téhtaré áwíqkákáq aní Súrása Ísíkárióti miraue omaq sitowe. Súrása Ísíkáriótiwe anehe Sísane naruo koweriro aníne.

*Sísaga áhnte awáhré ké kawerarito ehwehne.*

*(Mátíyu 4.24-25; Máhka 3.7-12)*

<sup>17</sup> Sega sáwéhrapeqté tútaq ukisatáq míówara áhnte we kéro kereq mó kereq míówe. Súría marákórápéqté kéreq Sarúsarama suwahpeqte kéreq nahmbísi marákórápéq Táíya suwahpeq Sáíróna suwahpeq mibeqté kéreq suwe. <sup>18</sup> Mi kegá Sísane ehweh iraneheéra séra sene awahre kaweraitankeheéra weba suwe. Owainawanka subiqmaq subiqmarú kega moq weba suwana Sísaga kaweraritowe. <sup>19</sup> Sísane anepeqte págege arítéh náneqka wereq wahtotaq míó ke kaweraritionsabe ómiga we táhtoqnaneheéra suwe.

*Sísaga iwíáh íwíáhoró ú ehwehne.*

*(Mátíyu 5.1-12)*

<sup>20</sup> Sísaga we kéro ke tagéna síwáhnoréna, Tabonah keo, Manikánka wahnah wahnahnirabeq awaq miahráhonsabé iwíáh íwíáhoró.

<sup>21</sup> Amahnága irupibii keo, mókake iyahbankiranae. Minayabe iwíáh íwíáhoró.

Amahnága umehiraq ibisah keo, mókake wíréh wíréhigehe. Minayabe iwíáh íwíáhoró.

<sup>22</sup> Íné wehukení úku aní séniráhnsábé mó kegá itensabé suwahrianae. Ite kaqiuwaneherawoe. Ite íéhruruoneherawoe. Ite íre kaweq anímárí móe aitaneherawoe. Íné séniráhnsábé mina tahnsa sánsámárí mirairataq iwíáh íwíáhoró.

<sup>23</sup> Segá mirairanka íópeq itene ápeq anotah úkinae. Minayabe segá mirairataq ábáhrue iru eyoyóeq iwíáh íwíáhoró. Segá ite íwíoqnehranserah sene sigaqnaréhga Manikáne ehweh iraru ke moq naho síwíoqnowe.

<sup>24</sup> Amahnága áhnte mensáméhnsá matiáh kéó, kamah ainawire. Itega iuwahbeh naneq aiq merowe. <sup>25</sup> Amahnága iyahbankiréh kéó, mókake irupi kamah ainawire. Amahnága wíréh wírého keo, mókake ibitunátúnánue ibisagehe. <sup>26</sup> Ómi kegá ite kaweq ke wóe irataq iwíáhue kawerurero. Irare kené sigaqnaréhga mina unserahnéra péhe éhwéh teríú keyabé kaweq ke wóe arítówe úwe.

*Itene naruoyabé irutaboiroro ú ehwehne.*

*(Mátíyu 5.38-48)*

<sup>27</sup> Sísaga mó mahraréna, Néne ehweh íráh kéó, teiníboq írátíáthro. Itene naruoyabé irutaboiroro. Itensabé suwahrieh ke kawerarítáthro. <sup>28</sup> Íéhruruo keyabé Manikánsabe teaweq, Mi ke kaweraríto ue teawéro. Íwíoqnah keyabé púrerarítáthro.

<sup>29</sup> Mó anínká are ahsuehinahwe éberiopeq pabeq suehnana ahsuehino. Arene sáhkéti meyah-naraq síóti meyaníe ínaraq íre ahqáho ato. <sup>30</sup> Mó anínká arensabé aneqpopoq nánio ínahwe náwo. Mó anínká arene ménsámehnsá meyehtaq wens-abé, Néne meyahna naneq apubúue menio íre irarúno. <sup>31</sup> Mó kegá ite iuwahbeh sansánue ite kaweritáhnserah itega moq mina tahnsanue se kawerarítáhro úwe.

<sup>32</sup> Sísaga mó mahraréna, Itega peh morá itensabé sirutaboiro keyábé irutaboírirtaqmé inseréhga, Ite kaweq ke wóe íwíáhigehbo? Írakaumo. Ahbabáq kega moq sensabé sirutaboiro keyábé sirutaboiro mino. <sup>33</sup> Itega peh morá ite kaweritáh ké kawerarítáh sánsánirataq inseréhga, Ite kaweq ke wóe íwíáhigehbo? Írakaumo. Ahbabáq kega moq mina tahnsa mirao mino. <sup>34</sup> Itega peh morá ite náieráho ke nárírataq inseréhga, Ite kaweq ke wóe íwíáhigehbo? Írakaumo. Ahbabáq kega iwíáhéra, Meyáh kégá mókake ite moq náigéhe éra sene ahbabáq iyahnabo náríeráho mino?

<sup>35</sup> Itene naruoyabé irutaboírue kawerarítáhro. Nárírataqmé mókake náigéhe íwíáhiyehboq pehipi náríéro. Mirairataqmé Maniká Iteriboga anotah apéq inkéhe. Itega wene animárí míagehe. Maniká Iteribo anotah aní mía míaéna íre peh morá we kaweritáh keyábé arutaboírarítéhre. Wens-abé íre iwíáh íwíáhia peh ahbabáq keyabé moq arutaboírure. <sup>36</sup> Maniká Iteriboga ómi keyábé arutaboírinserah itega moq irutaboírarítáhro úwe.

*Mó kené sánsá íre saraq sitáhro ú ehwehne.  
(Mátíyu 7.1-5)*

<sup>37</sup> Sísaga mó mahraréna, Mó kené sánsá saraq siteq ahabábq ke woe aritého. Mirairataq Manikánka moq itene sánsá saraq itena ahabábq ke woe aitanawire. Mó kegá ahabáraitó íwíáh íre iahreraq mareq súáhro. Súéhrationmé Manikánka moq itene ahabábq íre ahreraq marena suankéhe. <sup>38</sup> Nárírataq Maniká Iteriboga moq náinawire. Wega tasu tasue obenkíqme náinkéhe. Itega saraqme náríranserah wega moq mina tahnsanue náinkéhe úwe.

<sup>39</sup> Sísaga mah pabéqme éhwéh mahraréna, Aura pira ánínká mó aurá pírá ání ahmboqme ah sokigi atahráhiro? Írakaumo. Miraóyataq tahirímé mi anitégá mataipéq inahnsuoyaya irino. <sup>40</sup> Áwáhnorirana íréh ánínká we áwáhnori aní íre kiotaikorahire. Moke ahtebawiahnaraq we áwáhnori aní tahnsa míankehe úwe.

<sup>41</sup> Sísaga mó pabéqme éhwéh mahraréna, Arenawahrah aniné aurapi pehgáriq atútú tagé arerene aurapi anotah sehikára kéhnsábé aneqsábé arerene auransabé íre iwíáhono? <sup>42</sup> Arene aurapi anotah sehikára kéhrahwe arega íre tagahne. Minayabe aneqsábé arenawahrah anínsábé, Arene aurapite átútú meauwanínkono eno? Are ahabábq kopéráhpéróna aní móne. Téhwé arerene aurapite séhikára merue anehemé arenawahrah aniné aurapite átútú kawerue tagé meauwahráhone úwe.

*Íre kaweq awánkánká abehq sérá iyanae i éhwéhne.*

*(Mátíyu 7.16-20, 12.33-35)*

<sup>43</sup> Sísaga mó mahraréna, Kaweq awánkánká abehq sérá íre íyéhre. Abehq áwánkánká kaweq será íre íyéhre. <sup>44</sup> Wehukenínká awanká sera tagéna mi awánká ahtebahre. Wehukenínká wisuraqte pópo íre isioráhéna káránkáránsáhtaqte kombahtóq íre isioráhire. <sup>45</sup> Kaweq anínká wene arupipeq kaweq iwíáh kéh púana kaweq sansánire. Ahbabáq anínká wene arupipeq ahababáq iwíáh kéh púana ahababáq sansanire. Wehukeníné arupipeq iwíáh obenkítíéh púana wene áwéhga mi iwíáh irarerahire úwe.

*Nah piehya anítéyábé pabeqme ehwéhne.  
(Mátíyu 7.24-27)*

<sup>46</sup> Sísaga mó mahraréna, Néne ehweh íre sehgirohsabé aneqsabé néne Wahnah mone aintaho? <sup>47</sup> Ínéba séna néne ehweh irena sehgi ánímé aneq tahnsa anípo? Teiníe. <sup>48</sup> Néne ehweh irena sehgi ánímé nah piéh anínká marakó íre wahto ubuqme nahwiahnsanse págege marakóráq pearéh áni tahnsane. Págege marakóráq kawerue pearéh púana anotah ibónsirana wání piéhtáq wene nah íre kúrugúruue sokogia peh págegeue kéhre. <sup>49</sup> Néne ehweh irena íre sehgi ánímé aneq tahnsa anípo? Teiníe. Néne ehweh irena íre sehgi ánímé págege marakó íre ubuqme pehipi wene nah pearéh áni tahnsane. Anotah ibónsirana wání piéhtáq mi nah kúrugúruue sokogire. Sokogirana moke íre kaweragire úwe.

## 7

*Kíápéténine arambehri aní kawerato ehwéhne.  
(Mátíyu 8.5-13)*

<sup>1</sup> Sísaga mah ehwéh síwáhnoréna mitaq suena Kápénéama suwahpeq mátabuipeq kéagúwe. <sup>2</sup> Mitaq 100 Aroma sontiá kéné kíápéténiga ména wene arambehri aní anotah arútábóíratowana mi aní anotah awáhréena pukinaúwe. <sup>3</sup> Sísaga iteruwahpeq míéhre u irena kíápéténiga Asiu kené aboawah wehyábé, Néne arambehri aní segawerato koreawéro ue eqmaq suowe. <sup>4</sup> Eqmaq suowara Sísaba séra, Máho ue pagu pagunéra Sísansabé, Kíápéténiwe áhnte kawéq aní púah awahre aní segawerato. <sup>5</sup> Kíápéténiga ite Asiu keyábé áhnte arútábóíraitena itene momiwí nah pearena eqitáráire éra pagu pagunuwe.

<sup>6</sup> Pagu pagunuwana Sísaga se kériqme mi aniné nah wahtotaq kútaq kíápéténiga mó eqmaro kereq piehgiúwe. Segaga Sísansabé, Anotah aníno, kíápéténiga teí éhwéhmé iro. Wega arensabé mahraréna, Íné pehgáriq aní míó púah néne nahupeq íre súno. <sup>7</sup> Are anotah aní miahna puana areba íre koragoge. Arega peh ehweh irarinana néne arambehri aní kaweragino. <sup>8</sup> Íné moq wahnah sansá tagarióge. Néne wahnah aiq míéhrena íné moq wahnah aní ména sóntiá ke wahnahnuge. Ínéga mó sontiá áninsábé, Pokúno atótáq wega apubúue pokire. Mó sontiá áninsábé, Mahbeq súno atótáq wega apubúue ínéba sire. Néne arambehri áninsábé, Miraúno atótáq wega apubúue miraire. Kíápéténiga aiq irarire uwana

<sup>9</sup> Sísaga mi ehwéh irena áhtenéna pabeqme weba míó keyabé, Teiníboq írátíáhro. Mi anínká ínénsabe anotahtaq aiq pútare aintéhre. Nánuwahrah Asíú kéga mina tahnsanue íre aiq pútare aintáhwe úwe.

10 Úwara eqmaq suo kega kíápéténine nahtapeq kouwekue sutaq mi awáhré ání kaweragúwana awaho ani míowara kéragowe.

*Sísaga pukú mahbí iriwe oganúq ato ehwéhne.*

11 Mó tanáhráq Sísareq we kéro kereq áhnte mó kereqka Náini suwahpeq pokuwe.

12 Kuriraq wahtotaq sutaq mibeqté kégá pusa ání mómaisaneheéra sehgiwera suwe. Pukú aniné anowagáwé peh morá mi aní maqmarena kéweiní míowara áhnte wenawahraheq suwe.

13 Sísaga pukú aniné anowa tagéna wensabé arutaboiratena mahraréna, Íre ibisáhno éna

14 sehiq koráhtorowara sehgiwe su kegá mitaq iriwe míowe. Sísaga pusa áninsábé mahraréna, Káriq mahbí, irigúno úwe. 15 Irigúno úwana pusa ánínká iriwe tútuue ména ehwehnúwe. Ehwehnúwana Sísaga mi aní anowabá atowara

16 tago kegá áhtenéna Manikánsabe iwíáh iwíáh atówe. Iwíáh iwíáhatera mahraréna, Manikáne ehweh irari anínká iteba sire. Manikánka wene animárí séhréh aitanieéna aiq sire uwe. 17 Súría marákórápéqté kéreq móberiopeqté kéreq Sísaga miraú ehweh mitaq teri mahtaq terinuwara írówe.

*Sóniga we kéroya anité Sísaba eqmaq suo ehwehne.*

*(Mátíyu 11.2-19)*

18 Sóni kéro kega moke mi ehwéh teawúwana Sóniga téhranité omaq sitena 19 Sísansabé ehweh kasenigeheéna eqmaq suowe. Eqmaq suanaútaq mi anitéyábé, Sísansabé kogasenéta, Arewe Manikánka eqmaraníe ú anípo? Ite

mó anínsábé áwénunonehnikono kogasenotao úwe. <sup>20</sup> Úwara sega Sísaba kéra wensabé, Wání meri merini aní Sóniga eqmaq íúwéh rata súye. Wega ite eqmaq iuwanauraitaq mahraréna, Arewe Manikánka eqmaraníe ú anípo? Ite mó anínsábé áwénunonehnikono uraire uye. <sup>21</sup> Mi tanáhráq Sísaga áhnte awáhré kéreq owainawanka subiqmaq subiqmarú kereq aura pira kéreq kaweraritena <sup>22</sup> Sóniga eqmaq suo anítéyábé, Irehya ehwéhnkákákáq tagéhya naneqkákákáq Sóni koreawétao. Ínéga miraunka aura pira kégá tagahwara aigará soriqnah kega ah nogowara náonkakákáq kéné náo wagirara ahre parosa kégá ehweh íráhwe. Pusa ké iriwe oganúq sitena Manikáne kaweq ehwéh tabonah ke síwáhnoruge. <sup>23</sup> Ínénsabe árahinabomo íwíáh íre iwíáhia peh ínénsabe kawerue aiq pútare aintéh ánímé aru ukigme aní míéhre. Mah ehwéh Sóni koreawétao úwe.

<sup>24</sup> Sóniga eqmaq suo anité pokuyataq Sísaga weba sáhurío ke Sóni éhweh teriuwe. Wega mahraréna, Sóniga uworapeq íwáhnoruraitaq koraganeheraurotaqmé we inse wíre íwíáhéq koragaroo? Sóiririrana onega míu míu inserah Sóni mó iwíáh mó iwíáhi aní míre íwíáhéq koragaroo? Sóniwe íre mina tahnsa aní mire. Írakaumo. <sup>25</sup> We inse wíre íwíáhéq koragaroo? Kaweq korósí an-eraneria aní koragaroo? Írakaumo. We íre mina tahnsa aní mívarairara ménsámehnsá áhnte kéh ké siwahriria kéwé uworapeq íre mía peh wahnah kené nahtapeq mía míaowe. <sup>26</sup> We inse wíre íwíáhéq koragaroo? We Manikáne ehweh irari



aníne íwíáhuroo? Aiq pútaq iwíáhowe. Írátíáhiro. We Manikáne ehweh irari anínéna moke mó áwáhu ke kiotaikuraire. <sup>27</sup> Sóni éhwehme Manikáne ehwehnka aiq mahraréna,

Néne ehweh korerina anímé ebeq eqmarahnana are sina ah kawerarankehe ire úwe. *(Malakai 3.1)*

<sup>28</sup> Sísaga mó mahraréna, Teiníboq írátíáhiro. Sóniwe anotah anínirara moke mó kegá we íre kiotaikowe. Íre kiotaikowana Manikánka wahnah wahnahnirabeq íópipeq kibeki aní pehgáriq anínká Sóni kiotaikire úwe.

<sup>29</sup> Úwara táhkísi moné mewe meweu kereq áhnte mó kereqka mi ehwéh irera iwíáhéra, Manikáne sansá aiq kaweq sansáne uwe. Sóniga se wání merinie únsabe mira íwíáhuwe. <sup>30</sup> Péhrasi kereq Mósísine ehweh síwáhnoro kereqka Sónine wání íre meyónsabe Manikáne kaweq sansánsábé iuwahriehre íwíáhuwe.

<sup>31</sup> Sísaga mó mahraréna, Amahnága oga míáh kéwé ite aneq tahnsá kée teinínkono? <sup>32</sup> Itewe káriq anímárínká máhkétirapéq ogi ogionserah tahnsá ké wóe. Mó anímárínká mó anímárínsábé abiahnsa aritera sensabé, Igonkónúnaraq itega íre ábáhrowe. Ibitunátúnánúnaraq itega íre ibisahwe ewe. <sup>33</sup> Wání meri merini aní Sóniga suraitaq wega táhutahuq awehriéna náhníáq sera ano íre narainsabé itega abiahnsa ateq, Owainawanka wene arupipeq míéh aní míre atárówe. <sup>34</sup> Íné wehukení úku anínká surautaq táhutahuqkákáq náhníáq sera anonkakaq pehipi nogaq itega ínénsabe abiahnsa ainteq mahraréq, Tagaríáhiro. We uwoyansa kobuq kahburi aní áhnte nahníáq sera anonkakaq

pehipi neh aní míre. We táhkísi moné aebó kéreq mó ahabábáq kéreqne iyahnabo aní míre aintáhwe. <sup>35</sup> Itega ínénsabe mi ehwéh irarewara Maniká tagariáh kégá ahtebé sansánirataq mó kegá tagéra, Se aiq pútaq sansánowe ewe úwe.

*Sísane aigárátáq wéri abaq ato ehwéhne.*

<sup>36</sup> Peh morá Péhrásí ánínká Sísansabé, Ínéreq táhutahuroyehboq máho úwana Sísaga kérena wene nahtapeq ména táhutahurúwe. <sup>37</sup> Mi ke suwah-peqte íní we ahabábáq ini míowe. Mi inínká Sís mitaq míéhre u irena áhnte kawéq kúnkúni werí motóreipéq mewe súwana <sup>38</sup> Sís míowana mi inínká wene anehepeq sure wene aigárátáq tútuue ména we áhnte ibisó púana wene aqnu Sísane aigárátáq tabagu tabaguúwe. Miraúnsabe mi inínká wene íre wahto áyáhrátáté Sísane aigárátáq sorahruena wene aigárátáq nánkóqnéna wéri abaq atowe.

<sup>39</sup> Abaq atowana Sísansabé máho ú Pehrásí ánínká miraú tagéna wene arupipeq iwíáhéna, Mi inímé ahabábáq ini puana Sís Manikáne ehweh irari aní míéhtáq tahirímé we táhtoréh íní peh ahabábáq ini míre íwíáh irino úwe.

<sup>40</sup> Sísaga wene iwíáh irena wensabé, Sáímónio, pehgáriq ehwéh teawiníboq írátíahno úwana, Íwáhnoraníno, tenio úwe. <sup>41</sup> Úwana Sísaga mahraréna, Peh morá ánínká téhranité móne síátáire. Mó aní 100 Kína mó aní peh 10 Kína ue átáriagehéna síátáire. <sup>42</sup> Anehe mi anínká sensabé, Ínéga íátáu moné náníétao urairara mi anitégá móne tabonahuroya puara íre aweráhuroye. Íre aweráhuroyansabé móne síátái anínká sensabé,

Ínéga íátáu monéwé mó náníyehboq anetaníbo. Túbáhagotao teriátáire. Minayabe aneq iwíáhono? Móne síátái anínsábé ah anínká anotahtaq arutaboirire íwíáhono úwe.

<sup>43</sup> Úwana Sáímóniga Sísansabé, Áhnte moné merai anínká áwátái anínsábé anotahtaq arutaboirire. Áwátái anínká wéhuwa nániewé anetaníbo atarái puana anotahtaq arutaboirire úwe. Úwana Sísaga, Arega aiq iraréne éna <sup>44</sup> pabeqme mi iní tagéna Sáímóninsabé, Arewe mi iní aiq tagahno? Arene nahtapeq sutaq nigará pabeq paberé waní íre nániene. Mi inínká wene aqnuraté nigará pabeq paberaintena wene ayahrataté sobaruqnúéhre. <sup>45</sup> Arega íné íre nánkóqnáhne. Mi inínká áhntetaq nigará nánkóq nánkórire. <sup>46</sup> Arega niyahqnopeq wéri íre abaq intahne. Mi inínká nigarátáq kaweq kunkúni werí abaq intéhre. <sup>47</sup> Minayabe teawiníboq írátiahno. Mi inínká ínénsabe áhnte arútábóiraintéh púana wene áhnte ahbábáq kaweratóge. Peh táhmaro ahbábárirana Manikánka kawerato anínká wensabé pehgárita q arutaboiratéhre éna <sup>48</sup> mi inínsábé, Arene ahbabáq aiq kaweratóge úwe. <sup>49</sup> Úwara mó táhutihuru kegá seye náhenéra, Arene ahbabáq aiq kaweratóge irari anímé árahue mirainkehbo uwana <sup>50</sup> Sísaga mi inínsábé arega ínénsabe aiq pútare aintahnaga arene ahbabáqmari aiq kaweratóge. Pehwehrue pokéwahno úwe.

## 8

*Táhmaro inínsónká Sísá kéro ehwehne.*

<sup>1</sup> Mó tanáhráq Sísaga anotah matábúrápéqkákáq mó kehiná mó kehiná suwahpeqkákáq ah nogena

Manikánka wahnah wahnahnirabeqte éhwéh mi kawéq éhwéh síwáhnorúwe. Airápété téhranité we kéro ke kérovara <sup>2</sup> kawerarito inínsónseqka moq kérowe. Menah se awahreuwara owainawamarínká se síwíoqnówana Sísaga sene awahre kaweraritena owainawamarí kaqsuowe. Mi inínsó síwíqmarimé mó iní wenáwíq Máhríae. Wene iyahnaboga wensabé Mágára iníne ue áwíratówe. Menah Sísaga mi ininé arupipeqté airápété téhtaré ówáínáwá kaqauwowe. <sup>3</sup> Mó iní Kúsane ahre wenáwíq Sóánae. Wenawehqka Érótime arambehri keraq wahnahnú aníne. Mó iní wenáwíq Súsánae. Sereq áhnte mó inínsónseqka Sísareq we kéro kereq séhréh aritera kirabo arítówe. Sísaga ehweh síwáhnorinieéna ah noguwara mi inínsónká séhréh aritaneheéra kérowe.

*Ayu suitabéyabe pabeqme ehwéhne.  
(Mátíyu 13.1-9; Máhka 4.1-9)*

<sup>4</sup> Mó tahunírápéqté ké mó tahunírápéqté kéue íregárita q kegá séra Sísaba sáhuríówe. Áhnte kegá momiwíuríóta q Sísaga mah pabéqmé éhwéh mahraréna, <sup>5</sup> Ayu suitabeh anínká ayu suitabanieéna pokire. Suitabehta q mó ayú ahtapeq megirana wehekeqká abasaráhwana kabaranka sésiq nehre.

<sup>6</sup> Mó ayú kirura q megirana kiapoue kirena mi marákó íre tantani puana ehyatagire.

<sup>7</sup> Mó ayú náwerarúítá q megirana náwe kirena kárígariirana íre kawerue kirena sera íre íyéhre.

<sup>8</sup> Mó ayú kaweq marákórá q megirana kiapoue kirena áhnte será iratanire úwe. Sísaga mah

pabéqmé éhwéh teriena anehe mi keyábé, Íre parosa áhréákáq kéo, kawerue íráhro úwe.

*Sísaga moke pabeqme ehwéh teriu ehwéhne.  
(Mátíyu 13.10-17; Máhka 4.10-12)*

<sup>9</sup> Sísá kéro kega wensabé, Mah pabéqmé éhwéhmé áwahe teio uwe. <sup>10</sup>Uwana Sísaga sensabé, Manikánka wahnah wahnahnirabeqte éhwéhmé áwahe ite sokigi aiena mó peh pabeqme ehwéh teri terinuge. Minayabe ínégá pabeqme ehwéh irarutaq mó kegá siuranka tagéra peh morá sirupipeq íre tagariahrahowe. Sene siahrega irera peh morá sirupipeq íre írátiahrahowe úwe. *(Aisaia 6.9-10)*

*Sísaga ayunsabe éhwéh áwahe pahsuo ehwéhne.  
(Mátíyu 13.18-23; Máhka 4.13-20)*

<sup>11</sup> Sísaga mó mahraréna, Mah pabéqmé éhwéh áwahe ahtebagehboq teiníe. Ayume Manikáne kaweq ehwéhne. <sup>12</sup> Ahtapeq megí ayúme wehukega Manikáne ehweh íráhwana owainawanka sirupipeqté mi kawéq éhwéh seaebóire. Segá mi ehwéhnsábé aiq pútare atehrana kawerarítéhneho éna aebóire.

<sup>13</sup> Kiruraq megí ayú kiapoinserah wehukega Manikáne ehweh irera sirupipeq eyoyóera apubúue kowe atáhwe. Manikáne ehwehnka sirupipeq íre ánú piéhnsábé pehgáriq tanáhráq sehgiówe. Áhwárawe tageh tanáhráq sega túbáh agéra Maniká áuwáhwe.

<sup>14</sup> Náwe tarúítáq megí ayúme wehukega Manikáne ehweh irera, Sehgienehe íwíáhéra mó tanáhráqmé sene arambehriyabé iwíáh kikiréra ménsámehnsánsabe sirutaboirá seyega

sirutaboiro naneqmarínsábé iwíáh íwíáhowe. Náwe soaginserah minawarinká saiqnariéh púana sega Manikáne arambehri íre miraorahowe.

<sup>15</sup> Kaweq marákóráq megi ayúmé wehukega Manikáne ehweh irera sirupipeq ambubu atawéra tábúsoqme iwíáhowe. Kaweq marákóráq kaweq será íyéhnserah sega Manikáne arambehri kawerue miraowe úwe.

*Wehukega áráhmu keqmaráhtáq íre akariaráhnsábé pabeqme ehwéhne.*

*(Mátíyu 5.14-16; Máhka 4.21-25)*

<sup>16</sup> Sísaga mó pabeqme ehwéh síwáhnoréna, Wehukega áráhmu keqmaráhtáq párétahraté íre akariaráhwe. Máhriq tahbé tehnopeq íre maráhwe. Írakaumo. Nahupeq kira kegá kawerue tagageheéra tahberapeq maráhwe. <sup>17</sup> Moke kopípéq kéh náneqme mókake ábóraq kanae. Kopípéq mirao sansá mókake téhráhnarabeq ábóraragínara tagagehe. <sup>18</sup> Matíéh ání Manikánka mó náwinkéhe. Íre matíéh ánímé Manikánka wene pehgáriq naneq meyankéhe úwe.\*

*Sísane anowaréh ábákawaréhwe inseréhbo i ehwéhne.*

*(Mátíyu 12.46-50; Máhka 3.31-35)*

<sup>19</sup> Sísane anowareq ábákawaréhreqka weba séra nah kígiunsabe íre kioráhuwe. <sup>20</sup> Minayabe mó anínká Sísansabé, Arenanoreq arenábáqmarinseq máhpeq méra are tagéyabe suwahbehre úwe.

---

\* **8:18:** Manikáne sansá kawerue sehgi ánímé Manikánka séhréh atahnana wega wene sánsá mó ahtebahhire. Wene sánsá íre kawerue sehgi ání Manikánka we ahtebah naneq meyankéhe.

21 Úwana Sísaga mitaq míó keyabé, Manikáne ehweh irera sehgió kéwé náninoreq náníbáqmarinseq móe úwe.

*Sísaga irarúnka anotah soiríq táqnáigú ehwehne.  
(Mátíyu 8.23-27; Máhka 4.35-41)*

22 Mó wehekáh Sísaga we kéro keyabé, Seberaebéq pokonehe úwara sípi kéwewera pokuwe. 23 Sísaga sípiipéq sugowana anotah soirirúwe. Anotah soirirúwana nonaburóróúwana wáninka sípiipéq kiegambéh agu aguúwana sípi wánípipeq tupekinaúwe. 24 Minayabe we kéro kega Sísaga iriatera wensabé, Itene Wahnahno, ite pukoneheúne uwana Sísaga irigéna sóiriqsabé, Táqnáigúno éna wánínsabe, Túbáh agúno úwana sóiriqka táqnáigúwana wáninka túbáh agúwe. 25 Túbáh agúwana Sísaga we kéro keyabé, Aneqsabé íre aiq pútare aintaho úwara sega áhtenue áhreéra seye náhenéra, Mah aní insebo? Wega sóiriqkakáq wáninkakaqsabé ehweh atéhraña wene ehweh íréhre uwe.

*Sísaga owainawamarí kaqsuo ehwéhne.  
(Mátíyu 8.28-34; Máhka 5.1-20)*

26 Sísarehga sípi kéwewera kure Kehrari kawéhú seberaebéq Kérása kené marakórápéq kuwe.† 27 Sísaga áhnopeq kútaq mibeqté áni owainawanka subiqmaq subiqmarú anínseq piehgúye. Íre wahto tanáhráq pehrákora mía míaéna nahtapeq íre kaena peh wehuke maisia ónápíépéq kaegaeúwe. 28 Mi anínká Sísaga tagotaq kareéna arehunseraráq

---

† 8:26: Kérása marakó mó awíq kéhre. Mátíyuga sehiranú pukúipéq marakó awíq Káráae kéhre. Mátíyu 8.28 tagáhno.

ména ehwehnabaéna, Sísao, are íópeqté Manikáne ahninkáwá wóne. Aneraintaníbo éna kamah aníneho úwe. <sup>29</sup> Úwana Sísaga owainawansabé, Auwe pokúno atonsabe wega aneraintaníbo úwe. Ahriahri owainawanka mi aní subiqmaq subiqmarúnsabe uwoyansa aní úkúwara wehukega táhtoqme séniraté wene ayahnkaratáq aigárátáq táhru táhruarówe. Táhru táhruarówana sení suraqsuq suraqsurúwana owainawanka mi aní abatapi kaqsuq kaqsurúwe.

<sup>30</sup> Anehe Sísaga wensabé, Arenáwíq inesebo úwana néníwíqmé Íregáritare úwe. Áhnte owáínáwámárínká wene arupipeq míónsabe mi ehwéh irarúwe. <sup>31</sup> Owainawamarínká Sísansabé, Íre ambarúnkákáq mátáípéq eqmaq iuwehneho éra pagu pagunuwe.

<sup>32</sup> Íregáritaq poeráhqmárínká wahtotaq sáwéhrapeq náwe sahtaqme nowara owainawamarínká Sísansabé, Póeráhqmariné sirupipeq eqmaq iuwo éra pagu pagunuwana kowe aritowe.

<sup>33</sup> Kowe aritowara owainawamarínká mi aní auwera póeráhqmariné sirupipeq kowíówara moke mi kamárí sáwéhrapeqté pehbeheráh tunse mentúpipeq wánínkue pukuwe.

<sup>34</sup> Póeráhqtaq wahnahnu kegá tagéra pehbeheráh pokue sotápéq míó kereq sene nahtapeq míó kereq koreríúwara <sup>35</sup> seraganeheéra suwe. Sísaba suwana owainawamarí kaqauwo anínká kaweq iwíáhorahéna aneranerue Sísane aigárátáq tútuue míowara su kegá tagéra áhreuwe.

<sup>36</sup> Áhreuwara tago kegá kawerato ehweh su ke teríúwe. <sup>37</sup> Teríúwara moke Kérása marákórápéqté



kegá Sísaga miraúnsabe áhreu puara wensabé itene marakórapeq sue pokúno atówe. Atówana Sísaga sípiipéq kiasague pokinaútaq <sup>38</sup> owainawamarí kaqauwo anínká wensabé, Are kéraníe úwana Sísaga ahqáho atowe. <sup>39</sup> Ahqáho atena wensabé, Arenawahpeq pokue Manikánka kaweratéh éhwéh moke korerio úwana wega pokue moke wenawahpeqte ké Sísaga kawerato ehwéh koreriuwe.

*Sísaga awahre iní kaweratená ahrari oganúq ato ehwehne.*

*(Mátíyu 9.18-26; Máhka 5.21-43)*

<sup>40</sup> Sísaga mó seberaebéq seuwekúwara mitaq míó kega we áwénunu puara wega súnsabe iwíáh iwíáhuwe. <sup>41</sup> Asiu kené momiwí nahtápéqté wáhnáh ání Sáírúsaga Sísaba séna Sísane aigárápí káuqmunue arehunseraráq ména wensabé, Nániyahu pukinainsabé néne nahtapeq segawerato éna pagu pagunúwe. <sup>42</sup> Mi ahráriwé wene peh morá ánínéna anotah ahrári airápété téhtaré ópéq ména pukinaúwe.

Pukinaúwana Sísaga abowá kérowara áhnte mó kegá kígiue moraráq ahtapeq kuwe. <sup>43</sup> Ahtapeq kuwana awahre iní airápété téhtaré ópéq wene korahq íre taraqnágia peh tuerueúwe. Sóteh kegá íre kawerarahráhu puana mi awáhré peh kowe. <sup>44</sup> Wegá Sísá anehepeq sure wene korósi ayehrápéq koráhtorotaq wene korahq apubúue taraqnágúwe.

<sup>45</sup> Sísaga, Néne korósi insega táhtorehro úwara ómi míó kega, Írakaumo uwana Pítaga wensabé, Néne Wahnahno, áhnte kegá are pagume se mino úwe. <sup>46</sup> Úwana Sísaga, Íné tagaríomé mó anínká íné

táhtoréhre. Néne págege mó anípá pokirana tagoge úwe. <sup>47</sup> Úwana kawerato inínká, We aiq tagariéhre éna weba sure iransánéna káuqmunurawéna Sísaga apubúue kawerato ehwéh irarúwara ómi kegá írówe. <sup>48</sup> Írówana Sísaga wensabé, Arega aiq pútare aintahnaga kaweratóge. Pehwehrue pokéwahno úwe.

<sup>49</sup> Pehwehrue pokéwahno teawutaq wahnah aniné nahtapeqté ánínká sure abowánsabé, Areniyahu aiq pukinsabé síwáhnori aní mó íre pagu pagunúno teawuwe. <sup>50</sup> Teawuwana Sísaga sene ehweh irena wahnah ánínsabé, Íre áhreúno. Peh aiq pútare aintehnana we kaweraginawire éna <sup>51</sup> wahnah aniné nahtapeq kútaq ómi mó keyábé, Máhpeq míáhro aritowe. Peh morá Pítareq Sónireq Sémisireq ahrarine anoiboreq meriqmena nahupeq kibekuwe. <sup>52</sup> Áhnte kegá mi ahráryábé ibiséra ibitunátúnánuwana Sísaga sensabé, Íre ibisahro. We íre airaiq pukia peh súdehre úwara, <sup>53</sup> we airaiq pukire íwíáhu puara Sísansabé awiréh atówe. <sup>54</sup> Awiréh atówana Sísaga wene ayahnkara táhtotawéna wensabé, Ahrario, irigúno atowana <sup>55</sup> oga úkéna apubúue iriwe míowe. Apubúue iriwe míowana Sísaga wenanoibonsabé, Táhutahuq náwétao aritowara <sup>56</sup> sega áhtenuyana Sísaga sensabé págegeue teriena, Mahnayabe mó ke teriyeho úwe.

## 9

*Sísaga we kéro ke arambehriraq eqmaq suo ehwehne.*

*(Mátíyu 10.5-15; Máhka 6.7-13)*

1 Sísaga we kéro ke airápété téhranítéyábé síáhrabéna sega owainawamarí kaqsuera awahre ke kaweraritageheéna págege aritena mi arámbéhrí miraoro aritowe. 2 Miraoro aritena sensabé, Manikánka wahnah wahnahnirabeqte éhwéh síwáhnoréq awahre ke kawerarítáhro aritowe. 3 Wega mó mahraréna, Ah nogoneheéq mewe nógó náneq íre meyáhro. Pegiqnáh karamé unahmé táhutahuqme mónewe mó siotíwé íre meyáhro. 4 Itega Manikáne ehweh síwáhnoroneheéq mó ke suwahpeq kirataq peh morá ániné nahupeq kaegaeéq arambehri parabaruéhrataqmé mitaq sueq mó ke suwahpeq pokigehe. 5 Mó kehiná suwahpeqte kégá íre mehweh aitéhrataq sega íre kaweq sansá miraonsabé ahtebageheéq sega tagehrataq igárátáq kahna tanáhúq poruarúáhro úwe. 6 Úwara we kéro kega pokue mó kehiná suwahpeq mó kehiná suwahperue síwáhnoroneheéra poké aguwe. Sega móke mi kehiná kéhíná suwahpeq Manikáne kaweq ehwéh teri terinéra awahre ke kawerarítówe.

*Érótiga Sísá éhweh irena we insebo ue kasenú ehwehne.*

*(Mátíyu 14.1-2; Máhka 6.14-16)*

7 Anotah wahnáh aní Érótiga Sísá éhweh irena áhnte iwíáhúwe. Áhnte iwíáhúwara mó kegá Sísansabé, We wání meri merini aní Sónie. Sóni pukéna oga úkéna amahnága míéhre uwara 8 mó kegá, We Éráísae. Éráísa amahnága ábóraragire uwara mó kegá, We Manikáne ehweh irarú anine. We naho pukú aní iriwe oganúkuraire

uwe. <sup>9</sup> Uwana Érótiga sene ehweh irena wega mahraréna, Sóni ínégá ayahqno kiraq áwátáu aní aiq pukuraire. Minayabe amahnága sega mó arámbéhri mó arámbéhriue miraire e anímé insebo úwe. Insebo éna Sísá taganie íwiáhúwe.

*Sísaga 5 táhúséni (5,000) weh kiraboú ehwehne.  
(Mátíyu 14.13-21; Máhka 6.30-44; Sóni 6.1-13)*

<sup>10</sup> Sísá kéro kega weba kouwekéra moke mirau arámbéhri teawúwe. Teawúwana Sísaga Pétásáira suwahpeq sebataq míaneheéna se meriqmena pokúwe. <sup>11</sup> Áhnte mó kegá, Sísá Pétásáira suwahpeq pokire uwara irera we anehe kaqmera pokuwe. Pokéra weba suwana Sísaga se mehweh aritena Manikánka wahnah wahnahnirabeqte éhwéh teriena awahre ke kaweraritowe.

<sup>12</sup> Íó tupekinaútaq Sísá kéro kega weba séra wensabé, Mahtaq abatapi púah mah ke kaweqtapéq kogaera táhutahuq meyageheé wahtotaq kehiná suwahpeq eqmaq suo uwe.

<sup>13</sup> Uwana Sísaga sensabé, Itewe mi ke kirabooro úwe. Kirabooro úwara wensabé, Ite peh moberíáh páretíákáq téhtaré páhnikákáq mationa puag moke mah kegá nehransabé táhutahuq kobaiqmaranéhnkono uwe. <sup>14</sup> Áhnte 5 táhúséni (5,000) weh míónsabe sega mi ehwéh iraruwe.

Sísaga we kéro keyabé, Saime mó ke mópi tútuue míehrara mó ke mópi tútuue míáhro arítáhro úwara <sup>15</sup> sega mirauwara moke míó kega tútuue míówe. <sup>16</sup> Sísaga mi mobériáh páretíákáq téhtaré páhnikákáq mewena íópeq tagéna Manikánsabe, Kaweróne atena mi tahutáhúq keqme we kéro kega kiraboigeheéna náriuwe. <sup>17</sup> Náriúwara ómiga

nowana siyahbankirowe. Siyahbankirowara arahqmé airápété téhtaré páhsíkéti úsawe obenkíq márówe.

*Pítaga Sísansabé, Are Karáhé wóne ú ehwehne.  
(Mátíyu 16.13-19; Máhka 8.27-29)*

<sup>18</sup> Mó tanáhráq Sísaga webataq púrerúwara we kéro kega weba suwana wega sensabé kasenána, Mó kegá ínénsabe inse aintaho úwe. <sup>19</sup> Úwara, Arensabé mó kegá, Sóni wání meri merini aní míre ewe. Mó kegá arensabé, Éráisa wire ewe. Mó kegá arensabé, Manikáne ehweh naho iraré oga úkurona aní móne ewe uwe. <sup>20</sup> Uwana Sísaga sensabé, Itega ínénsabe inse aintaho úwana Pítaga wensabé, Arewé Manikánka ite meirena kawerai-tankeheéna omaq ato aní móne úwe.

*Sísaga, Íné pukéna oga úkinauge ú ehwehne.  
(Mátíyu 16.20-28; Máhka 8.30-9.1)*

<sup>21</sup> Sísaga we kéro keyabé, Ínéwé Manikánka omaq ato aní míre mó ke teríyeho úwe. <sup>22</sup> Teríyeho éna mó mahraréna, Íné wehukení úku aní níwíoqnaneherawoe. Asiu kené abowah wehreq Manikáne ehweh mibeq mahbeq arítáh kéreq Mósísine ehweh síwáhnoro kereqka ínénsabe, Iuwahriehre éra nubiq suaneherawoe. Nubiq suehrana íné pukéna apahtáro wéhékáhtáq iriwe oga úkinauge úwe.

<sup>23</sup> Sísaga mó ite we kérahwána keyabé mahraréna, Íné sénireyabe awahbeh aníno, arerene awahbeh iwíáh suo. Manikáne arambehri mira aruqarurunsabé sega íné awankátaq táhparagéhe. Ínéga miraunserah miraue séniro. <sup>24</sup> Wewensabé

arutaboirena peh wewene awahbeh iwíáh mira aruqaruri anímé oga mérapeq íre awaq miahráhire. Néne sánsá sehginieéna wewe awahbeh iwíáh susuri anímé oga mérapeq awaq miankéhe. <sup>25</sup> Wehukenínká moke mah marákóipéqté ménsáméhnsá matíéhtáq tahirímé oga mérapeq íre awaq miahnaraqmé mi mensáméhnsánká árahue séhréh atéh iripo?

<sup>26</sup> Ínénsabeakáq néne ehwehnsabéákáq ayehiteh aní iné wehukení úku anínká túónagake wensabé moq niyehitanawire. Íópeqté kéreq Nániboreq inéreqne patahga tahnsa téhreh naneqkakáq túónagake mi anínsábé niyehitanawire. <sup>27</sup> Teiníboq íratíáhro. Táhmaro ite iriwe míona ke pehipi íre pukigehe. Ebeqme Manikánka wahnah wahnahní tagéq anehe pukigehe úwe.

*Sísane auranabiah mó kugú agú ehwehne.  
(Mátíyu 17.1-13; Máhka 9.2-13)*

<sup>28</sup> Sísaga síwáhnorúwana abapete morá wéhékáh parabagúwana wega sáwéhrapeq púrerinieéna Pítareh Sónireh Sémísireh meriqmena kiuwe. <sup>29</sup> Wega púrerútaq wene auranabiah mó kugú, kaweq kugú agúwana wene korósi téhreh naneq tahnsánue anotah tabérábé agúwe. <sup>30</sup> Anotah tabérábé agúwara Mósísireq Éráisareqka íópeqté tunse ábóraragéra Sísareq ehwehnuwe. <sup>31</sup> Mi anitégá Manikáne téhreh naneqtaté awahrirue méra Sísá Sarúsarama suwahpeq pukinaú ehwéh iraruye. <sup>32</sup> Iraruyara Pítarehga surahpeq méra irigéra Sísane patahga tahnsani naneq tagéra Sísareq míóya anité tagowe. <sup>33</sup> Mi anitégá Sísá

auwera pokoyeherauyataq Pítaga Sísansabé, Íwáhnoraníno, ite mahtaq mionayabé aiq kawerire. Apahtáro úqna pearnéhe. Arene morá Mósísine morá Éráísane moráue pearnéhe úwe. Pítaga mi ehwéhnsabé íre iwíáhia pehipi irarúwe.

<sup>34</sup> Irarútaq írabúyánka seúbítáwéna Sísá kéro anító akariuriowara sega áhreuwe. <sup>35</sup> Áhreuwana írabúyápipeqté éhwéhnká mahraréna,

Mah anímé nénahni míre. We omaq atóge. Wene ehweh íráhro úwe.

<sup>36</sup> Wene ehweh íráhro úwana Sísá webataq míowara tagowe. Sísá kéro anítógá minayabe ehiya méra mi tanáhráq se tago naneq mó ke íre teríúwe.

*Sísaga owainawa kaqauwena animai kawerato ehwehne.*

*(Mátíyu 17.14-21; Máhka 9.14-29)*

<sup>37</sup> Ahbiah tahnsá sega sáwéhrapeq suera túwara áhnte kegá Sísareq piehgíúwe. <sup>38</sup> Se míórabeqte wéhgá anotah ehwéhnue mahraréna, Íwáhnoraníno, nénahnimé peh morá áni míéhre. We tagáhno. <sup>39</sup> Owainawanka we subiqmaréhtáq kare aruqarurire. Owainawanka áwíoqneh puana iransá iransánéna wene áwéhipeqté arehya kíobi aruqarurire. Wega áhnte subiqmaq subiqmaréna íre apubúue soraq áúwéhre. <sup>40</sup> Are kéréh keyábé, Kaqauwáhro éna pagu pagunugarawe sega íre miraorahowe úwe.

<sup>41</sup> Íre miraorahowe úwana Sísaga míó keyabé, Ite íre aiq pútare ainteq saiyo ke wóe. Iteba mía míaume ahkake awehraq kanabo? Itega miraonsabé nirupipeq umehime ahkake parabaginabo éna abowansabé, Arenahni ínéba

meqme súno úwe. <sup>42</sup> Úwana abowágá wenahni meqme sútaq owainawanka we subiqmarena kúrugúru atowana Sísaga owainawansabé, Auwe pokúno atena mi aní kaweratena wenaboba atowe. <sup>43</sup> Manikánka Sísá págegeue séhréh atowara tago kegá minayabe áhtenuwe.

*Sísaga, Íné pukéna oga úkinauge mónkakáq irarú ehwehne.*

*(Mátíyu 17.22-23; Máhka 9.30-32)*

Sísaga moke miraú naneqsabé tago kegá áhtenutaq wega we kéro keyabé, <sup>44</sup> Ínéga teiéna ehwéh iwíáhue tagahro. Íné wehukení úku aní móintagéhe úwara <sup>45</sup> sega mi ehwéh íre ahtebowe. Mi tanáhráq mi ehwéh áwahewé sirupipeq íre iwíáhuwe. Minayabe se íre ahtebéra kasenényabe áhreuwe.

*Anotah anímé insebo i ehwéhne.*

*(Mátíyu 18.1-5; Máhka 9.33-37)*

<sup>46</sup> Sísá kéro kega mó anínká mó anínkáue, Íné anotah aní ite kiotaigme aní múge iraréra ehwehuwe. <sup>47</sup> Sísawe sene sirupipeqté iwíáh tagéna káriq aní meqmena we míorabeq iriwe atena <sup>48</sup> sensabé, Ínénsabe arutaboiraintena mahna tahnsa káriq aní séhréh atéh ánínká íné moq séhréh aintéhre. Íné séhréh aintéh ánínká íné eqmaq núwéh ánínseq séhréh atéhre. Íné pehgáriq aní múge iwíáhi anínká anotah aní ména mó ke kiotaikire úwe.

*Íre itene naruo aní míéh anímé itene iyahnabo aní míre ú ehwehne.*

*(Máhka 9.38-40)*



49 Sóniga Sísansabé, Íwáhnoraníno, mó anínká arenáwírue owainawamarí kaqsúéhraq tagéq ahqáho atone. Wega ite íre séiréhnsábé ahqáho atone úwe. 50 Úwana Sísaga wensabé, Íre ahqáho atáhro. Íre itene naruo aní míéh ánimé itene iyahnabo aní mire úwe.

*Sámária kegá Sísansabé ahqáho ató ehwehne.*

51 Manikánka Sísá íópeq tumeranaína tanáhráq wahtonúnsabe Sísaga, Sarúsarama suwahpeq pokinauge íwíáhúwe. 52 Sega káénarabeq kaweraitageheéna Sísaga wehuke Sámária suwahpeq eqmaq suowara sega kaweraritaneheéra mibeq pokuwe. 53 Mibeqté kégá, Sísá Sarúsarama suwahpeq pokinawire u író púara wensabé íre mehweh atówe. 54 Íre mehweh atówara Sémísireq Sónireqka minayabe irera Sísansabé, Itene Wahnahno, íópeqté sokaeqsuahnaga mah ke tabipáhrue anehinsagigeheéq tabipáhraru irareyehnkoyo uye. 55 Uyana Sísaga ebeq kένα pabeqme se tagéna, Ahqáho. Íre kaweq ehwehnóye úwe. 56 Sega mitaq suera mó kehíná suwahpeq pokuwe.

*Sísaga we kéreyabe irarú ehwehne.  
(Mátíyu 8.19-22)*

57 Sega ahtapeq pokue mó anínká Sísansabé, Are pokónarabeq kéraníe úwana 58 Sísaga wensabé, Úrinsi iáné nahme ebahnarahpipeq kéhre. Kabarane nahme sehwerapeq kéhre. Íné wehukení úku ánimé néne nahme íre kéhre úwe.

59 Sísaga mó anínsábé, Séniro úwana, Ebeqme nánibo pukinana komaisarena anehe kéraníe úwe.

60 Úwana Sísaga wensabé, Pusa kégá pukira ke maisaragéhboq arewe Manikánka wahnah wahnahnirabeqte éhwéh kosíwáhnorúno úwe.\*

61 Mó anínká Sísansabé, Anotah aníno, íné are k éraníe éna téhwe nánuwahrahyabé iroro koaritanínkono úwana 62 Sísaga wensabé, Soberi anínká anehepeq pabeqme taga tagaínaraqmé Manikánka wahnah wahnahnirabeqte árámbehri íre mirao-rahire úwe.

## 10

*Sísaga 72 wehekéq eqmaranaútaq teriu ehwéhne.*

1 Mó tanáhráq Sísaga 72 wehekéq omaq sitena téhraníté téhranítéue moke mó kehiná suwahpeqkakáq sene marakóakaq we mótaq pokinaúrabeq eqmaq suowe. 2 Eqmaq suanaútaq wega pabeqme ehwéh mahraréna, Sotápéqté ménsáméhnsá moke nera kéhrara íre áhnte kegá koawaqmianeheéra pokowe. Minayabe sotápéqté wáhnáhnsábé, Arene nera k éh ménsáméhnsá arambehri kegá koawaqmiageheéq eqmaq sueq púreroro.

3 Sipisípiq áráhqmarinká úrinsi iámárinká nogórabeq nogónserah ite subiq suahráho ke miáhrabeq eqmaq suaníe. 4 Móne unáhmé unahnúrámé súwe íre meyáhro. Ahtapeq mó ke piehgírataq íre mehweh arítáhro. 5 Nahupeq kibekirataq mibeqté keyábé pehwehrue miáhro arito. 6 Uwaresa aní nahupeq míéhnaraq itene ehweh irankéhe. Uwaresa aní íre míéhrataq itene

---

\* **9:60:** Sísaga pusa keyábé irarúmé áwahewé sene sirupipeqté síwá pusa ké tahnsa miáh keyábé irarúwe.

kaweq ehwéhnká iteba kowekinkehe. <sup>7</sup> Manikáne arambehri mirao puaq itega kibekira nahtápéq kaeareq sega náira tahutáhúq pehipi nahro. Peh morá mi nahupéq kaegaeoro. Séhréh aritéh kégá arambehri aní awehraq apéq náwigéhe. Minayabe ite íre matíéhra naneq náigéhe úwe.

<sup>8</sup> Náigéhe éna, Itega mó ke suwahpeq kirara mehweh aitera náira tahutáhúq pehipi nahro. <sup>9</sup> Mitaqté áwáhré ké kawerariteq sensabé, Manikánka wahnah wahnahnirabeq iteba wahtotaragire. <sup>10</sup> Mó ke suwahpeq kirara sega íre mehweh aitéhrataq mibeqté wahba áhtápéqmé iriwe méq mahraréq, <sup>11</sup> Itewe ahtebageheéq mahtaqté tánáhúq, igárátáq kéh tánáhúq poruaruanehe oro. Manikánka wahnah wahnahnirabeq iteba wahtotarire. Minayabe iahreraq matíáhro teriéro. <sup>12</sup> Teiníboq írátíáhro. Manikánka ehweh aritahna tanáhráq Sóróma suwahpeqte áhbabáq kéwé ákáhtaq kamah arinkéhe. Itega tanahuq poruarueq mi ehwéh terié kéwé anotahtaq kamah arinkéhe úwe.

*Sísaga, Kamah ainehboq kawerurero ú ehwehne.  
(Mátíyu 11.20-24)*

<sup>13</sup> Sísaga mó mahraréna, Kórásini suwahpeqte kéreq Pétásáira suwahpeqte kéro, kamah ainehboq kawerurero. Iteruwahpeq áhnte otáq sánsá miraurage. Táíya suwahpeqte kéreq Sáíróna suwahpeqte kéreqka mina tagotaq tahirímé sene ahbabáq naho suera kaweqtaq míó irino. Segá mina tagotaq tahirímé sene ahbabáq aiq súónsabe Manikánka tagankeheéra nahonáh kórósí aneranerue tanah abaq marera sene ahbabáqsabe

tútuue ibiso irino. <sup>14</sup> Minayabe Manikánka ehweh aitahna tanáhráq mi keyábé peh ákáhtaq kamáh arinkéhe. Mi tanáhráq ite Kórásíni suwahpeqte kéreq Pétásáira suwahpeqte kéreqme anotah-taq kamah ainawire. <sup>15</sup> Kápénéáma suwahpeqte kéó, ite kaweq ke míone éq minayabe íópeqté mátábúrápéq kioneheqmúne íwíáhoo? Írakaumo. Mibeq íre kioneheqmóe. Peh iraipéq kowíáhro aitanawire úwe.

<sup>16</sup> Sísaga eqmaq suanaú keyabé mó mahraréna, Itene ehweh íráh kéwé néne ehweh moq íráhwe. Itensabé ahqáho aítáh kéwé ínénsabe moq ahqáho aintáhwe. Ínénsabe ahqáho aintáh kéwé íné eqmaq núwéh ánínsábé moq ahqáho atáhwe úwe.

*Sísaga eqmaq suo kega kouweku ehwéhne.*

<sup>17</sup> Sísaga omaq sitena eqmaq suo kega sirupipeq eyoyóue weba kouwekéra wensabé, Itene Wahnahno, arenáwírue owainawamarínsábé pokurero aritonara apubúue poku pokuowe uwe. <sup>18</sup> Uwana Sísaga sensabé, Sokaeqsúéhnká téhrehnserahnue owainawamaríné wahnah wenáwíq Séténi íópeqté tunse inahsubuwana tagahwae. <sup>19</sup> Írátiáhro. Ínéga págege aító púaq itega wehenkakáq tobinahránkakaq abasawe itene naruo aní owainawa kiotaikigehe. Mó naneqka ite íre ahbabáraitahráhire. <sup>20</sup> Itega owainawamarínsábé miraoro e ehwéh íráhnsábé íre iwíáh íwíáhoró. Peh íópeq Manikánka iteíwíq wene púkuipéq aiq sehíranurainsabé iwíáh íwíáhoró úwe.

*Sísaga iwíáh iwíáhéna Maniká Iteribonsabé kaweróne ato ehwéhne.*

*(Mátíyu 11.25-27, 13.16-17)*

<sup>21</sup> Mi tanáhráq Manikáne Awanka Sísane arupipeq eyoyó atowana mahraréna, Nániboo, arega íópeqkákáq mah marákó márakóákáq wahnahnóne. Wehukene sánsá ahtebah kewé arene sánsá íre sokigi ariasa peh morá káriq aní tahnsa ké arene sánsá aiq sokigi ariene. Minayabe arensabé iwíáh iwíáh atóge. Nániboo, arerega iwíáhue aiq miraóne.

<sup>22</sup> Aiq miraóne éna mitaq míáh keyabé, Nániboga moke aiq náníre. Mó kegá íné Manikáne ahninkáwá íre tábúsoqme tagariáhwana Nániboga we-bataq íné wenahni tagariéhre. Mó kegá Nánibo íre tagariáhwana ínébataq wenahninká we tagarióge. Íné wenahninká we sokigi aiéna kegá moq Maniká Nánibo tagariagehe úwe.

<sup>23</sup> Sísaga pabeqme we kéro keyabé epéq teriena, Itene iuranka áhntetaq tagahnsabe iwíáh iwíáhoro.

<sup>24</sup> Teiníboq írátíáhro. Áhnte Manikáne ehweh iraru kereq anotah wahnáh kéreqka itega tagah naneq tagéyabe suwabhówara íre tagowe. Sega itega íráh éhwéhnsabé ireyabe suwabhówara íre írówe úwe.

*Sísaga, Wáhnaupéqté keyábé moq irutaboiroro ú ehwehne.*

<sup>25</sup> Mósísine ehweh síwáhnori anínká séna Sísaga ahbabáq ehweh irarinkeheéna áhwárawe tagéna kasenúwe. Kasenéna, Íwáhnoraníno, oga mérapeq awaq mianíboq anerininkono úwana

<sup>26</sup> Sísaga wensabé, Mósísiga sehgióro ú ehwehniká anereiro? Minawé arene arupipeq aiq ahtebahno

úwana <sup>27</sup> mi anínká mahraréna, Maniká itene Wahnahnsabé anotahtaḡ arutaboírúno. Moke arene arupipeḡkákáḡ moke arenawankakáḡ moke arene iwíáhónaipéḡkákáḡ Manikánsabe arutaboírúno. Arerensabé arutaboírónanserah arene iyahnabo anínsabé moḡ arutaboírúno ire úwana <sup>28</sup> Sísaga wensabé, Arega aiḡ tábúsoḡme iraréne. Tenienanserah mirainaraqmé oga mía mǎiniewóne úwe.

<sup>29</sup> Mi anínká iwíáhéna, Sísaga íné Mósísine ehweh íre kawerue íréhre iwíáhíneho éna wega Sísansabé, Néne iyahnabo aní insebo kasenúwe. <sup>30</sup> Kasenúwana Sísaga wensabé, Wehga Sarúsarama suwahpeḡ suena Séríko suwahpeḡte áhtápéḡ tutairara aebó kéḡá mehwatawéra táhtoḡme subiqmarera wene ménsámehnsá moke sabiwera pokurowe. Anotahtaḡ subiqmato puana pukinauraitaḡ we íre nogoráhéna peḡ ahnayehráḡ tahperuriaraire. <sup>31</sup> Tahperuriarairana Manikáne ehweh mibeḡ mahbeḡ arítéh ánínká tunse mi aní tagéna ébeḡ ayéhrápéḡtáḡ sótaikue pokuraire.

<sup>32</sup> Mina urainserah Asiu kené sánsá mirai aní we Áríwái kahnáh ánínká kire mi aní tagéna we moḡ ébeḡ ayéhrápéḡtáḡ sótaikue pokuraire.

<sup>33</sup> Sámária suwahpeḡte ánínká kire Asiu weh tagéna we ahnayehráḡ tahperuriarainsabé arutaboíréna <sup>34</sup> weba sure mayawenkakaḡ náhníáḡ sera anonkakaḡtáté puramburanútaḡ abaq atena airí atena mi weh pankeḡmaqme wene tónkine abobiahtaḡ tútu atowana mi kanká áhkokóuwena pokuuraire. Sámária suwahpeḡte ánínká mi weh meḡmena páhsíntía nahtápéḡ móatena mitaḡ wahnahnuraire. <sup>35</sup> Ahbiahraḡ mi

nahtápéqté wáhnáh téhtaré móné náwena wensabé, Subiqmato aní kawerue wahnahnatawéwahnó éna, Íné kouwekonaraq áwú móné íre awehraq kahnaraq mó awiníe uraire úwe.

<sup>36</sup> Sísaga mi ehwéh aiq teawena Mósísine ehweh síwáhnori anínsábé, Apahránítógá ahnayehráq subiqmato aní tagaronsabé wene iyahnabo aní insebo kasenúwe. <sup>37</sup> Kasenúwana mi anínká Sísansabé, Wene iyahnabo anímé wensabé arutaboiratena séhréh atéh áníne úwana Sísaga wensabé, Arega pokue séhréh atarái anínká miraurai serahnúno úwe.

*Sísaga Máhtareq Máhríareqne nahtapeq mío ehwéhne.*

<sup>38</sup> Sísareq we kéro kereqka pokue mó ke suwahpeq kuwana mibeqté íní wenáwíq Máhtaga Sísá mehweh atena wene nahtapeq meqmena móatowe. <sup>39</sup> Máhtane ónánahwá wenáwíq Máhríae. Máhríaga Sísane ehweh iranieéna wene aigárápi tútuue míowe. <sup>40</sup> Tútuue míowana Máhtaga táhutahuq kawerinieéna áhnte ahwímínú púana wene arupipeq iwíáh kikirúwe. Iwíáh kikiréna Sísaba séna wensabé, Néne Wahnahno, nénónánahga núwéhraha áhnte ahwímínunsabé arega anetaníbo iwíáhono? Íné séhréh ato teawo úwe. <sup>41</sup> Teawo úwana Sísaga wensabé, Máhtao, arega áhnte ahwímínónayabé arene arupipeq iwíáh kikiróne. <sup>42</sup> Peh morá náneqsabé iwíáhúno. Máhríaga mina kiotaiki naneqsabé arutaboiréna aiq omaq maréhraq itega we íre saiqnariayehe úwe.

# 11

*Púrerirataq mahrarero ú ehwehne.  
(Mátíyu 6.9-15, 7.7-11)*

<sup>1</sup> Mó tanáhráq Sísaga móbeq ména púreréna parabagúwana we kéro anínká wensabé, Itene Wahnahno, Sóniga we kéréh keyábé púreq ehwéh síwáhnorurainserah íwáhnorúno úwe. <sup>2</sup> Úwana Sísaga sensabé, Púrerirataq mahrarero.

Iteriboo, arenáwíq pankerone.

Arega mah kehiná kéhíná wahnah wahnah ari-tahna tanáhráq apubúue ábóraragúno ato.

<sup>3</sup> Mó wehekáh mó wehekáhnue itene táhutahuq awehraq kirabo aito.

<sup>4</sup> Mó kegá ahbabáraitáhmé itega minayabe íre ahrreraq masa peh suone. Itega miraúnanserah itene ahbabáq moq íre ahrreraq matiahno.

Ahbabáqka ite saiqnariahrahiraq íre móito.

Miraue púreroro úwe.

<sup>5</sup> Sísaga we kéro keyabé mó mahraréna, Mó kehiná suwahpeqte arene iyahnabo anínká inokáhnabubu sínah are tópah tabonahinaraqmé anerinibo? Mi tanáhráq arenawahrah aniné nahtapeq pokue áhrabé, Irigue tópah nánio ue ineh inehinkehe. Ineh ineheé, <sup>6</sup> Néne iyahnabo anínká amahnága íre wahtopeqte sirana tópah tabonahunsabé iriwe tópah náninana kiraboono teawinkéhe. <sup>7</sup> Teawinana arenawahrah anínká wene máhriqpeqté iraréna, Ahqáho. Onsa aiq paiqmarena néne animárinseq sugonayabé túbáh agúno éna, Íre iriwe aweráhuge teawinkéhe. <sup>8</sup> Teawena, Inehi anímé nánuwahrah aní míéhsabé anetaníbo. Inokáhpeq puana íre náwiníe



íwíáhínaraqmé túbáh agineho. Túbáh aginehboq peh píribahriue, Nánio. Nánio úno. Nánio ínaraqmé arenawahrah anínká mó iwíáhéna are íre kéh náneqmarí irigue náwinkéhe. Mina inserah púrerirataqmé apubúue túbáh agiyehboq peh mótaq mótarue teawéro.

<sup>9</sup> Teiníboq írátíáhro. Itega púrerirataqmé náiyó ira naneq náinkéhe. Págegeue kabarirataq ábórarínaq taganeheqmóe. Onsaraq pakobakoirataq siitankéhe. <sup>10</sup> Nánio i anínká meyankehe. Kabari anínká ábóraq marankéhe. Onsaraq pakobakoi anímé Manikánka siatahnana nahupeq kibekinkehe úwe.

<sup>11</sup> Sísaga mó mahraréna, Arenahninká arensabé, Paseh nánio ínaraqmé arega wehe náwiníbo? Írakaumo. <sup>12</sup> Wega, Iyah oyérá nánio ínaraqmé tobinahrá náwiníbo? Írakaumo. <sup>13</sup> Ite sibowáreh ahbabároraho keéqmé itene animári peh kaweq naneq nári nárino mino. Íópeqté Ítéribógá íre ahbabárorahi aní ména Wenawa eqmaranae. Minayabe wensabé, Arenawa ínéba eqmaro irarinaraq areba eqmaranawire úwe.

*Owainawanka Sísá séhréh atéhre éra péhe éhwéh iraru ehwéhne.*

*(Mátíyu 12.22-30; Máhka 3.20-27)*

<sup>14</sup> Owainawanka wehukení subiqmaq subiqmarú púana we ahriahri íre ehwehno-rahúwe. Íre ehwehno-rahúwana Sísaga mi owáináwánsabé pokúno atowana pokúwana mi anínká ehwehnúwara áhnte tago kegá áhtenuwe. <sup>15</sup> Áhtenuwara mó kegá mahraréra, Owainawamaríné wahnah wenáwíq Pésébúriga

Sísa págege atena séhréh atéh púana wega owainawamarí kaqsuáhráhire éra seye náhenéra ehmuníq éhmúníruwe. <sup>16</sup> Ehmuniq éhmúníruwara mó kegá Sísa ahabárinkeheéra áhwárawe tagéra sega wensabé, Manikánka séhréh atahnaraqmé íópeqté íre tagariona naneq sokigi aio uwe. <sup>17</sup> Uwana Sísa sirupipeqté íwíáh tagéna sensabé, Wahba márakórápéqté kegá seye ebehirataq sainkoneherawoe. Minayabe se sainkéra págegeue morá ké íre míahrahowe. Sensuwahraheq seye ebehirataq sainkoneherawoe. Minayabe se moq págegeue morá ké íre míahrahowe. <sup>18</sup> Owainawanseq wenawahraheq ebehotaq tahirímé se sainkéra árahue págegeue míagehbo? Írakaumo. Íre págegeue míahrahowe. Itega péhe éhwéh mahraréq, Owainawamaríné wahnahnka íné séhréh aintéh púana owainawamarí kaqsuáhráhuge ewe. <sup>19</sup> Ínéga owainawa kaqsúótáq owainawane wahnahnka séhréh aintéhtáq tahirímé ite kéiráh kegá owainawa kaqsúáhtáq insega séhréh arítéh iripo? Ite kéiráh kegá itene ehwehnsabé íre tábúsoréhre aítáhwe. <sup>20</sup> Manikáne Awanka págege aintena séhréh aintéh púana owainawamarí kaqsuq kaqsuruge. Mina tagéq Manikánka wahnah wahnahni sansá iteba aiq sire éq tagaríáhwe úwe.

*Ayahnsa kira wéhyábé pabeqme ehwéhne.*

<sup>21</sup> Sísa mó mahraréna, Ayahnsa kira wehgá wene pokankakaq iqkakaq sokah sokah atawéna wene nahtapeq wahnahnínaraq wene ménsámehnsá peh kaweqtaq kanae. <sup>22</sup> Mó ayahnsa kira wehgá weba séna wahnahni weh subiqme

kaqsuena wene ebeh naneqmarí mewena wene ménsámehnsá saraqme meyan kéhe úwe.

<sup>23</sup> Sísaga mó mahraréna, Wehukéníká íre néne iyahnabo aní míéhmé néne naruo aní míre. Wehukéníká ínereq íre soruparítéh rataqmé wega wehuke karegaráh aruqarurire úwe.

*Owainawanka kouwekinsabé éhwéhne.  
(Mátíyu 12.43-45)*

<sup>24</sup> Sísaga mó mahraréna, Owainawanka wehukéní auwena pokitaq wání íre kéhrabeq nogena ahrenahrahirabeq kabarire. Kabarirana írakauninsabé iwíáhéna, Ínéga súó náhtápéq seuwekinauge éna <sup>25</sup> áúwátái wehukénípá kouwekire. Kouwekéna wene nah tagehrana aiq kabantáhwe parabaruenta aiq kaweraréhre. <sup>26</sup> Kawerarena mó abapete téhraníté áhnte ahbábáq ówáínáwámáí koweriréhre. Moke mi owáínáwámáí mi anípá kowíáhwe. Téhwe morá ówáínáwánká mi anípá míéhtáq íre kawerire. Anehemé áhnte owáínáwámáínká weba míáhnsábé anotahta q íre kawerire úwe.

*Manikánka wene ehweh sehgió káyábé kawerowe arítéhre ú ehwehne.*

<sup>27</sup> Sísaga mahrarútaq wene ehweh iro inínká anotahta q mahraréna, Arenanoga are maqmarena náh náuwsábe Manikánka wensabé kaweróne atéhre úwana <sup>28</sup> Sísaga wensabé, Náinoga maqinton-sabe Manikánka kaweróne atena peh wene ehweh irera sehgió káyábé anotahta q kawerowe arítéhre úwe.

*Sísansabé, Ótaq sansánúno u ehwéhne.  
(Mátíyu 12.38-42; Máhka 8.12)*

29 Áhnte wehukégá Sísaba sáhuriówana wega sensabé, Ite amahnága oga míáh kéwé áhnte ahabábáq kée. Itega iraréq, Manikánka are aiq pútaq séhréh atéhre tagarianeheéq ótaq sansánúno teni teninowe. Sónaga sóreq wanípípéq tupekútaq Manikánka ótaq sansá miraúwe. Peh morá mi sansá teienaq iwíáhue tagagehe. Ínéga ótaq sansá mó íre sokigi ainíe. 30 Níníbe suwahpeqte kégá Sóna tagéra Manikánka miraú otáq sánsá tagowe. Amahnága oga míáh kégá íné wehukení úku aní tagéra Manikánka miráina otáq sánsá tagagehe. 31 Sórómóniga Ísara keráq wahnahnútaq wáhnaupéqté kéné wahnah inínká wene ahtebia éhwéh iraníeéna íre wahtopeqte weba súwe. Teiníboq irátíáhro. Amahnága iteba míó ánímé Sórómóni kiotaiku aní múge. Mi inínká Sórómónine ahtebia éhwéh ironserahme árahinsabé néne ehweh íre iraho? Minayabe Manikánka ehweh aitahna tanáhráq mi inínká iriwe ména itensabé ehweh aitankéhe. 32 Níníbe suwahpeqte kégá ahabáruwana Sónaga ehweh koreriútaq wene ehweh irera sene ahabábáq sansa suera kaweqtaq míówe. Minayabe Manikánka ehweh aitahna tanáhráq Níníbe suwahpeqte kégá iriwe méra ite amahnága oga míáh keyábé, Íre kawerowe éra ehweh aitagéhe. Amahnága iteba míó ánímé Sóna kiotaiku aní múge. Níníbe suwahpeqte kégá Sónane ehweh írónserahme árahinsabé néne ehweh íre iraho?

*Itene iurame itene inonkane áráhmu tahnsane i ehwéhne.  
(Mátíyu 5.15, 6.22-23)*

<sup>33</sup> Sísaga mó mahraréna, Wehukenínká áráhmu keqmaréhtáq kopípéq tahbe tehnopeq íre máréhre. Páhkétiraté íre akariaréhre. Írakaumo. Nahupeq kibeko kegá kawerue tagageheéna áráhmu tahberapeq máréhre. <sup>34</sup> Arene aurame arene anonkataq kék áráhmú tahnsáne. Arene auranka kaweq naneq tagehnaraq arene arupipeq téhranae. Arene auranka ahabárorahi naneq tagehnaraq arene arupipeq sunkíkírinae. <sup>35</sup> Arene arupipeqté téhrehme sunkíkírínehboq áwéh panantágínaq tagariáhro. <sup>36</sup> Itene iwíáhópipéq íre sunkíkíría peh moke téhráhnaraq áráhmuga moke nahupeq téhrehnserah itene iwíáhópipéqté téhrehnka itene inonka moke téhranae úwe.

*Péhrasi kegá ahabárunsabé Sísaga ehweh arito ehwéhne.*

*(Mátíyu 23.1-36; Máhka 12.38-40; Árúka 20.45-47)*

<sup>37</sup> Sísane ehweh parabagúwana Péhrasi anínká wensabé, Néne nahtapeq táhutahuroyehboq máho úwana Sísaga we kérena táhutahuq nanaúwe. <sup>38</sup> Sísaga wene ayahnkara íre pabeq pabería pehipi nónsabe mi anínká áhtenúwe. <sup>39</sup> Áhtenúwana Sísaga wensabé, Itega káhpukákáq párétahakákáq pabeq paberotaq peh ábórapeq pabeq paberéq arupipeq íre pabeq paberowana peh náwíqkakaq mitaq kéhre. Mina onserah itene inonka pabeq paberowana itene irupipeqmé aebó iwíáhwé áhnte ahabábáq iwíáhwé mitaq kéhre. <sup>40</sup> Ite múguwahgu saiyo animárí móe. Manikánka íre peh morá ábóraq kék náneq miraia kopípéqté náneqmarínkákákáq miraro mino. <sup>41</sup> Ite matiáh náneq mó ke wehwehue nárieq séhréh

arítáhro. Mirairataqmé moke matíáh náneq peh kaweqtaq kanae úwe.

<sup>42</sup> Sísaga mó mahraréna, Péhrasi keo, moke itene sotápéqté ménsáméhnsá saraqme abapete itaréitaré matawéq peh morá mewe Manikáne arambehri mirao ke síéwe. Kawerowe. Pehgáriq naneqmarí táwiomé kímé náwahbiamé moq saraqme síéwe. Kawerowe. Mi sansá sehgieq íre súáhro. Peh kaweqtaq mé sansamé Manikánsabe irutaboirme mi sansátaré íre sehgiówe. Íre kawerowe. Mi sansánkákáq sehgióro. Íre miraonsabé Manikánka kamah ainehboq tábúsoqme sansánoro úwe.

<sup>43</sup> Sísaga mó mahraréna, Péhrasi keo, ite Asiu kené momiwí nahtápéq kaweqtapéq méyabe iuwahbeh ke wóe. Ite máhkétirapéq nogótáq mó kegá ite mehweh aiteyabe iuwahbeh ke wóe. Minayabe Manikánka kamah ainehboq tábúsoqme sansánoro. <sup>44</sup> Pusa ké maisia máíq kéhrabeq mó kegá íre tagia mitaq pehipi nogówe. Mina inserah itene iwíáhipeq kambaresa náneq tahnsá kéhrara mó kegá íre tagahwe. Minayabe itewe pusa ké maisia máíq tahnsa móe. Manikánka kamah ainehboq tábúsoqme sansánoro úwe.

*Mósísine ehweh síwáhnoru kegá ahabárunsabé Sísaga ehweh arito ehwéhne.*

<sup>45</sup> Mósísiga sehgióro ú ehweh síwáhnorú anínká Sísansabé, Arega irarénawe itensabé moq ehweh aitahne úwe. <sup>46</sup> Úwana Sísaga mahraréna, Mósísine ehweh síwáhnoro keo, Manikánka ite moq kamah ainehboq tábúsoqme sansánoro. Mósísine ehweh áhnte pagégé éhwéh púaq itega síwáhnorowara íráh

kégá íre sehgoráhowe. Segá íre sehgoráhonsabé itega mi ke pehgárita q íre séhréh arítáhwe.

<sup>47</sup> Itene igaqnaréhga Manikáne ehweh iraru ke subiq súówe. Subiq suera maisarówaq ite maisarórabeq itega ebaq pentabaráhwe. <sup>48</sup> Itega miraome aneq sansánoo? Itene igaqnaréhga kaweq ke subiq súónsabe itega sene ahabábáqsabe, Kaweq sansáne éq anehe mi kawéq ké maisarórabeq ebaq pentabaráhwe. <sup>49</sup> Minayabe Manikánka tábúsoqme iwíáhéna mahraréna, Néne ehweh irare kereq síwáhnoro kereq seba eqmaq suanauge. Eqmaq suahnara sega táhmaro síwíoqnéra mó táhmaro subiq suaneherawoe úwe.

<sup>50</sup> Sísaga mó mahraréna, Segá Manikáne ehweh iraru ke subiq súówe. Manikánka mah marákó marákó mirarotaq téh subiq súótaqte mi ahabábáq amahnága oga míáh kéné ahabábáq úkire. Minayabe Manikánka kamah ainawire.

<sup>51</sup> Segá wehukení wenáwíq Ábéri ebeq subiq súówe. Anehemé wehukení wenáwíq Sékáráia Manikánsabe iwíáh íwíáh atáh náhtápéq míowara subiq súówe. Mi anitéreq moke ákáhpi subiq súó kereqne korahq tunsabe Manikánka amahnága oga míáh ké kamah ainawire.

<sup>52</sup> Mósísine ehweh síwáhnoro keo, itega ahtebah onsárápété kí kopéq súáhwe. Itewe mibeq íre kibekia mibeq kibekonehe e keyábé ahqáho arítáhwe. Minayabe Manikánka kamah ainehboq tábúsoqme sansánoro úwe.

<sup>53</sup> Sísaga mitaq suena máhpeq tuegúwara Mósísine ehweh síwáhnoro kereq Péhrasi kereqka wensabé abiahnsa atera áhnte ehwéh kasenuwe. <sup>54</sup> Sísaga

ahbabáq ehweh irarinkeheéra sega mó ehwéh mó ehwéh nue kasenéra áhwárawe tagowe.

## 12

*Péhrasi kegá kopérahpéro sansá pehragahro ú ehwehne.*

*(Mátíyu 10.26-27)*

<sup>1</sup> Peh íregárita q kegá sáhurió púara mó kené sigará músúriówana Sísaga ebeq we kéro keyabé síwáhnoréna, Péhrasi kegá kopérahpéro sansá pehragahro. <sup>2</sup> Amahnága moke kopípéq kéh náneq mókake ábóraraginae. Moke epéqté éhwéh ábóraraginae. <sup>3</sup> Itega sunkíkírabeq iraruro ehwéh mó kegá téhrehabeq iragéhe. Itega nahupeq ehmuniq éhmúnirue irarira ehwéhmé mó kegá irera nahnsorapéqté sawai sawaiue irarigehe úwe.

*Peh Manikánsabe áhreoro ú ehwehne.*

*(Mátíyu 10.28-31)*

<sup>4</sup> Sísaga mó mahraréna, Néne iyahnabo anímárinó, teiníboq írátíáhro. Peh itene inonka subiq suahráho keyábé íre áhreoro. Mi kegá iteyuwa íre subiq suahráhowe. Írakaumo. Minayabe sensabé íre áhreoro. <sup>5</sup> Teiníboq írátíáhro. Peh morá Manikánsabe áhreoro. Wega ebeq itene inonka subiqmarena anehe iteyuwa iraipéq suahráhi puaq wensabé anotahta q áhreoro.

<sup>6</sup> Káriq kabará máhkétirapéq téhtaré pabusa monératé moberíáh kábará paiqmarahráhire. Mina tahnsa káriq kábará Maniká Iteriboga íre abitaruéhre. <sup>7</sup> Maniká Iteriboga moke itene iyahqnopeqte iyáhrámé sáhnsahwe tagaríéhre.



Wega ite aiq moke tagariéh púaq íre áhreoro. Itega kabaramarí kiotaiko puana Manikánka ite íre abitarúéhre úwe.

*Íné Sísane ani muge iraréyabe ayehitéhneho i ehwéhne.*

*(Mátíyu 10.32-33, 12.32, 10.19-20)*

<sup>8</sup> Sísaga mó mahraréna, Teiníboq írátíáhro. Wehukeníká mó keyábé, Sísane ani múge terinaraq mókake íné wehukení úku anínká íópeqté ké míéhraq Maniká Iteribonsabé, Néne ani míre teawinie. <sup>9</sup> Arega mó ke míáhtaq ínénsabe, Ahqáho. Íné íre tagaríoge aintéhnaq mókake Maniká Iteribo míéhraq ínéga arensabé ahqáho atena are íre tagaríoge atanauge úwe.

<sup>10</sup> Sísaga mó mahraréna, Íné wehukení úku anínsabé níhruru aintéh ánimé Manikánka insahwé atena íre ahrraq matianawire. Peh morá Manikáne Awansabé éhrurui ánimé Manikánka íre insahwé atanawire. Ahqáho. Peh ahrraq matiankehe úwe.

<sup>11</sup> Sísaga mó mahraréna, Mó kegá ite táhtoqme ehweh aitanehera irataq itene irupipeq iwíáh kikiriyehe. Segá ite meiqmera Asiu kené momiwí nahtápéqté wáhnáhpápópoq wahba wáhnáhpápópoq mó anotah anípápópo mótéhraq itega, Aneq ehwéhnonehknono éq áhreiyehe. <sup>12</sup> Mí tanáhráq Manikáne Awanka irarína ehwéh sokigi ainkéhe úwe.

*Ménsámehnsánsabe arutaboiri anínká múguwahgu sansá miraurai ehwéhne.*

<sup>13</sup> Peh íregáritaq kegá sáhuríówana mitaqté anínká Sísansabé, Íwáhnoraníno, nániboga

pukurairana wene ménsámehnsá nánuwahga moke meraire. Mi mensáméhnsá ákáhtaq náninkéhboq nánuwahnsabé ákáhnsaime náwo teawo úwana <sup>14</sup> Sísaga wensabé, Íné ménsámehnsá saraqme nári nárinkeheéna insega omaq intáráiro? <sup>15</sup> Insega omaq intáráiro éna mitaq mío keyabé mahraréna, Ménsámehnsánsabe igára pabekínehboq kawerurero. Íre sene áhnte kék ménsáméhnsánsábé wehuke oga míahrahowe úwe.

<sup>16</sup> Sísaga mah pabéqmé éhwéh mahraréna, Anotah wehné so áhnte mensáméhnsá iráirana <sup>17</sup> wewe náhenéna, Áhnte mensáméhnsá matiónsábé eheq saharanínkono uraire. <sup>18</sup> Eheq saharanínkono íwíáhéna, Íné mahrainie éna néne ménsámehnsá kék náhmáí sokoruqme mó anotah nahmáí pearena néne áhnte mensáméhnsá mipéq sáharaníe. <sup>19</sup> Mipéq sáharáhnaraq mahra íwíáhinie. Néne matió ménsáméhnsá áhnte opéq awehraq kanae. Minayabe amahnága túbáh aginie. Táhutahurinie. Iwíáh íwíáhéna ábáhrinie íwíáhuraire.

<sup>20</sup> Iwíáhurairana Manikánka wensabé, Múguwahgu saiyo aní móne. Iborá penahnarag are pukiniewóne. Minayabe are áhnte matiahna mensáméhnsámé inserénga awaq miagéhbo uraire. <sup>21</sup> Maniká Iteribonsabé íre sirutaboiria peh sene ménsámehnsánsabe sirutaboiro kewé teawú aní tahnsa ké wóe úwe.

*Itene irupipeq iwíáh kikiriye ho ú ehwehne.  
(Mátíyu 6.25-34)*

<sup>22</sup> Sísaga we kéro keyabé mahraréna, Teiníboq iratíáhro. Mah marákóipéq mé tanahráqsábé itene irupipeq iwíáh kikiriye ho. Aneq naninkono?

Aneq korósi sukiwianínkono íre iwíáhoru. <sup>23</sup> Oga méné íre peh morá tópah nahnagae. Itene inonkame íre peh morá aneranéré naneq mire.

<sup>24</sup> Kúqnu tagéq ahtebahro. Mi kanká ménsúmehnsú íre uqmaréhre. Sene táhutahuq tahbé íre kéhre. Minayabe nera kéhtáq íre koawaqmena méaréhre. Manikánka mi kansábé iwíáhéna pehipi kiraboire. Itewe wehuke puana Maniká Iteriboga itensabé anotah iwíáhéna kawerue kirabo aitéhre. <sup>25</sup> Arega arene oga mé tanahráqsábé iwíáh kikirinaraqmé ábátáq mérearahráhiro? Ahqáho. Írakaumo. <sup>26</sup> Itene oga mé tanahráq ábátáq mérearahráh íre únayabé mó naneqmarínsábé aneqsabé iwíáh kikironehbo?

<sup>27</sup> Uworapeqté náneq kirena kaweq ará iyéh tagéq ahtebahro. Uworapeqté náneqka íre arambehrire. Korósi íre kogahnire. Anotah wahnáh ání wenáwíq Sórómóni naho ména we áhnte mensáméhnsá matawéna anotah kawéq áwáhríq kórósi matiowe. Uworapeqté kaweq ará iyéh náneqka Sórómónine kaweq awahriq naneq kiotaikire. <sup>28</sup> Uworapeqté náneq íre kagai naneq mire. Iborá iyéhhrana ahbiah tahnsá kekírataq taginae. Manikánsabe pehgárita q aiq pútare átáh kéó, Manikánka mi kawéq ará sukiwíéhnsábé wega ite moq sukita hráhi mino. <sup>29</sup> Aneq nanehnkono iwíáhéq irupipeq áhnte iwíáh kikiroyeho. <sup>30</sup> Maniká íre tagaríáh kégá minayabe iwíáh iwíáhéra sene sirupipeq iwíáh kikirowe. Iteriboga ite íre mationa naneq aiq tagaríéhre. <sup>31</sup> Minayabe Manikánka wahnah wahnahnirabeqte sánsánsábé irutaboiréq sehgióro. Sehgirataq wega ite íre

mationa naneq náinkéhe úwe.

*Sísaga kaweq naneq morábí sáhonsabé teriu ehwehne.*

*(Mátíyu 6.19-21)*

<sup>32</sup> Sísaga mó mahraréna, Ite sipisípiq nansó táhnsá kéo, íre áhreoro. Maniká Iteriboga wahnahnirabeq awaq miageheéna aiq omaq itéhre. <sup>33</sup> Itene ménsámehnsá paiqmaqme mi moné tabonah ke náriéro. Mirairataqmé kagaorahi mensáméhnsá íópeq mitaq sáharagéhe. Mitaq aebó ánínká íre aebóorahire. Mitaq wenuqka íre nahrahi puana itene kagaorahi mensáméhnsá peh mitaq kagainawire. <sup>34</sup> Itene kaweq naneq morábí sáharáhrabeqsabé irutaboironeheqmóe úwe.

*Sísaga, Kouwekonaraqsábé níwénunoro ú ehwehne.*

*(Mátíyu 24.42-44)*

<sup>35</sup> Sísaga pabeqme ehwéh mahraréna, Itene korósi sukiareq áréti konahnareq áráhmu keqme tagariáhro. <sup>36</sup> Sene wahnahnka pahuwirorabeq suena sína tanáhráqsábé wene arambehri anímárí áwénuno serahnoro. Wega sure onsa pakobakoínaraq sega apubúue onsa sioneherawoe. <sup>37</sup> Se tótuqméra sene wahnahnsabé áwénuno anímárínsábé, Kawerowe aritankéhe. Teiníboq írátíáhro. Sene wahnahnka we áwénuno keyábé iwíáh iwíáhéna áréti konahnuwena sensabé, Tútuoro aritena kirabo aritankéhe. <sup>38</sup> Wega inokáhnabubupopoq tueina ínaraqpópoq sínaraqmé íre sugia peh wensabé áwénuno keyábé anotahtaq, Kawerowe aritankéhe.

<sup>39</sup> Anotah wehgá aebó ánínká sína tanáhráq ahtebehtaq tahirimé wega áwénunue wahnahnurawéna aebó ánínká kibekina ínaraq tagéna kaqsúéh irino. <sup>40</sup> Minayabe iwíáhue tagahro. Íné wehukení úku anínká ite íre iwíáhira tanáhráq kouwekinauge. Minayabe íwéh panantágínaq níwénunoro úwe.

*Kaweq arámbéhrí ánínseq íre kaweq arámbéhrí ánínseqsabé ehwehne.*

*(Mátíyu 24.45-51)*

<sup>41</sup> Pítaga Sísansabé, Itene Wahnahno, arega mah pabéqmé éhwéhmé peh morá itensabé teieno? Mó keyábéákáq terieno kasenúwe. <sup>42</sup> Kasenúwana Sísaga mahraréna, Ahtebia ání tábúsoqme arámbéhríi anímé insebo? Wene wahnahnka mi anínsabé, Mó arámbéhrío keráq wahnahnarito atena táhutahuq tanáhráq tópah nário atéhre. <sup>43</sup> Wene wahnahnka kouwekéna teawátái arámbéhrí tábúsoqme mirainsabé tagéna wene arambehri anínsabé, Kaweróne atankéhe. Kaweróne atéhnsabé arambehri aniné aru eyoyóinkehe. <sup>44</sup> Teiníboq írátíáhro. Wene arambehri anínká tábúsoqme arámbéhríi puana wene wahnahnka, Moke néne ménsámehnsátaq wahnahnúno atanae. <sup>45</sup> Ahbabáq arámbéhrí ánínká iwíáhéna, Néne wahnahnka íre apubúue kouwekinae íwíáhire. Mira íwíáhinsabé mó arámbéhrí wéh áhré subiqmarena múguwahgu kereq táhutahuq néna píah naruq narurire. <sup>46</sup> Wega íre iwíáhue áwénunína tanáhráq wene wahnahnka séna mina tagéna anotahtaq kamah awena ehweh íre íráh ké míáhrabeq móatankehe úwe.

47 Sísaga mó mahraréna, Arambehri anínká wene wahnahne iwíáh irena íre mirainaraq wene wahnahnka anotahtaq kamah awinkéhe. 48 Arambehri anínká wene wahnahne iwíáh íre ahtebéna mina ahababárinana wene wahnahnka pehgárita q kamah awinkéhe. Wehukeníká anotah apéq meyahnaraq anotah apéq awinanao. Mina inserah Maniká Iteriboga wehukení áhnte awena págege atena séhréhína q mi anínká Sísane arambehri anotahtaq mirainanao úwe.

*Sísaga, Íné wehuke saraq iuwanieéna tuta qe ú ehwehne.*

*(Mátíyu 10.34-36)*

49 Sísaga mó mahraréna, Abe kekinai anínká téh kekiaréh rana tawe abae agire. Mina inserah néne ehwehnka abae aginkeheéna marakóipeq tumíara qe. Ira abae aginserah néne ehwehme apubúue abae agéyabe nuwahbehre. 50 Sega móta q íné íre kaweraintéhra puana amahná qa nirupipeq áhnte uméhime mókake kaweraginae. 51 Ínéwé sainkue míáh ké insahwé aitanieéna marakóipeq tuta qe iwíáhoo? Írakaumo. Peh sain-suanieéna tuta qe. 52 Mó karíronání moberíáh méra apahránítógá néne ehweh sehgiówara mó téhranítégá íre sehgioya puara sainkue míáhwe. 53 Mó mapéq abowáreq wenahninseq sainkue míehye. Mó mapéqmé anowareq ayahunkawareq sainkue míehye. Mó mapéqmé ahrahnawareq anahbukawareq sainkue míehye úwe.

*Wehukega néne arambehri íre ahtebahrahowe ú ehwehne.*

*(Mátíyu 16.2-3)*

<sup>54</sup> Sísaga weba mío keyabé mó mahraréna, Ibonuqna kéhtáq ibonsinae irarewana ibonsire. <sup>55</sup> Áúnorahntáh kéhtáq patahinae irarewana patahire. <sup>56</sup> Kopéráhpéro keo, itega ibonuqnankákáq áúnorahntáhnkakaq ahtebéqmé aneqsabé ínega amahnága mirau arámbéhrí íre ahtebahrahoo úwe.

*Apubúue insahwé ato ú ehwehne.*

*(Mátíyu 5.25-26)*

<sup>57</sup> Sísaga mó mahraréna, Kaweq sansámé aneqsabé íre iwíáhue mirao? <sup>58</sup> Mó anínká are ehweh atanieéna anotah wahnáhbá meqme kinaaq ahtapeq kirataq we insahwé ato. Ehwehorabeq kirataq wega are anotah sahsí móatahnaraq wega párisiba móatahnana sega are karábúsiipéq móatéhboq insahwé ato. <sup>59</sup> Teiníboq iratíáhro. Karábúsiipéq móatahnara íre apubúue soraq auwaneherawoe. Ebeqme anotah apéq paiqmarehnaraqmé anehe soraq auwagéhe úwe.

## 13

*Ahbabáq sansa íre súéhraqmé pukoneheqmóe ú ehwehne.*

<sup>1</sup> Mi tanáhráq táhmaro mío kega Páhirátiga mirau ehweh Sísaga teawúwe. Kehrari marákórápéqté kégá Sarúsarama suwahpeq Manikánsabe titiruwana Páhirátiga se subiq súáhro aritowe. Subiq súáhro aritowara subiqmárowara pukutaq sene korahqkakáq titiro naneq kané korahqkakáq moraráq mitaq kowe. <sup>2</sup> Páhirátiga mirau ehweh Sísaga teawúwana wega sensabé, Pukuro kené ahbabáq moke mó Kehrari marákórápéqté

kéné ahababáq aiq kiotaiki puara mina tahnsa pukurowe íwíáhoo? <sup>3</sup> Írakaumo. Teiníboq írátíáhro. Iteitene ahababáq sansa íre súéhrrataqmé ite moq moke pukoneheqmoé. <sup>4</sup> Síróáma marákóráq íre wahto íópeq pewe kiríá ébáh náh sokoguraitaq 18 wehuké pukurowe. Pukuro kené ahababáq moke mó Sarúsarama suwahpeqte kéné ahababáq aiq kiotaiki puara mina tahnsa pukurowe íwíáhoo? <sup>5</sup> Írakaumo. Teiníboq írátíáhro. Iteitene ahababáq sansa íre súéhrrataqmé ite moq moke pukoneheqmoé úwe.

*Sera íre íyéh áwánkánsábé pabeqme ehwéhne.*

<sup>6</sup> Sísga mah pabéqmé éhwéh mahraréna, Wehne sotápéq nah naneq será íyéh áwánká kíréhrrana wega sera sabátáhrurairana írakaunurairae.

<sup>7</sup> Írakaunurairana wene sotáq arambehri anínsábé, Apahtáro ópéq ínégá mah awánká sera sabátáhruraugana írakaunurairae. Apiruo. Aneqsabé néne marakóraq pehipi kehro urairana <sup>8</sup> sotáq arambehri anínká wensabé, Amahnága pehragéna sera iyankéhboq ínégá áwahipeq ubuqme káhone seq maisarahnnana <sup>9</sup> mó opéq iyahnaraqmé kawerinae. Íre iyahnaraqmé apiruankéhe uraire úwe.

*Ahrena ahrena wehekáh Sísga owainawanka áwíoqnó íní kawerato ehwéhne.*

<sup>10</sup> Ahrena ahrena wehekáh Sísga Asiu kené momiwí nahtápéq síwáhnorúwana <sup>11</sup> abobia káuqmunia íní mitaq míowe. Owainawanka 18 opéq mi íní áwíoqnó púana we taebewe nogena íre iriwe nogoráhú íní míowe. <sup>12</sup> Sísga mi



iní tagéna wensabé, Mahbeq súno éna arene awahre kaweratóge éna <sup>13</sup> wene ayahnkaratáté táhtoqnówana apubúue irigéna Manikánsabe iwíáh iwíáh atowe.

<sup>14</sup> Sísaga mi iní ahrena ahrena wehekáh kaweratonsabe mibeqté wáhnáh ánínká abiahnsanéna míó keyabé, Arambehri wehekáhmé abapete morá wéhékáh míre. Mó anínká arene awahre kawerateyabe awinaraqmé arambehrié wehekáh sero. Ahrena ahrena wehekáh awahre kaweraiteyabewé íre sero úwana <sup>15</sup> Sísaga mina tahnsa iwíáho keyábé, Kopéráhpéro keo, ahrena ahrena wehekáh itene kamarí wání nageheéq wiraipeqté meriqmeq wánítapeq mórítáh mino? <sup>16</sup> Mah inímé Ébaráhma kahnáh ínínirana owainawanka íregárita q opéq <sup>18</sup> opéq áwíoqnehrana ínéga ahrena ahrena wehekáh kaweratómé aiq kaweq sansánu mino úwe.

<sup>17</sup> Úwara mi ehwéhnúnka sene sirupipeq pó púara wene naruo anotah siyehitówara áhnte mó kegá Sísaga miraú arámbéhrí tagéra iwíáh iwíáhuwe.

*Pehgáriq ayúnsábé pabeqme ehwéhne.  
(Mátíyu 13.31-32; Máhka 4.30-32)*

<sup>18</sup> Sísaga mah pabéqmé éhwéh mahraréna, Manikánka wahnah wahnahnime aneq tahnsáne ue teinínkono? Anere pábéqmé éhwéh teinínkono? <sup>19</sup> Manikánka wahnah wahnahnime awanká ayu pehgáriq ayú tahnsane. Wehukenínká mi pehgáriq áyú wene sotápéq uqmatairana kirena anotah úkéna moke mó mensáméhnsá kiotaikire. Awankánirana kabaramarínká séra ayahnweraq sene nah piáhwe úwe.

*Muoráhi naneqsabé pabeqme ehwéhne.  
(Mátíyu 13.33)*

<sup>20</sup> Sísaga mó mahraréna, Manikánka wahnah wahnahnime anere pábéqmé éhwéh teinínkono? <sup>21</sup> Tírí íninká muoráhi naneq párahwaipéq maqme ayahnrana moke múire. Manikánka íópeq wahnah wahnahnime mina páréti muoráhi naneq tahnsáne úwe.

*Sobuya méhpéhpéq kibekoro ú ehwehne.  
(Mátíyu 7.13-14,21-23)*

<sup>22</sup> Sísaga Sarúsarama suwahpeq pokinie íwíáhéna pokue moke táhúnipéqkákáq anotah matábúrápéqkákáq síwáhnorinieéna pokúwe. Pokéna síwáhnorue kure kure Sarúsarama suwahpeq koragúwe. <sup>23</sup> Koragúwana mó anínká wensabé, Wahnah aníno, oga mérapeq awaq miéhra kewé peh táhmaroga awaq mianeherabo kasenúwe.

Kasenúwana Sísaga míó keyabé, <sup>24</sup> Tauntahunue sobuya méhpéhpéq kibekoro. Teiníboq írátíáhro. Áhnte kegá nahupeq kibekonehe íwíáhéra íre kioráhowe. <sup>25</sup> Mibeqté Wáhnáhnká onsa paiqmarahnaraq itega méhpeh iriwe méq onsaraq subírataq wensabé, Itene Wahnahno, onsa siito igehe. Onsa siito irana wega itensabé, Ite eheqte kébo? Ínéga ite íre tagaríóge inawire. <sup>26</sup> Ite íre tagaríóge ina q itega wensabé, Arereq moráráq táhutahururauna wino. Arega iteruwahpeq íwáhnorurona wino irana <sup>27</sup> wega itensabé, Itewe íre tagaríóge. Ite eheqte kébo? Ite moke ahbabáq ke puaq íné nueq pokoro aitanawire.

28 Ébáráhmareq Áhísáhkireq Sékópareq moke Manikáne ehweh iraru kereqka Manikánka wahnah wahnahnirabeq míéhraq tagéq peh máhpeq míéhra puaq uwo uwo éq abuyoraneheqmóe. 29 Ío kiembogirabeqte kéreq ío tupekirabeqte kéreq ébeq ayópéqté mó ébeq ayópéqté kéreqka sure Manikánka wahnah wahnahnirabeq tútuue méra táhutahurigehe. 30 Írátíáhro. Amahnága anotah ke ebeq míáh kéwé mókake Manikánka wahnah wahnahnirabeq anehepeq pehgáriq ke úkoneherawoe. Amahnága anehepeqte kéga ebeq anotah ke úkigehe.

*Sísaga Sarúsarama suwahpeqte keyábé arutaboírú ehwehne.*

*(Mátíyu 23.37-39)*

31 Mi tanáhráq Péhrasi kegá Sísaba séra wensabé, Érótiga are subiq suaníe íwíáhinsabé mahtaq sue pokúno uwana 32 Sísaga sensabé, Mi urínsí íá táhnsá ánínsabé koreaweq mahrarero. Iborankákáq ah-biahakáq owainawamarí kaqsuena awahre ke kaweraritaníe. Apahtáróráq néne arambehri parabaruaníe. 33 Manikáne ehweh iraru ke peh morá Sarúsarama suwahpeq míówara subiq-maq subiqmaruwara puku pukuuwe. Íné moq Manikáne ehweh iraru anínéna iborankákáq ah-biahakáq ahrinaakáq ínéga iwíáhu ahtápéq pokue arambehrinauge.

34 Sarúsarama suwahpeqte kéo, itensabé nirutaboíraitóge. Itega Manikáne ehweh iraru ke subiq sueq Manikánka iteba eqmaro ke ebahnsatate subiq súówe. Kokórega wene áráhqmari arutaboíréna ahwirinserah áhnte

tanáhráq ite wahnahnue séhréh aiteyabe  
 nuwahbehraqme itega ahqáho aintáhwe.  
 35 Írátíáhro. Ahqáho aintáhnsábé iteruwahpeqme  
 mókake íre kaweraitahnana peh susa náh kanae.  
 Teiníboq írátíáhro. Mókake itega íné pehipi íre  
 tagagehe. Ebeqme mahraréq,  
 Itene Wahnahne áwírue sína anínsábé iwíáh íwíáh  
 atone éq anehe íné tagagehe úwe. *(Buk  
 Song 118.26)*

## 14

*Sísaga wene aiayah mu aní kawerato ehwéhne.*

<sup>1</sup> Ahrena ahrena wehekáh Sísaga Péhrasi  
 wahnáh áníné nahtapeq táhutahurinieéna pokúwara  
 mibeqté kégá we awahnkanuwe. <sup>2</sup> Wene aiayah  
 mu anínká weba míowana <sup>3</sup> Sísaga mi aní tagéna  
 Mósísine ehweh síwáhnoro kereq Péhrasi kereqsabé  
 kasenéna, Ahrena ahrena wehekáh awahre ke  
 kaweraritewé kaweq sansápo úwe. <sup>4</sup> Úwara íre  
 ehwehnia peh ehiya míowana Sísaga mi awáhré  
 aní kaweratenana eqmarowe.

<sup>5</sup> Eqmarena míó keyabé mahraréna, Ahrena  
 ahrena wehekáh itene anipópoq póéráhpópoq  
 mataipéq tupetiahnaraqmé mi wehekáh panke-  
 qme meruaneherabo kasenúwe. <sup>6</sup> Kasenúwara íre  
 teawasa peh ehiya míówe.

*Íné pehgáriq aní tahnsa míanie íwíáhúno ú  
 ehwehne.*

<sup>7</sup> Táhmaro táhutahuroneherao kegá kabaréra  
 kaweqtapéq eheq tútuue míanehnkono uwana  
 Sísaga mina tagéna mah pabéqmé éhwéh teriuwe.

<sup>8</sup> Teriena mó anínká arensabé, Máho ínahwe arega

anotah tahutáhúrirarabeq pokirataq anotah weh tútuue míéhrarabeq íre tútuue míahno. Arensabé máho urai anínká mó aní are kiotaiqme anínsábé máho urairamo. <sup>9</sup> Anotah anínká sínaraq máho urai anínká arensabé, Móbeq míahno. Mó anínká mahtaq tútuue míankehe ínaraq are anotah ayéhítanawire.

<sup>10</sup> Arensabé máho ínaraq ayehrápéq korútuue míahno. Miraínaraq arensabé máho urai anínká tagéna arensabé, Irigue mahbeq kaweqtapéq serútuue míahno atanae. Wega miraínaraq tagehra kegá arensabé íwíáh íwíáh atagéhe. <sup>11</sup> Wewega, Íné anotah aní múge íwíáhínaraqmé Maniká Iteriboga wensabé, Pehgáriq aní míahno atankéhe. Wewega, Íné pehgáriq aní tahnsa míanie íwíáhínaraqmé Maniká Iteriboga wensabé, Anotah aní míahno atankéhe úwe.

*Sísaga, Tabonah ke kawerarito ú ehwehne.*

<sup>12</sup> Sísaga máho ato aninsábé mahraréna, Arega anotah tahutáhúq kaweraréhna tanáhráq peh morá arene iyahnabo arenawahrah áhnte monéákáq kényábé máhoro íre úno. Mó tanáhráq sega arensabé, Máho atera táhutahuq náwigéhe. Mina tahnsanue arene ápeq meyankehe.

<sup>13</sup> Arega anotah tahutáhúq kaweraréhna tanáhráq tabonah kereq sawenkahnia kéreq aigará soriqnah kereq aura pira kéreqsabé máhoro arito. <sup>14</sup> Sega are mó naneq íre náweráho puara Manikánka kaweróne atankéhe. Mókake wega kaweqtaq míáh ké iriritahna tanáhráq ápeq awinkéhe úwe.

*Táhutahuronehboq máhoro únsabe pabeqme ehwéhne.*  
(Mátíyu 22.1-10)

<sup>15</sup> Sísareq moráráq táhutahurú aninká mi ehwéh irena wensabé, Manikánka wahnah wahnahnirabeq táhutahurira kewé sirupipeq áhnte eyóyó aginkehe úwana <sup>16</sup> Sísaga wensabé pabeqme ehwéh mahraréna, Wehga íregárita q wehekéq kiraboiniééna áhnte tahutáhúq kawerataire. Kaweraréna mi keyábé, Máhoro uraire. <sup>17</sup> Awehraq tanahráqmé wene arambehri aní teawena máhoro urau keyábé, Táhutahuq tanáhráqmé aiq awehraq mire. Amahnága máhoro korerio éna eqmataire. <sup>18</sup> Eqmatairana, Máhoro urairara íre serahúne éhwéh mó aninká mó aninkáue teawátówe. Mó aninká wensabé, Marakó paiqmataunsabé mina koraganau puana íre korahuge urairana <sup>19</sup> mó aninká wensabé, Íné arambehriéyabe inayáhnkú káho paiqmataunsabé mi kamarí áhwárawe taganau puana íre korahuge urairana <sup>20</sup> mó aninká wensabé, Íné ahre meyó púana íre korahuge uraire.

<sup>21</sup> Mi arámbéhrí áninká kouwekue sene ehweh wene wahnah teawátáirana anotah abíáhnshánuraire. Anotah abíáhnshánéna wensabé, Anotah ahtápéqkákáq pehgáriq ahtápéqkákáq peheráh pokue tabonah kereq sawenkahnia kéreq aura pira kéreq soriqnah kereq koweriqme súno uraire.

<sup>22</sup> Urairana wene arambehri aninká miraéna kouwekéna wene wahnahnsabé, Aiq miraugarawe sira kewé íre awehraq miáhwe urairana <sup>23</sup> wene wahnahnka wensabé, Néne táhutahuq áhnte nagehboq sotápéqkákáq

tanahraipéqkákáq wehuke kogabarue koweriqme súno. <sup>24</sup> Teiníboq írátiáhro. Téh máhoro urau kegá néne táhutahuq pehgáriq naneq íre naneherawoe uraire úwe.

*Sísaga, Ebeq kawerue iwíáhé anehe íné séniro ú ehwehne.*

*(Mátíyu 10.37-38)*

<sup>25</sup> Sísaga pokúwara peh íregárita q kegá kéréwana wega pabeqme sensabé, <sup>26</sup> Wehukega íné pehipi íre séniragéhe. Wenanoiboreq wene ahrereq wene animárínseq wenábáqmarínseq wenanahnorehreq suahnaraqmé íné sénirankéhe. Wewe awahbeh iwíáh suahnaraqmé íné séníréh ání míankehe. <sup>27</sup> Nánibone arambehri miraunsabé íné awankátaq táhpawe nubiq suagéhe. Ínéga miraunserah mirae séniráhro. Minayabe néne arambehriraq túbáh agéna peh we awahbeh arámbéhrí sehgi ánímé né séníréh ání íre míahrahire.

<sup>28</sup> Nah pianaína anínká ebeqme iwíáhue tagankehe. Nah pe naneqmarínkákáq wene móneakáq awehraq kahnaraqmé anehe pearankéhe. <sup>29</sup> Ebeq íre iwíáhi anínká nahwiahnsanse pearena anehe néne móneakáq íre awehraq kéhre éna mi nah íre pera suankéhe. Tagehra kegá susa náhwíáhnsánsé tagéra mi anínsabé awiréh atera, <sup>30</sup> Wega áhwáreh arámbéhrí íre parabaruaráhire oneherawoe.

<sup>31</sup> Wahnah anínká mó wahnáh ánínseq wene ebeh kereq ebehue subiq suanéhe iwíáhéna ebeq tútuue ména kawerue iwíáhinkehe. We peh 10 táhúséni (10,000) ebehira ke míéhrrataq wene naruo peh íregárita q 20 táhúséni (20,000)

ebehira ke miéhrataq kaweq iwíáhi wahnáhnká íre apubúue koebehinkehe. <sup>32</sup> Itene naruo íre subipáhraruahráhuéne iwíáhinaráqmé sene naruo miéhrataq ahnsaní eqmarankéhe. Itega íre ebehoneheqmúne. Kaweqtaq míanehboq póqsuanéhe terio éna eqmarankéhe.

<sup>33</sup> Mina inserah íné séniraníe iwíáhóna anínká ebeqme iwíáhue tagankehe. Peh morá wewene matiéh náneqsabé, Anetaníbo moke suaníe iwíáhi anínká íné séniréh ání míankehe úwe.

*Sísaga auqmah soréqsabé pabeqme ehwéh teriu ehwéhne.*

*(Mátíyu 5.13; Máhka 9.50)*

<sup>34</sup> Sísaga mó mahraréna, Sóreqme kaweq nanere. Sóreq auqmah úkínaraq árahue kaweraranéhnkono? Írakaumo. <sup>35</sup> Auqmah soréqmé peh abehq úki puaq sotápéq kíréh náneq íre séhréh atahráhire. Sotápéq kawerue kirankéhboq seqkákák auqmah soréq ayahnué sotápéq maranéhnkono? Írakaumo. Auqmah soréq peh máhpeq suaneheqmúne. Minayabe iahreakaq ké kawerue íráhro úwe.

## 15

*Sipisípiq tabanaginsabé pabeqme ehwéhne.*

*(Mátíyu 18.12-14)*

<sup>1</sup> Táhkísi moné meyáh kéreq ahbabáq kereqka Sísane ehweh iraneheéra weba suwara <sup>2</sup> Péhrasi kereq Mósísine ehweh síwáhnoro kereqka ehmuníq éhmúníréra, Mah anínká ahbabáq sansano ke mehweh aritena sereq moráráq táhutahirire uwe.

<sup>3</sup> Uwana Sísaga mi ehwéh irena mah pabéqmé éhwéh mahraréna, <sup>4</sup> Iteruwahrah anínká áhnte



ka 100 sipísípíq wahnahnirana peh morá ká tabanagínaraq wega anerinabo? Wegá íre tabanago kamárí 99 sipísípíq uwaruntú sahtaqme nahrabeq sitena tabanagi ka kogabarue ábóraq marankéhe. <sup>5</sup> Ábóraq marahneyabé iwíáh iwíáhéna mi ka sawi-wena <sup>6</sup> wene nahtapeq pokue wenawahrahreq wene iyahnaboreqsabé síáhrabue sensabé, Néne tabanagi ka ábóraq marónsábé iwíáh iwíáhonehe inkehe. <sup>7</sup> Mina inserah íopeqté kégá 99 kaweqtaq míáh keyábé peh ákáhtaq iwíáh iwíáhowe. Peh morá áhbábáq ánínká wene ahababáq suena Manikáne ani ukítaq íopeqté kégá anotahtaq iwíáh iwíáhowe úwe.

*Tabanagi monéyábé pabeqme ehwéhne.*

<sup>8</sup> Sísaga mó pabeqme ehwéh mahraréna, Mó inínká nayáhnkú móné matíéhna peh morá móné tabanagínaraq wega anerinabo? Wegá áráhmu keqmarena nahupeq kabantáhinkéhe. Kawerue kabarue ábóraq marankéhe. <sup>9</sup> Ábóraq marena wenawahrahreq wene iyahnaboreqsabé síáhrabue sensabé, Tabanagi moné ábóraq marónsábé iwíáh iwíáhonehe inkehe. <sup>10</sup> Mina inserah peh morá áhbábáq ánínká wene ahababáq suena Manikáne ani ukínaraq Maniká míéhrabeqte íopeqté kégá ahababáq súéh ánínsábé anotahtaq iwíáh iwíáhigehe úwe.

*Ábákawa kouwekuraitaq wenaboga iwíáh iwíáhúnsabe pabeqme ehwéhne.*

<sup>11</sup> Sísaga mó mahraréna, Peh morá wéhreq wene ahninkáwáráreq míarowe. <sup>12</sup> Ábákawagá wenabonsabé, Nániboo, amahnága arene

ménsámehnsá saraqme náio urairana sibowágá wene ménsámehnsá saraqme náriátáire.

<sup>13</sup> Náriátáirana ábákawagá táhmaroraq mitaq ména wene ménsámehnsá sokah sokahue íre wahto wáhnaupéqté ké suwahpeq pokéna mitaq mívaritaiq wega ahbabáq sansa mira aruqarurainsabé wene móne apubúue parabaguraire. <sup>14</sup> We tabonah ani ukurairana mitaq anotah ehwéhrarairana we arupibiuraire. <sup>15</sup> Arupibiurainsabé wega mibeqté ániné arambehri aní úkurairana wene wahnahnka, Uworapeq néne póéráhqtaq kowahnahnúno atáráire. <sup>16</sup> We áhnte arúpíbiurairana póéráhqka narotaq sene táhutahuq nahrahurairara mó kegá we íre návátówe.

<sup>17</sup> Minayabe wene múguwahgu iwíáh suena tábúsoqme iwíáhéna, Nánibone arambehrio ke áhnte topáh kéhranawe íné mahtaq nirupinsabé pukorahuge. <sup>18</sup> Íné mahtaq suena nánuwahpeq pokue nánibonsabé mahrarinie. Nániboo, ahbabárurautaq arereq Manikánseq ahbabáraitáráuge. <sup>19</sup> Ahbabáraitáráunsabé mókakewe ínénsabe, Nénahnine íre ainto. Peh arene arambehri aní míankeheé arambehriúno ainto teawiníe éna <sup>20</sup> mitaq suena wenaboba pokuraire.

We áhníbórá suritaiq wenaboga tagéna arutaboírue pehbeheráh weba kure kogáhkoue nánkóqnarairana <sup>21</sup> wenahninká wensabé, Nániboo, ahbabárurautaq arereq Manikánseq ahbabáraitáráuge. Mókakewe ínénsabe, Nénahnine íre ainto uraire.

<sup>22</sup> Urairana abowágá wene arambehrio keyábé síáhrabéna sensabé, Kaweq káhq ambántá apubúue mewe suki atáhro. Wene

ayahnkarapí kera suki ateq wene aigarápí súu suki atáhiro. <sup>23</sup> Kaweq kaho áráhq subiqme moráráq táhutahuréq iwíáh iwíáhonehe. <sup>24</sup> Nénahni pukuraime amahnága oga míéhre. We taqnobaguraime amahnága ábóraq míéh púaq iwíáh iwíáhonehe uraire. Segá táhutahuq kawerarera iwíáh iwíáhuowe.

<sup>25</sup> Iwíáh iwíáhurowana awahwágá wene sotápéqté séna ábáhruro irena <sup>26</sup> arambehri anínsábé, Aneroo kasenuraire. <sup>27</sup> Kasenurairana, Arenábáq séna awaho ani míéhnsábé arenaboga káho áráhq subiqme nanehe uraire. <sup>28</sup> Urairana awahwágá anotah abíáhnsánéna nahupeq íre kibekurairana wenaboga tueyokue wensabé, Máho ue áhrabéna, Aru ukiqmewé kiinsahwé aito uraire. <sup>29</sup> Urairana awahwágá wenabonsabé, Ínéwé áhnte opéq arene arambehri mira aruqaruruge. Arene ehweh íre anterutauge. Ínéreq néne iyahnaboreqka ábáhrigeheé arega méme áráhqmé íre níátóne. <sup>30</sup> Arenahninká ahababáq ininsónseq arene ménsámehnsá parabaruenta sirah arega káho áráhq subiqme náwene uraire. <sup>31</sup> Urairana abowágá wensabé, Are nénahni móne. Arereq ínéreq moráráq mía míaúye. Moke matió ménsáméhnsámé areneákáq matioye. <sup>32</sup> Arenábáq pukuraime amahnága oga míéhre. We taqnobaguraime amahnága ábóraq míéh púaq itega iwíáh iwíáhue ábáhrúnawe ábérehre uraire úwe.

*Ménsámehnsá tínáhuue mirai anínká miraurains-abé pabeqme ehwéhne.*

<sup>1</sup> Sísaga we kéro keyabé mó pabéqmé éhwéh mahraréna, Áhnte monéákáq wéhné ménsámehnsátaq arambehri anínká auráq átáriraire. Átárirairara mó kegá wene wahnahnsabé, Arene arambehri anínká íre kawerue wahnahnire urowe. Urowana wene wahnahnka irena <sup>2</sup> mi anínsábé áhrabue kasenéna, Arene áhwára áhwára sansánsábé teniémé aiq pútaq ehwéhpo? Tenio. Arega néne ménsámehnsá moke kawerare mókake minawari íre wahnahninkehe uraire.

<sup>3</sup> Urairana mi anínká wewe náhenéna, Néne wahnahnka kaqnuahnaraqmé aneq arámbéhrí ininkono? Íné nonáwehq ube arámbéhrí íre miraorahuge. Móneyabé ineh ineheyabé áhnte niyehitehre. <sup>4</sup> Íné iwíáhume tínáhuakáq kegá néne iyahnabo úkigehboq sene tínáhu maratarinie. Miraonaraqmé mókake néne arambehri íre kahnaraq sega íné mehweh aintera sene nahtapeq máho aintera kirabo aintagéhe íwíáhurstaire. <sup>5</sup> Wega mira íwíáhéna tínáhuakáké ké síáhrabéna ebeq surai anínsábé, Néne wahnahne tínáhuue árahue kehro uraire. <sup>6</sup> Árahue kehro urairana, Obenkisa óéri antéhyá\* 100 antéhyá merauge urairana, Mah pepáhqtáq mahraue sehiranúno éna ínéga 50 obenkisa óéri antéhyá awinauge ue sehiranúno teawátáire.

---

\* **16:6:** Óéri anome óríwi awankátápéqté sérá anone. Óríwi awánkánsábé éhwéhmé púku anehepeqte séhírámé “Manikáne Púkuipéq Kéh Áwahe Éhwéhne” ue kéhrabeq tagáhnno.

<sup>7</sup> Anehe surai anínsábé, Néne wahnahne tínáhue árahue kehro urairana, Wítíwe 100 ambékí merauge urairana, Mah pepáhqtáq mahraue sehíranúno éna ínégá wítíwe 80 ambékí awinauge ue sehíranúno teawátáire.

<sup>8</sup> Wegá mina tahnsa urainsabé wene wahnahnka wensabé iwíáh iwíáhéna, We ahtebia áníne uraire.

Mah marákóipéqté kégá mah marákóipéqté sánsá aiq ahtebahwe. Minayabe ménsámehnsá paiqmaráhnsábé sene sánsánká téhrehrabeq nogó kéné sánsá kiotaikowe.

<sup>9</sup> Teiníboq írátíáhro. Áhnte ke itene iyahnabo míagehboq mah marákóipéqté ménsáméhnsá náriéro. Mina parabagína tanáhráq oga mérapeq sega mitaq mehweh aitagéhe úwe.

<sup>10</sup> Sísaga we kéro keyabé mó mahraréna, Pehgáriq arámbéhrí kawerue mirai anínká anotah arámbéhrí moq kawerue mirainkehe. Pehgáriq naneq pehipi meyéh anínká anotah naneq moq aebóorahire. <sup>11</sup> Arega mah marákóipéqté ménsáméhnsá íre kawerue wahnahninaraqmé árahue oga mía mía arámbéhrí mirainibo? <sup>12</sup> Mó aniné ménsáméhnsá íre kawerue wahnahninaraqmé arega wahnahninkeheéna insega ménsáméhnsá airaiq awinkéhbo úwe.

*Téhtaré wáhnáhné arambehri moráráq íre seh-gioráhi ehwéhne.*

*(Mátíyu 6.24)*

<sup>13</sup> Sísaga mó mahraréna, Arambehri anínká téhtaré wáhnáhné arambehri íre moráráq sehgoráhíre. Wegá mó wahnáhnésábé awahbéna mó wahnáhnésábé íre awahbanae. Wegá mó

wahnáhné arambehri kawerue sehgiena mó wahnáhné arambehri áhwára áhwárainae. Mina inserah itega Manikánsabe irutaboiro sansánkákáq móneyabé irutaboiro sansánkákáq íre moráráq sehgióráhowe úwe.

*Sísaga Manikánka wahnah wahnahnirabeqsabé teriu ehwéhne.*

<sup>14</sup> Sísaga mah ehwéh mahrarúwara Péhrasi kegá irera móneyabé sirutaboiro puara wensabé awiréh atáhwe. <sup>15</sup> Awiréh atáhwana wega sensabé, Mó kegá, Ite kaweq ke wóe aitageheéra arambehriowe. Manikánka itene kopípéq irupipeqté íwíáh tagariéhre. Wehukega íwíáh íwíáh atáh náneqme Manikánka mi naneqsabé abehq náneq mire atéhre.

<sup>16</sup> Wání meri merini aní Sóniga íre sútaq Mósísine ehwehnikakáq Manikáne ehweh iraru kené ehwehnikakáq kowe. Kowana Sóniga suraitaq Manikánka wahnah wahnahnirabeqte kaweq ehwéh tei teinúne. Teinúnara ómi kegá págegeue mitaq kioráhúne íwíáhowe.

<sup>17</sup> Íopeqkákáq mah marákó márakóákáq mókake tabanaginae. Peh Manikánka sehgiro i ehwéhme mi ehwéh pehgáriq íre tabanagorahire.

*Sísaga wehga wene ahre kaqsueyabe irarú ehwehne.*

*(Mátíyu 5.31-32, 19.9; Máhka 10.11-12)*

<sup>18</sup> Wene ahre kaqsuena mó ahré meyéh ánínká aiq ahabárire. Sutai ahré meyéh ánínká moq ahabárire úwe.

*Áhnte monéákáq wéh iraipéq míarainsabé ehwéhne.*

19 Sísaga Péhrasi keyábé mó mahraréna, Menah áhnte mensáméhnsánkákáq wéhgá kaweq ambántámári aneranerue ména ahriahri kaweq tahutáhúq naruq narururaire. <sup>20</sup> Wega miraurairana tabonah náonkakáq ání wenáwíq Árásárúsi áhnte mensáméhnsánkákáq wéhné ogesáh ogesáhrapeq tútuue ména <sup>21</sup> mi wehné táhutahuq apipi nanieéna mitaq míarairana iamárínká séra wene náo wana wananurowe.

<sup>22</sup> Tabonah ani pukurairara íópeqté kégá wenawa meqmera Maniká míéhrabeqte aní Ébáráhmaba móátárowana áhnte mensáméhnsánkákáq wéh moq pukurairara maisiarówe. <sup>23</sup> Maisarówana wenawanka iraipéq ména anotah erurairana kamahuraire. Wega senahpeq tagarairara íre wahtopeq irerebeq Ébáráhmareq Árásárúsireq moraráq míaroyana tagarairaire. <sup>24</sup> Tagéna Ébáráhmansabé áwíahraqséna, Ébáráhma nániboo, ínénsabe arutaboirainte Árásárúsi eqmarehnana wene ayahnkara wánípipeq pámbáhue ninehbíraq tabaintahnana titiríno. Mah iráipéq anotahtaq níéríre uraire.

<sup>25</sup> Níéríre urairana Ébáráhmaga wensabé, Náníbáre. Are oga míarona tanáhráqmé áhnte kawéq náneqkakáq míaronana Árásárúsi tabonah ani míarairaire. Minayabe iwíáhue tagáhnno. Amahnága we mahtaq kaweqtaq míéhrah arewe mitaq kamahóne. <sup>26</sup> Móme ite ákáhpi mentú kéhnsabé mahbeqté kégá mibeq íre tuoráhúnara mibeqté kégá mahbeq íre kioráhowe uraire.

<sup>27</sup> Urairana wega Ébáráhmansabé, Nániboo,

Árásárúsi nánibone nahtapeq eqmaro. <sup>28</sup> Mitaq náníbáqmari moberíáh míáhwe. Mah iráipéq anotah érirabeq se moq siyehboq Árásárúsiga sensabé, Itene ahababáq sansa sueq kaweqtaq mía míaoro korerinkéhe uraire. <sup>29</sup> Urairana Ébárahmaga wensabé, Sega Mósísireq Manikáne ehweh iraru kereqne ehweh matíáhwe. Mina iragéhe uraire. <sup>30</sup> Urairana, Ahqáho. Sega mina íre iragéhe. Pukia anínká oganúkéna korerinaraqmé se irera sene ahababáq sansa suaneherawoe uraire. <sup>31</sup> Urairana Ébárahmaga wensabé, Sega Mósísireq Manikáne ehweh iraru kereqne ehweh anetaníbo íwíáhirataqmé pukia ánínká oganúkéna terinaraq sega wene ehwehnsabé moq anetaníbo íwíáhéra kaweq ke íre ukoneherawoe uraire úwe.

## 17

*Ahababáq sansanká aiq pútare atona sansá saiq-naruahráhi ehwéhne.*  
(Mátíyu 18.6-7,21-22; Máhka 9.42)

<sup>1</sup> Sísaga we kéro keyabé mahraréna, Síúgio kewé anotah ahabábárowe. Mah marákó marákóipéq ahabárorahi sansá peh kagaire. Áúgii anímé ahababáq áhwáreh puana Manikánka anotahtaq kamah awinawire. <sup>2</sup> Wehukenínká ínénsabe aiq pútare aintéh aní ahababáq sansa áúgi ínaraqmé anotahtaq íre kawerire. Áúgii anínká káriq aní áúgi ínaraqmé wene anuopi anotah ebáh táhru táhruue púrúrúia káwéhúpípéq tuparuahnana wánípeq tupekitaq tahirímé aiq kaweri irino. Iteite kawerurero úwe.



<sup>3</sup> Sísaga mó mahraréna, Arene iyahnabo anínká ahbabárinaraq ehweh ato. Ehweh atéhnaraq wega arensabé, Íre kaweruge. Móme íre mirainie ínaraqmé insahwé ate wene ahbabáqsabe mó íre iwíáhúno. <sup>4</sup> Wega peh morá wéhékáh abapete téhtaré tánáhráq are ahbabárue ue anehe wega, Íre kaweruge. Mi ahbábáq suaníe ínaraqmé wene ehwehnsabé aiq pútare ate wene ahbabáqsabe íre iwíáhúno úwe.

*Sísaga aiq pútare atéh sánsánsábé teriu ehwéhne.*

<sup>5</sup> We kéro kega Sísansabé, Itega kaweqtaq aiq pútare atanéhboq séhréh aito uwe. <sup>6</sup> Séhréh aito uwana wega sensabé, Arene iwíáhwé awanká ayu pehgáriq ayú tahnsa kahnaq itega ano-tah awánkánsábé, Are sawikue móbeq sóreq waní káwehupípéq kogahno irataq mi awánkánká itene ehweh sehginawire úwe.

*Sísaga kaweq arámbéhrí aniné sánsánsábé irarú ehwehne.*

<sup>7</sup> Sísaga mó mahraréna, Wahnah korégá wene arambehri anínsábé, Néne sipisípiqtaq wahnahnúno anehe néne sotápéq koarambehriúno atéhrana tupekináinara wega sotápéqté arámbéhrí suena wene wahnahne nahtapeq sinae. Wene wahnahnka wensabé, Aiq míre. Sewe náhno inabo? <sup>8</sup> Írakaumo. Wahnah korégá wensabé, Néne táhutahuq tíare tahberapeq mewe ménánio éna ínéga nawe parabarúáhnaraq arene táhutahuq nankehe inae. <sup>9</sup> Minawé peh arambehri aniné arambehri puana wega miraitaq wahnah korégá kaweróne inabo? Írakaumo. <sup>10</sup> Mina

inserah Maniká itene Wahnahne ehweh sehgióro. Kawerue sehgieq parabarueq iwíáhéq ite íre kaweq arámbéhriúna anímáí múne. Itega miraúnawe peh itene arambehri wire oro úwe.

*Sísaga kawerato anínká kouwekue kaweróne ato ehwéhne.*

<sup>11</sup> Sísaga Sarúsarama suwahpeq pokinaútaq wega Sámária marákóákáq kótaikue Kehrari marákóákáq kótaikue <sup>12</sup> mó ke suwahpeq kúwara inayáhnkú ké anotah naonkákáq kégá weba suwe. Mó ke insoq sitéhneho éra sega móbeq iriwe méra <sup>13</sup> áhrabéra, Sísao, are anotah aní móne. Arutaboiraito uwana <sup>14</sup> Sísaga se tagéna sensabé, Manikáne ehweh mibeq mahbeq aritáh kébá pokue itene náo kaweraginsabé sokigi ariéro úwara pokue ahtapeq kutaq sene náo kaweragúwe.

<sup>15</sup> Peh morá anínká wene náo kaweragú tagéna kouwekue Manikánsabe anotahtaq iwíáh iwíáh atena <sup>16</sup> Sísane aigárápí abiah maraipérue káúqmunue iwíáh iwíáh atena kaweróne atowe. Mi anímé íre Asiu aníne. We Sámária marákórápéqté aníne. <sup>17</sup> Sísaga we kasenéna, Inayáhnkú kaweraitóge. Mó abapete itaréitaré anímáí eheq míahe? <sup>18</sup> Aneqsabé peh morá wáhnaupeqté anínká kouwekéna Manikánsabe iwíáh iwíáh atehro éna <sup>19</sup> wensabé, Irigue pokúno. Aiq pútare aintahnaga kaweratéhre úwe.

*Sísaga tuina tanáhráqsábé éhwéhne.*

*(Mátíyu 24.23-28,37-41)*

<sup>20</sup> Péhrasi kegá Sísaba séra wensabé, Manikánka wahnah wahnahnína tanáhráq ahkake sinabo

uwana wega sensabé, Manikánka wahnah wahnahnína tanáhráq wehukega siuratate íre tagahrahowe. <sup>21</sup> Wehukega, Mahtaq kéhre. Mitaq kéhre íre irarerahowe. Manikánka wahnah wahnahnime amahnága ite miáhrabeq ábórarire úwe.

<sup>22</sup> Sísaga we kéro keyabé mó mahraréna, Mókake itega íné wehukení úku aní túóna tanáhráq níwénunue irutaboírég íre tagagehe. <sup>23</sup> Mi tanáhráq sinaínaraq mó kegá, Mitaq koragahro. Mahtaq seragahro teírataq sene ehweh íre aiq pútare aritáhro. <sup>24</sup> Sokeqsúéhraana apubúue moke íópeq téhrehnserah íné wehukení úku aní túóna tanáhráq tuinauge. <sup>25</sup> Téhwe mah tanáhráq wahnahno kegá ínénsabe, Iuwahriehre aintera kamah aniera nubiq suagéhe.

<sup>26</sup> Naho naho Nóah mío tanáhráq wehukega ahababárera miraunserah íné wehukení úku anínká tuinie onaraq mi tanáhráq oga miéhra kegá miraigehe. <sup>27</sup> Anotah waní pianaú tanáhráq wehukega ahababárera ahriahri miraunserahnéra táhutahuréra ábáhréra pahuiruwana Nóahga wene sípiipéq kibekúwana anotah ibónsúwana wání pionka moke subipáhraruowe.

<sup>28</sup> Mó aní wenáwíq Árótae. We wáhnaupéqté ké suwahpeq Sóróma suwahpeq míotaq mi kegá íre irasa ké méra táhutahuréra paignanánéra ayu uqmarera nah pearówana <sup>29</sup> wega mitaq suena pokútaq íópeqté irobina tuwara mi ke moke tabikue pukuwe. <sup>30</sup> Mina unserah íné wehukení úku anínká tuinaona tanáhráq wehukega táhutahuréra seyene arambehri miraéra ahwiminirataq tuinauge.

<sup>31</sup> Mi tanáhráq sinaraq máhpeq míéhrrataq itene ménsámehnsá meyanehéq nahupeq kibekiyeho. Mina inserah sotápéq míéhrrataq itene nahtapeq kouwekiyeho. <sup>32</sup> Manikánka Áróthane ahre kamah awunsabe ahrreraq matiáthro. *(Stat 19.26)*

<sup>33</sup> Wehukeníká peh wewensabé arutaboirána peh wewe awahbeh iwíáh mira aruqaruri anímé oga mérapeq íre awaq miahráhire. We awahbeh iwíáh suqsuri anímé oga mérapeq awaq miankéhe úwe.

<sup>34</sup> Sísaga mó mahraréna, Íne wehukení úku anínká túónaraq mi tanáhráq inokáhpeq téhraníte morá máhríqtáq sugéhrrataq Manikánka mó aní merena mó aní mitaq auwanae. <sup>35</sup> Téhrínitégá aboyanirataq mó iní merena mó iní mitaq auwanae. <sup>36</sup> [Téhtaré wéhgá sotapéq arampehrirataq mó weh merena mó weh mitaq auwanae úwe.] <sup>37</sup> Úwara we kéro kega wene ehweh irera Sísansabé, Itene Wahnahno, ehppo uwana wega sensabé, Pusa káné anonka kéhrabeq kúqnumarinká ínsínsíowe úwe.

## 18

*Sísaga pagu paguni kewéinínsabé pabeqme ehwéhne.*

<sup>1</sup> Sísaga we kéro kega púreré sansansabé anetaníbo iwíáhéq túbáh agiyehboq peh ahriahri púrerigeheéna mah pabéqmé éhwéhmé teriuwe. <sup>2</sup> Mó kené koti ehwéh iwíáhue irena sene koti kawerarítéh wéhgá wenawahpeq ména Manikánsabe íre áhrea mó keyábé íre iwíáh iwíáhurstaire. <sup>3</sup> Mi ke suwahpeq kéweiní ména mi

wehbá séyééna wensabé, Níwíoqneh aní túbáh aginkehboq ehweh ato teawa teawanuraire. <sup>4</sup>Téh séyéuraitaq mi weh ánínká wene ehweh íre irena ahqáho atáráire. Anehemé wega mó iwíáhéna, Ínéwé Manikánsabe íre áhrea wehukeyabé íre iwíáh íwíáhuge. <sup>5</sup>Peh mi inínká ínéba séyééna pagu pagu aintéhnsábé wene ehweh sehginíe. Íre sehgiónaraq wega mó séyééna pagu pagu aintahnaraq nuwahqsoreqninae uraire úwe.

<sup>6</sup>Sísaga mó mahraréna, Mi wehgá íre kaweqtaq ména mi iwíáhuraime íráhro. <sup>7</sup>Wega miraurainsabé Maniká tagariáh kégá ahriahri púreq aruqarurirataq Manikánka íre séhréh aritanabo? Wegá íre wahto tanáhráq peh túbáh aginabo? Írakaumo. <sup>8</sup>Teiníboq írátíáhro. Wegá se apubúue séhréh aritanae. Íné wehukení úku anínká mah marákóipéq kiwekona tanahráq mah kegá ínénsabe aiq pútare aintaneherabomo úwe.

*Téhq anitégá púreruya sansátaréyábé pabeqme ehwéhne.*

<sup>9</sup>Mó kegá iwíáhéra, Itebataq kaweq ke míone éq, Mó keyábé iuwahriehre uwana Sísaga mah pabéqmé éhwéh mi ke teriuwe. <sup>10</sup>Péhrasi anínká púrerinieéna Manikánsabe iwíáh íwíáh atáh náhtápéq kirairana táhkísi moné merai anínká moq púrerinieéna mitaq kiraire. <sup>11</sup>Péhrasi anínká iriwe ména wewensabé iwíáh íwíáhéna mahraréna, Manikáno, íné mó ke tahnsa ání íre míónsábé arensabé iwíáh íwíáh atóge. Ínéga aebówé, ahbabáqmé, mó kené ahre abariéwé íre mirau aní múge. Íné íre mahna táhkísi moné

meyéh ání tahnsa ání múge. <sup>12</sup> Ínéga mó wikíráq mó wikírárue arensabé iwíáhéna téhtaré wéhékáh táhutahuq awehriuge. Moke meyo náneqme saraqme abapete itaréitaré matawéna mó morá are náwa náwanuge uraire.

<sup>13</sup> Péhrasi anínká mahna tahnsa púrerurairana táhkísi moné meyhé anínká móbeq iriwe ména wene ahbabáqsabe ayehitarairana ibiséna aura marakóiperurawéna púreréna, Manikáno, íné ahbabáq ani míónsábé arutaboirainte kawerainto uraire.

<sup>14</sup> Sísaga mó mahraréna, Teiníboq írátíáhro. Manikánka táhkísi moné merai aní kawerataráirana wene nahtapeq pokéna kaweqtaq míarairana Manikánka mó aní peh áwé tagarairana wene ahbabáqkakaq mewena pokuraire. Aneqsabébo? Wewensabé iwíáh íwíáhi anímé Manikánka mi anínsábé, Pehgáriq aní míahno atankéhe. Íné pehgáriq aní múge íwíáhi anímé Manikánka mi anínsábé, Anotah aní míahno atankéhe úwe.

*Sísaga, Káriq anímárinká ínéba sewíagehboq ahqáho arítého ú ehwehne.*

*(Mátíyu 19.13-15; Máhka 10.13-16)*

<sup>15</sup> Sísaga káriq anímári táhtorankeheéra mó kegá meriqmera mórítówara we kéro kega mórító keyabé suwehgu aritera ahqáho arítówe. <sup>16</sup> Ahqáho arítówana Sísaga mi káriq anímárinábé, Máhoró éna we kéro keyabé, Mah káriq anímári ínéba sewíagehboq ahqáho arítého. Sega mira onserahno kegá Manikánka wahnah wahnahnirabeq awaq miagéhe. <sup>17</sup> Teiníboq írátíáhro. Mah káriq anímárinká Manikánka

wahnah wahnahnirabeqsabé sirutaboiorowe. Peh morá sega mira onserahno kegá mibeq kioráhowe úwe.

*Áhnte mensáméhnsánkákáq ánínsábé árahue oga mérapeq awaq mianabo i ehwéhne.*

*(Mátíyu 19.16-30; Máhka 10.17-31)*

<sup>18</sup> Wahnah anínká Sísansabé, Íwáhnoraníno, arewe kaweq aní míahne. Oga mérapeq awaq mianíboq anerininkono úwana <sup>19</sup> Sísaga wensabé, Aneqsabé kaweq aníne aintahno? Maniká webataq kaweqtaq mía míaire. <sup>20</sup> Sehgióro ú ehwehmé aiq ahtebáhne. Mi ehwéhnká mahraréna,

Mó aniné ahre weh abariiyeho. Mó aní subiq súého. Aebóiyeho. Mó keyábé péhe éhwéh arítého. Iteinoibone ehweh ireq se séhréh arítáhro ire úwe. *(Kisim Bek 20.12-16; Lo 5.16-20)*

<sup>21</sup> Úwana mi anínká Sísansabé, Káriq aní míarautaqqákákáq amahnágaákákáq mi ehwéh sehgiúge úwana <sup>22</sup> Sísaga mi ehwéh irena wensabé, Peh morá náneq íre miraóne. Moke matiahna mensáméhnsá paiqmaqme móne mewe tabonah ke nário. Mirainaraqmé íópeq kaweq naneqmarí matiankehe. Tabonah ke moke nárie íné séniro úwana <sup>23</sup> mi anínká irena áhnte mensáméhnsá ko púana wene arupipeq umeh agúwe.

<sup>24</sup> Sísaga mi weh tagéna mahraréna, Áhnte mensáméhnsá matiáh kegá Manikánka wahnah wahnahnirabeq kiyabe anotah pagégéue mirao naneq mire. <sup>25</sup> Kéhma anotah kane. Mi kanká wai abahrabahpipéq kéagínayabé

págegeue mirai naneq mire. Mina inserah áhnte mensáméhnsá matíéh ánínká Manikánka wahnah wahnahnirabeq kinayabé anotah pagégéue mirai naneq mire úwe.

<sup>26</sup> Úwara író kega kasenáera, Minayabe insega oga mérapeq awaq miahráhiro ue kasenuwana <sup>27</sup> Sísaga sensabé, Wehukega íre miraoraho naneq Manikánka miraorahire úwe.

<sup>28</sup> Pítaga wensabé, Iteruwahpeqkakáq moke mationa naneqkakáq sueq kérone úwana <sup>29</sup> Sísaga sensabé, Teiníboq írátíáhiro. Manikánka wahnah wahnahnirabeqte arámbéhrí miraoneheéra sene nah súáhmé amahnága áhnte mó nahmárí awaq miagéhe. Mi arámbéhrí miraoneheéra sene ahrreromé, sensibáqmarimé, sensinoibowe, sene animárimé súáhmé <sup>30</sup> áhnte mó kegá sensuwahrah úkigehe. Mókake oga mérapeq moq awaq miagéhe úwe.

*Náhmbáh 3 tanáhráq Sísaga, Íné pukéna oga úkinauge ú ehwehne.*

*(Mátíyu 20.17-19; Máhka 10.32-34)*

<sup>31</sup> Sísaga moke we kéro ke móbeq sitena sensabé, Íráhiro. Manikáne ehweh iraru kegá íné wehukení úku anínsabé naho sehiranuwe. Itega Sarúsarama suwahpeq pokonaraq sega sehiranunserahnue mó kegá miraigehe. <sup>32</sup> Nánuwahrah Asíú kegá nahnso kebá móintagéhe. Sega niwiréh aintera abehq éhwéh aintera tehqni aintera <sup>33</sup> nubiq marera nubiq suagéhe. Nubiq suehrana íné pukéna apahtáro wéhékáhtáq oga úkinauge úwara <sup>34</sup> we kéro kega mi ehwéh íre ahtebowe. Mi ehwéh áwahe kopípeq ko púara sirupipeq íre írówe.



*Sísaga aura pira ání kawerato ehwéhne.  
(Mátíyu 20.29-34; Máhka 10.46-52)*

<sup>35</sup> Sísaga Séríko suwahpeq wahto kútaq aura pira ánínká ahnayehráq tútuue ména ineh inehúwe.

<sup>36</sup> Áhnte kegá sótaikuwana mi anínká irena sensabé, Aneroo úwara <sup>37</sup> sega wensabé, Néhsara suwahpeqte ání Sísá sotaikire teawúwe. <sup>38</sup> Teawúwana wega anotahtaq mahraréna, Sísao, Tébitine anahwao, ínénsabe arutaboirainto úwara <sup>39</sup> ebeq ku kegá wensabé awehgu atera, Ehiya míahno atówana wega íre túbáh agia peh anotahtaq mó mahraréna, Tébitine anahwao, ínénsabe arutaboirainto úwe.

<sup>40</sup> Arutaboirainto úwana Sísaga mitaq kowéna, Niyáhrabi aní meqme sero úwara meqmera suwe. Suwana Sísaga wensabé, <sup>41</sup> Aneratanínkono úwana wega, Néne Wahnahno, íné tagéyabe nuwahbehre úwana <sup>42</sup> Sísaga wensabé, Arega aiq pútare aintahnaga aiq kaweratóge. Tagáhno úwe. <sup>43</sup> Tagáhno úwana apubúue tagéna Sísá kérena Manikánsabe iwíáh iwíáh atowara mina tago kegá moq iwíáh iwíáh atówe.

## 19

*Sísaga táhkísi moné meyo aníné nahtapeq pokú ehwehne.*

<sup>1</sup> Sísaga Séríko suwahpeq kure kótaikinaúwana <sup>2</sup> táhkísi moné meyo kene wahnah wenáwíq Sákíási míowe. We áhnte monéákáq ánínéna, <sup>3</sup> Sísá taganie iwíáhéna áhnte kegá kígiúnsabe we egahq aní púana Sísá íre tagahrahúwe. <sup>4</sup> Minayabe wega pehbeheráh wehuke kótaikue Sísá taganieéna we sína ahtápéqté áwánkátápéq kire kirútuue míowe.

<sup>5</sup> Tútuue míowana Sísaga wahtotaq séna aura pankeqme Sákíási tagéna wensabé, Sákíásio, arene nahtapeq kowíaniboq are apubúue maraipéq tueagúno úwe.

<sup>6</sup> Tueagúno úwana Sákíásiga apubúue tueague aru eyoyóéna Sísá mehweh atena wene nahtapeq móatowe. <sup>7</sup> Mina tago ke ómiga abiahnsanéra áhnte ahbábáq ániné nahtapeq pokinsabé íre kawerire uwe.

<sup>8</sup> Sákíásiga wene nahtapeq iriwe ména Sísansabé, Néne Wahnahno, néne ménsámehnsá saraqme tabonah ke ákáhtaq náriníe. Menahmé ínégá mó keyábé péhe éhwéh teriena sene móne pehipi merauge. Amahnága merau moné itaréitaréráq mer-aunserahnue mi ke náriníe úwe. <sup>9</sup> Úwana míó kega írótaq Sísaga wensabé, Arene ahbabáq sansa suah-nayabé iboramé ite mi karírónání kaweraitóge. Arewe amahnága aiq pútaq Ébáráhma kahnáh ání míahne. <sup>10</sup> Íné wehukení úku anínká ahbabáq ke kabarue kawerinieéna tumióge úwe.

*Sítárirarai monéyábé pabeqme ehwéhne.  
(Mátíyu 25.14-30)*

<sup>11</sup> Sega ahtapeq kure Sarúsarama suwahpeq wahto kutaq wereq nogú kega iwíáhéra, Manikánka wahnah wahnahnirabeq ábóraq aginaire unsabe Sísaga mah pabéqmé éhwéh teriuwe. <sup>12</sup> Teriena, Anotah wehgá íre wahto wáhnapeqté kéné marakóraq pokinauraire. Mi wehgá iwíáhéna, Pokinaurabeqte wáhnáh ánínká ínénsabe, Arenawahpeq pokue arenawahrah kowahnahnúno teninkeheéna pokinauge iwíáhuraire. <sup>13</sup> Pokinauraitaq wene arambehri

ke nayáhnkú ké síáhrabéna 20 Kína 20 Kína ue sítáráwéna sensabé, Íné pokona tanáhráq mah moné matawéq paiqme arambehriéwehrana kouwekono éna pokuraire.

<sup>14</sup> Pokurairara wenawahraha wensabé íre suwahbéna wáhnaupeqté wáhnáh ánínsábé, Areba ki anínká itetaq wahnahnéyabe iuwahriehre koreawéro éra mó ke we anehe eqmaq súátówe.

<sup>15</sup> Pokurai wehgá mi wahnáh arámbéhrí mewena wenawahpeq kouwekéna wene arambehri ke móne átárlaro keyábé síáhraburaire. Síáhrabéna sensabé, Ítáu moné arámbéhrí árahuroo kasenuraire.

<sup>16</sup> Árahuroo kasenurairana ebeq surai anínká wensabé, Anotah weh wóne. Arega níátóna moné mi 20 Kínáráté áhnte paiqmaqme amahnága arene móne íregárita q Kiná 200 Kína úkire urairana <sup>17</sup> wahnah korégá wensabé, Kaweróne. Are kaweq arámbéhríóna aní móne. Pehgáriq arámbéhrí tábúsoq marahna puah mókakewe arega nayáhnkú kéhíná suwahpeq wahnahninkehe uraire.

<sup>18</sup> Mó arámbéhrí ánínká séna wensabé, Anotah weh wóne. Arega níátóna moné mi 20 Kínáráté paiqmaqme amahnága arene móne 100 Kína úkire urairana <sup>19</sup> wahnah korégá wensabé, Arewe moberíáh kéhíná suwahpeq wahnahninkehe uraire.

<sup>20</sup> Urairana mó arámbéhrí ánínká séna wensabé, Anotah weh wóne. Arega níátóna moné meyo. Ínéga ambantaraté úbíqme kopéq matauge. <sup>21</sup> Íre arega arambehrióna naneq mewe meweóne. Íre arega uqmatona naneq naruq naruróne. Are

págege wahnáh ání míahnayabé áhreéna arene móne kopéqmarena pehipi áwúge uraire.

<sup>22</sup> Urairana wahnah korégá wensabé, Arewe íre kaweq arámbéhríóna aní móne. Arega iraréna ehwéhnsábé ehweh atanauge. Íre ínégá arambehriu naneq mewe meweuge éna wino. Íre ínégá uqmatau naneq naruq naruruge éna wino. Íné págege wahnáh ání míó púah <sup>23</sup> aneqsabé néne móne pénkiipéq íre matono? Mirauronaraq tahirímé amahnága áwátáu monéákákq pénkiipéqté mónéákákq meyó irino éna <sup>24</sup> mitaq míaro keyábé, Túbáh agurai aníné móne meweq áhnte kiná 200 kína matíéh ání náwéro uraire. <sup>25</sup> Urairara sega wensabé, We amahnága 200 Kína matíéh mino urowana <sup>26</sup> wahnah korégá sensabé, Teiníboq írátíáhro. Áhnte matíéh ání mónkakákq awiníe. Pehgáriq matíéh ání mina meyhanna we tabonah ani míankehe uraire. <sup>27</sup> Wahnah korégá mó mahraréna, Néne naruowe ínénsabe itene wahnah aní méyabe iuwahriehre uro kewé meriqme sure ínégá tagahnaq subiq súáhro uraire úwe.

*Sísaga Sarúsarama suwahpeq kú ehwehne.*

*(Mátíyu 21.1-11; Máhka 11.1-11; Sóni 12.12-19)*

<sup>28</sup> Sísaga mah pabéqmé éhwéh teriena ahtapeq ebeq kure Sarúsarama suwahpeq pokinaúwe. <sup>29</sup> Wega Páítápási suwahpeq Pétáni suwahpeq wahtotaq kútaq Óríwi sawéhrápéq kiuwe. Sísaga we kéroya anité eqmaq suanaútaq <sup>30</sup> sensabé, Isebeq wahtotaq kehiná suwahpeq pokotao. Mitaq kirataq iyaráh ká tónki aráhq wehuke íre áhkokóue nogí ká tagéta pugeqme meqme

setao. <sup>31</sup> Pugeréhrataq mó anínká itensabé, Aneqsabé pugerehyo ínaraq wensabé, Itene Wahnah áhkokóue kinkeheéta meroye teawétao éna eqmaq suowe.

<sup>32</sup> Eqmaq suowara pokue Sísaga teriunserah iyaro tonkí áráhq tagéra pugeróye. <sup>33</sup> Pugeróyataq mi kané sibowárehga, Aneqsabé pugerehyo uwara <sup>34</sup> sega sensabé, Itene Wahnah áhkokóue kinkeheéta meroye uyana sega, Meqme pokotao uwara <sup>35</sup> mi ka meqme Sísaba seweqmera sene korósi mi kané abobiahtaq uwiq máróyana Sísaga mi tonkíné ahbobiahtaq kierútu agúwe.

<sup>36</sup> Tónkiga Sísá áhkokóue pokútaq wereq ku kegá Sísansabé iwíáh iwíáh ató púara sene korósi ahtapeq uwiqme awahrirarówe. <sup>37</sup> Mi ah Óríwi sawéhrápéqté tutaq Sarúsarama suwahpeqsabé wahtotaq kútaq áhnte we kéro kega Sísaga págegeue mirau otáq sánsámárínsabé iwíáhue tagéra Manikánsabe iwíáh iwíáh atówe. <sup>38</sup> Sega anotahtaq mahraréra,

Itene Wahnah áwírue si aní anotah anínsabé iwíáh iwíáh atone. Manikánka iru pehwehrué aitenena we íópeq míéhraq wensabé iwíáh iwíáh atone uwe. *(Buk Song 118.26)*

<sup>39</sup> Uwara Péhrasi kegá Sísansabé, Are kéréh kégá túbáh agiyehboq ehweh arito uwana <sup>40</sup> Sísaga sensabé, Teiníboq írátíáhro. Sega túbáh agotaq tahirímé ebahmarínká anotahtaq iwíáh iwíáh aintáh irino úwe.

*Sísaga Sarúsarama suwahpeqte keyábé ibisó ehwehne.*

<sup>41</sup> Sísaga Sarúsarama suwahpeq wahtotaq kútaq mitaq tagéna mibeqté keyábé arutaboirána ibisówe. <sup>42</sup> Ibiséna mahraréna, Iborá itewe Manikánka insahwé aitéh sánsá ahtehtahtaq tahirímé nirupipeq eyoyó irino. Amahnágawé itega íre tagariahrahowe. <sup>43</sup> Mókakewe itene naruoga iteba séra ite abugéqnáhnue moke itene ahmarí paitáwéra wahnahnigehe. <sup>44</sup> Sega itene nahmarí sokoruera itereq itene animárínseq subipáhraruagéhe. Sega moke perehnehnia ebáhtáté miráia naneq sokoruagéhe. Manikánka ite kaweraite tanahráq íre ahtebónayabé mókake itene naruoga miraigehe éna arutaboíraritowe.

*Sísaga Manikánsabe iwíáh iwíáh atáh náhtápéte paiqnanánu ke máhpeq kaqsuo ehwéhne.*

*(Mátíyu 21.12-17; Máhka 11.15-19; Sóni 2.13-22)*

<sup>45</sup> Sísaga Manikánsabe iwíáh iwíáh atáh náhtápéqté wíráipéq kibekéna mitaq paiqnanánu ke máhpeq kaqsuena <sup>46</sup> sensabé, Manikáne ehwehnka mahraréna,

Néne nahme púreré nahne ue áwíratagéhe ire. *(Aisáia 56.7)*

Itega miraonka mah nahmé aebó kégá mehwtíáhnserah nah úkire úwe.

<sup>47</sup> Sísaga mó wehekáh mó wehekáhnue mitaq síwáhnorúwara Manikáne ehweh mibeq mahbeq arítáh kéreq Mósísine ehweh síwáhnoro kereq mibeqté wáhnáhnárínseqka Sísá subiq suanéhboq aneq ehwéh atanéhnkono éra sío síouwe. <sup>48</sup> Sísaga síwáhnorútaq áhnte mó kégá wene ehweh ireyabe suwahbó púara we subiq suanehe iwíáhu kégá íre suboráhuwe.

## 20

*Sísansabé, Insega miraúno atáráiro u ehwéhne.*  
(Mátíyu 21.23-27; Máhka 11.27-33)

<sup>1</sup> Sísaga mó wehekáh Manikánsabe iwíáh íwíáh atáh náhtápéqté wíráípeq síwáhnoréna kaweq ehwéh teriuwara Manikáne ehweh mibeq mahbeq arítáh kéreq Mósísine ehweh síwáhnoro kereq mibeqté Asiu kené ábóáwáh wéhreqka weba séra <sup>2</sup> kasenéra, Arega miraóna naneqme árahinie miraono? Insega miraúno atáráinsabé miraono? Teio úwe. <sup>3</sup> Teio uwana Sísaga sensabé, Ínéga moq itensabé kaseninie. <sup>4</sup> Sóniga wání meri merininkeheéna insega eqmaq áúwátáiro? Manikánka eqmaq áúwátáiro? Peh wehukega eqmaq áúwátóo? Teniéro úwe. <sup>5</sup> Teniéro úwara sega epéq sío síoéra, Anere teawenéhknono? Manikánka Sóni eqmaq áúwátáire teawénaraqmé wega itensabé, Aneqsabé wene ehwehnsabé íre aiq pútare atáróo inae. <sup>6</sup> Wehukega Sóni eqmaq áúwátówe teawénaraqmé mahta q sáhuríáh kégá, Sóniwe Manikáne ehweh irarurai aní míre íwíáho puara ebahnsa tuparuqme iubíyeho éra sío síouwe. <sup>7</sup> Síó Síoéra Sísansabé, Sóniwe insega eqmaq áúwátáiramo. Ite íre tagarione uwana <sup>8</sup> Sísaga sensabé, Itega íné íre teniéwe. Minayabe ínéga moq ínénsabe, Miraúno aintarái aní íre teiníe úwe.

*Sotáq wahnahnuro ahbábáq keyábé pabeqme ehwéhne.*  
(Mátíyu 21.33-46; Máhka 12.1-12)

<sup>9</sup> Sísaga mi keyábé mah pabéqmé éhwéh mahraréna, Wehga sonsoqme náhniáq sera ayu uqmarena mó keyábé, Néne sotáq wahnahnue

náwe soqintewáhro aritena mitaq suena íre wahto wáhnaupéqté ké suwahpeq kowéna íre wahto tanáhráq mitaq míraire. <sup>10</sup> Náhníáq sera irái tanáhráq wene arambehri anínsábé, Ákáhtaq koweyo éna sotáq wahnahnuro keba eqmatairara sotáq wahnahnuro kegá náhníáq sera íre náwasa subiqmarera kaqsutowe.

<sup>11</sup> Kaqsutowana so aboga mó arámbéhrí ání eqmatairara sega we moq subiqmarera íre kaweq sansá atera sera íre náwasa kaqsutowe. <sup>12</sup> Kaqsutowana so aboga mó aní eqmatairara sega we anotahtaq subiqmarera so wírá máhpeq tuparutowana <sup>13</sup> so aboga wewe náhenéna, Anerininkono éna niruní nénáhní eqmaraníe. Nénahni púara sega wensabé áhtenéra wene ehweh iragéhe éna wenahni anehe eqmataire.

<sup>14</sup> Eqmatairara we wahto kuraitaq sotáq wahnahnuro kegá we tagéra seye náhenéra, So abone ahninkáwá aiq sire. Mah so awaq mianéhboq subiq suanéhe íwíáhéra <sup>15</sup> táhtoqme máhpeq móatera subiq sutowe.

Sega mirauronsabé so aboga mi ke anere aritankéhbo? Teiníboq írátíáhro. <sup>16</sup> So aboga wene sotápéq séna wahnahno ke subiq suanawire. Wene sotáq mó kegá kawerue wahnahnigeheéna eqsitankéhe úwe.

Eqsitankéhe úwara sega wene ehweh irera mahraréra, Éhneh. Sotáq wahnahnuro kegá miraurome íre kawerurowe uwe. <sup>17</sup> Uwana Sísaga se ebitáwéna sensabé, Manikáne ehwehnka aiq mahraréna,



Nah píáh kégá suto wahqká moke nahwiahnsanse  
kiotaikire ire.\* *(Buk Song 118.22)*

Mah ehwéh áwahewé aiq ahtebaho kasenúwe.

<sup>18</sup> Kasenúwana mó mahraréna, Mi wahqtáq inahnsúbíra kené siyahnsamé piteginae. Mi wahqká megue wehukení subinaraq wene ayahn-samé abiro abiro aginawire úwe.

<sup>19</sup> Úwara Mósísine ehweh síwáhnoro kereq Manikáne ehweh mibeq mahbeq arítáh kéreqka seye náhenéra, Sísaga mi pabéqmé éhwéhne itepi parobehre íwíáhuwe. Mira íwíáhu puara sío síoéra, We táhtoqme karábúsiipéq móatanéhe éra peh mitaq sáhurío keyabé áhreu puara íre miraorahuwe.

*Sega Sísansabé, Táhkísi moné inse awenéhnkono kasenu ehwéhne.*

*(Mátíyu 22.15-22; Máhka 12.13-17)*

<sup>20</sup> Mósísine ehweh síwáhnoro kereq Manikáne ehweh mibeq mahbeq arítáh kéreqka Sísá táhtore tanáhráqsábé áwénunowara mó keyábé, Sísaba pokue péhe éhwéh teaweq, Arene ehweh ireyabe iuwahbehre oro. Wega ahbabáq ehweh irarinkehboq págegeue kasenéq áhwárawe tagahro. Ahbabáq ehwehnínaraq táhtoqme anotah wahnáhpá móatanéhe éra péheno ke eqmaq súówe.

<sup>21</sup> Eqmaq súówara kure Sísansabé, Íwáhnoraníno, ite tagarionawe arega iraréna ehwéhmé tábúsoqme ehwéhnóne. Arega anotah kereq pehgáriq kereqsabé peh monseráh íwíáhé peh Manikáne sansá ahriahri tábúsoqme pahsuqme íwáhnoróne.

<sup>22</sup> Minayabe teio. Aneq iwíáhono? Itega

---

\* **20:17:** Mátíyu 21.42 aigárápéqté éhwéh tagáhno.

Aroma kené wahnah aní Sísáhri táhkísi moné awenéhknono? Árahonehknono uwe. <sup>23</sup> Uwana Sísaga sega epéráhpéru iwiáh tagéna sensabé, <sup>24</sup> Ebah moné taganiboq ábóraq maro éna, Mah monéráq pikísahakáq áwíqkakaq insene kehro úwara <sup>25</sup> sega wensabé, Aroma kené wahnah anímé Sísáhrinee uwe. Uwana Sísaga sensabé, Aroma kené wahnahne náneq wewe náwéro. Manikáne naneg wewe Maniká náwéro úwe. <sup>26</sup> Úwara Sísane ehwehnsabé áhtenéra wehuke míópi Sísaga áhwára áhwára ehwéh íre irarúnsabe túbáh agéra ehiya míówe.

*Sísaga pusa ké iriwe oganúq sitankéhe ú ehwehne.  
(Mátíyu 22.23-33; Máhka 12.18-27)*

<sup>27</sup> Sáyúsi kewé pusa ké íre iriwe oganúq sitankéhe íwiáhu kee. Táhmaro mi kegá Sísaba séra wensabé, <sup>28</sup> Íwáhnoraníno, Mósísine sehiranka maharéna,

Íre aninkákáq wéh pukínaraq wenábáqka kéweini meyankehe. Mi inínká maqmarahna animarí wenawahne animarí míageheéna meyankehe ire. *(Lo 25.5)*

<sup>29</sup> Minayabe abapete téhranité se ábárahnahnah míarowe. Siwahwágá ahre mewena íre aninkákáq uraitaq pukuraire. <sup>30</sup> Pukurairana náhmbáh 2 abakáwágá awahwáné kéweini mewena íre aninkákáq uraitaq pukurairana <sup>31</sup> náhmbáh 3 abakáwága moq monseráhnurairaire. Moke mi abaráhnhahnahnka mi iní mótaq mótarue mewera íre aninkákáq urotaq orah animarí pukurowana <sup>32</sup> sinehemé mi iní moq pukuraire. <sup>33</sup> Moke mi

abáráhnhahnka mi iní meronsabé iriwe oganúq sitahnaraq insene ahre míanabo kasenuwe.

<sup>34</sup> Kasenuwana Sísaga sensabé, Mah marákó marákóipéqté wéhgá ahre meyháwara ahronká wehkowe. <sup>35</sup> Manikánka iriwe oganúq sitahna kegá ahre íre meyagéhe. Ahrega íre wehkigehe.

<sup>36</sup> Se íopeqté kégá mía mía onserah puara mó íre pukigehe. Manikánka se iriwe oganúq sitahna puara peh wene animárí mía míaiagehe. <sup>37</sup> Pusa ké iriwe oganúq site ehweh Mósísine sehiranka teíre. Uworapeqté káriq awánkánsábé íre tagia peh téhrówana irobinapipéqté éhwéhnká mahraréna,

Íné Ébárahmane Maniká múge. Íné Áhísáhkine Maniká múge. Íné Sékópane Maniká múge úwe. *(Kisim Bek 3.6)*

<sup>38</sup> Mi ehwéhnká sokigi aiímé Manikámé íre pusa kéné Manikáne. Írakaumo. We peh oga miáh kéné Maniká míre. Wega tagehme ómi oga miáhwe úwara <sup>39</sup> táhmaro Mósísine ehweh síwáhnoro kegá Sísansabé, Íwáhnoraníno, arega tábúsoqme iraréne éra <sup>40</sup> áhtenéra mó íre kasenuwe.

*Manikánka omaq ato aní éhweh Sísaga kasenú ehwehne.*

*(Mátíyu 22.41-46; Máhka 12.35-37)*

<sup>41</sup> Sísaga sensabé kasenéna, Manikánka merirankeheéna omaq ato aní we Tébitine anahwa wíre ewe. Mi ehwéhmé aneqsabé irarewo? Maniká itene Wahnahnka néne Wahnahnsabé, Niyah púpeq tútuue míéhnaraq arene naruo wahnahnarítárahno ire. <sup>42</sup> Manikáne Awanka Tébiti iwíáh atowana igonkó pukúipéq sehíranúwana mi ehwéhnká mahraréna,

Maniká itene Wahnahnka néne Wahnahnsabé,  
Niyah púpeq tútuue miéhnaraq <sup>43</sup> arene  
naruo saiqnariankehe atóge úwe ire. (*Buk  
Song 110.1*)

<sup>44</sup> Írátíáhro. Tébitiga mi anínsábé, Néne Wahnahne  
ato puana we árahue wene anahwa míanabo úwe.

*Péhrasi kereq Mósísine ehweh síwáhnoro kereqka  
ahbabárowe ú ehwehne.*

*(Mátíyu 23.1-36; Máhka 12.38-40; Árúka 11.37-54)*

<sup>45</sup> Ómi mió kega írótaq Sísaga we kéro ke  
teriena, <sup>46</sup> Mósísine ehweh síwáhnoro kegá  
mirao serahniyeho. Mó kegá se tagéra  
sensíwíq pankerageheéra ire wahto korosí  
úbíqmera nógówe. Segá máhkétirapéq nogótáq  
mó kegá se mehweh ariteyabe suwahbehre.  
Momiwí nahtápéq pokotaq kaweqtapéq tútuue  
méyabe suwahbehre. Táhutahurorabeq abowah  
wehwári tútuue miáhrabeq méyabe suwahbehre.

<sup>47</sup> Segá kéweinínsónsábé péhe éhwéh teriera  
sene ménsámehnsánkakaq sene nahnkakaq  
mewe meweowe. Ite kaweqtaq miáh ké wóe  
igeheéq wehuke miáhtáq ire wahtotaq púreq  
aruqaruowe. Mirao puana Manikánka ehweh  
aritahna tanáhráq se anotahtaq kamah arinkéhe  
úwe.

## 21

*Tabonah inínká Maniká náwu monéyábé éhwéhne.  
(Máhka 12.41-44)*

<sup>1</sup> Wehukega séra Maniká móne náwúrabéq áhnte  
monéákáq kegá mitaq móne náwúwana Sísaga  
tagówe. <sup>2</sup> Tabonah kewéinínká séna káriq pabúsá

móné náwuwana tagéna <sup>3</sup> mahraréna, Teiníboq írátíáhro. Mi tabónáh kéwéínínká náwí mónégá moke mó kegá náwé móné kiotaikire. <sup>4</sup> Segá sene pehipi matíáh móné náwéwana mah tabónáh kéwéínínká moke wene matíéh mónéwé aiq náwíre. Aiq náwí púana amahnága táhutahuq paiqmarahna moné íre kéhre. Minayabe wega náwí mónégá moke mó kegá náwé móné kiotaikire úwe.

*Sísaga, Manikánsabe iwíáh íwíáh atáh náh íre kaw-  
eraginawire ú ehwehne.*

*(Mátíyu 24.1-2; Máhka 13.1-2)*

<sup>5</sup> Táhmaro kegá Manikánsabe iwíáh íwíáh atáh náhtápéq tagéra mahraréna, Mah nahtáqmé áhnte kawéq ébáhmárí awahriq naneqmarí kéhre uwana Sísaga minayabe mahraréna, <sup>6</sup> Itega tagah naneqme mókake paentárara aruaneherawoe. Mi peréhnéhnia ébáhmárí miraue moraráq íre kagainae. Peh moke paentárara aruaneherawoe úwe.

*Sísaga anehe tanahráq íre kaweq sunúq sinawire  
ú ehwehne.*

*(Mátíyu 24.3-14; Máhka 13.3-13)*

<sup>7</sup> Segá Sísansabé, Íwáhnoraníno, arega irarénawe ahkake miraoneherabo? Miraonehera irataq aneq ábóraraginabo? Miraonehera irataq itega ahtebanehboq ebeqme aneq ábóraragínaq taganehnkono kasenuwe. <sup>8</sup> Kasenuwana Sísaga mahraréna, Mi tanáhráqsábé mó kené péhe éhwéhnsábé aiq pútare aritéhboq auráq matawéq tagaríáhro. Mi tanáhráq áhnte kegá mótaq mótarue néníwírué séra péhenéra, Íné Manikánka eqmaq núwéh ání múge éra, Anehe tanahráq aiq

wahtonire igehe. Mina tahnsanira ke íre kérérahro. <sup>9</sup> Mi tanáhráq mah marákó márákó ebehowe ira ehwéh ireq íre ahreoro. Íre iransánoro. Téhwe teiú náneq ebeq sínana anehe tanahráq íre apubúue sinae úwe.

<sup>10</sup> Sísaga anehe tanahráqsábé mó mahraréna, Mó kehinánseq mó kehinánseqka ebehoneherawoe. Mó wahnáhné awahrahreq mó wahnáhné awahrahreue ebehoneherawoe. <sup>11</sup> Mi tanáhráq anotah maríinae. Mitaq mahtaq ehwehráhnara áhnte ke awahreoneherawoe. Mi tanáhráq íópeqté náneqmarí tagéq anotahtaq áhreoraho naneqmarí tagagehe.

<sup>12</sup> Mi tanáhráq itensabé suwahrieh kegá ite táhtoqme íwíoqnéra momiwí nahtápéq ehweh aitera karábúsiipéq móitagéhe. Itega néne sánsá segiónsábé anotah wahnáh kéreq ákáhtaq wahnáh kéreqka ehweh aitageheéra seba móitagéhe. <sup>13</sup> Mirairataq íné éhweh terigéhe. <sup>14</sup> Mi tanáhráq, Aneq ehwéh irarenehnkono ue iwíáh kikiriyeho. <sup>15</sup> Ínéga kaweq iwíáh aitahnaq ahtebia éhwéh irarirataq itene naruoga mi ehwéhnsábé íre ahqáho aitahráhowe.

<sup>16</sup> Iteinoiboreq iteribáqmarinseq iteruwahrahreq itene iyahnabo anímárínseqka ite wahnah kebá móitehrara sega ite táhmaro iubiq iuagéhe. <sup>17</sup> Néne sánsá sehgió púara ómi kegá itensabé iuwahriehre aitagéhe. <sup>18</sup> Itene iyahqnopeqte peh morá iyáhrá íre sáúqkinae. <sup>19</sup> Néne sánsá íre susa anehe tanahráqkákáq kawerue sehgirataq oga mérapeq awaq miagéhe úwe.

*Sísaga Sarúsarama suwahpeq kekigahki aruaneherawoe ú ehwehne.*

*(Mátíyu 24.15-21; Máhka 13.14-19)*

<sup>20</sup> Sísaga anehe tanahráqsábé mó mahraréna, Ebehira kegá Sarúsarama suwahpeq abugéqnáhnuriehra tagehrataq áhníbórá mi ke aipáhrue subiq suera nahmarí kekigahki aruaneherawoe tagariagehe. <sup>21</sup> Mi tanáhráq Súría marákórápéq míéhrataq sáwéhrapeq pehbeheráh pokoro. Sarúsarama suwahpeq míéhrataq mitaq sueq móbeq pokoro. Ahpeq nogírataq Sarúsarama suwahpeq kouwekiyeho. <sup>22</sup> Mi tanáhráqmé anotah kamáh aina tanáhráre. Manikáne ehwehnka kamah ainawire ime aiq pútaraginawire. <sup>23</sup> Mi tanáhráq kía míéhra inínsónseq inahunahnínkákákáq ínínsónseqka íre pehbeheráh pokorahi puaq sensabé irutaboiroro. Manikánka mi ke anotahtaq kamah arinkéhe. <sup>24</sup> Nahnsó kegá mó ke pokatate kiraqme subiq suera mó ke meriqmera moke wáhnaupeqté ké suwahpeq móruagéhe. Nahnsó kegá Sarúsarama suwahpeq áhnte opéq wahnahnigehe. Nahnsó kegá wahnahné tanahráq parabagínaraq sega mitaq mó íre wahnahnigehe.

*Anehe íné wehukení úku anínká tuinauge ú ehwehne.*

*(Mátíyu 24.29-31; Máhka 13.24-27)*

<sup>25</sup> Sísaga mi tanáhráqsábé mó mahraréna, Mi tanáhráqmé pópoqnahwe, íomé, wehyoqmarímé ótaq sansánagínaq tagagehe. Sóreq wanínká mueq muerue sóyáh agína puara moke wehukene sirupipeq umeh agínara anotahtaq

áhreoneherawoe. <sup>26</sup> Íópeqté náneqmarínká kúrugúruínaraq wehukega, Anerirapómo éra iwíáh kikiréra anotahtaq áhreoneherawoe. <sup>27</sup> Mi tanáhráq íné íópeqté piribirioyahnkakaq téhreh naneqkákáq págegeue írábúyápipeqté tuonara tagagehe. <sup>28</sup> Teiú náneqmarí tagehrataq iriwe méq íwéh panantágínaq taganeheqmóe. Manikánka tumeirahna tanáhráq aiq wahtonire úwe.

*Sísane ehweh íre parabagia peh ahriahri kagainawire i ehwéhne.*

*(Mátíyu 24.32-35; Máhka 13.28-31)*

<sup>29</sup> Sísaga mah pabéqmé éhwéh mahraréna, Éntuankakáq mó awánkánkákáqsábé iwíáhue tagéq ahtebahro. <sup>30</sup> Awanká ánáh aunínaraq itega iwíáhéq, Ópeq áhníbórá sire aiq ahtebóne ewe. <sup>31</sup> Mina onserah teiú náneq ábóraragínaq tagéq Manikánka wahnah wahnahni tanáhráq aiq wahtotarire igehe.

<sup>32</sup> Teiníboq írátíáhro. Amahnága oga míáh kégá ómi pehipi íre pukigehe. Ebeqme moke teiú náneq ábóraragína tagéq anehe pukigehe. <sup>33</sup> Íópeqkákáq mah marákó marákóákáq parabagínana ínéga teiú éhwéhmé íre parabagia peh ahriahri kagainawire úwe.

*Sísaga, Ahriahri kawerue tagaríáhro ú ehwehne.*

<sup>34</sup> Sísaga mi tanáhráqsábé mó mahraréna, Kaweqtaq méq kawerurero. Itega abehq wání néq múguwahguiyeho. Ménsámehnsánsabe iwíáh kikiriyeho. Mirairataq ite íre iwíáhirataq mi tanáhráq apubúue sine. Kahnkapi wah paríéhnserah <sup>35</sup> mi tanáhráq moke mah marákó



márakóipéq miáh ké parianeherawoe. <sup>36</sup> Ahriahri níwénunéq kawerue auráq matíáhro. Mi tanáhráq sínaraq teiú náneqmarínká kamah ainehoéq Manikánsabe, Págege ainte séhréh ainto ue púreroro. Mirairataq íné wehukení úku aniné niuranabiahtapeq seiriwe míagehe úwe.

<sup>37</sup> Moke wéhékáh Sísaga Manikánsabe iwíáh iwíáh atáh náhtápéq síwáhnoréna tupekinaútaq mitaq suena Óríwi sawéhrápéq kigaegaeúwe.

<sup>38</sup> Ahbiahipeq áhnte kegá wene ehweh iraneheéra Manikánsabe iwíáh iwíáh atáh náhtápéq séyéuwe.

## 22

*Súrásaga wahnah keyábé, Ite meiqmena Sísaba móitané ú ehwehne.*

*(Máttyu 26.1-5,14-16; Máhka 14.1-2,10-11; Sóni 11.45-53)*

<sup>1</sup> Asiu kené sótaikú siahreraq ko tanahráq íre múi párétí no tanahráq wahtonútaq <sup>2</sup> Manikáne ehweh mibeq mahbeq arítáh kéreq Mósísine ehweh síwáhnoro kereqka sío síoéra, Sísawe árahue subiq suanéhnkono uwe. Segá mó keyábé áhreu puara ábóraq íre táhtorahráhuwe. <sup>3</sup> Sísá kéro ke airápété téhraníté míówe. Sebaté aní Súrása Ísíkáríótie. Owainawanka Súrásane arupipeq kowena iwíáh atowana <sup>4</sup> pokue Manikáne ehweh mibeq mahbeq arítáh kéreq Manikánsabe iwíáh iwíáh atáh náhtápéqté wáhnáh kéreqpa kure sensabé, Sísá owinahwinonaq subóro úwe. <sup>5</sup> Úwara iwíáh iwíáhéra móne awenéhboq miraúno uwana <sup>6</sup> Súrásaga kowe aritena wehuke íre míéhrataq se Sísaba móríte tanáhráqsábé iwíáhue kabarúwe.

*Téhtaré ánitégá táhutahuq kawerare ehwéhne.  
(Mátíyu 26.17-25; Máhka 14.12-21; Sóni 13.21-30)*

<sup>7</sup> Asiu kené sótaikú siahreraq ko tanahráq íre múi párétí né tanahráq sútaq Asiu kegá sipisípiq áráhq subiqme titiru tanahráq súwe.

<sup>8</sup> Mi tanáhráq Sísaga Pítareq Sónireqsabé, Sótaikú tanahráq ahrreraq kéh táhútáhúq nanehboq kogaweraráhtao úwara <sup>9</sup> sega wensabé, Eheq kogawerarayéhnkoyo ue kasenuyana <sup>10</sup> Sísaga sensabé, Íráhtao. Wahto kehiná suwahpeq pokue obenkisa wání antéhyánkákákáq ánínseq piehgírataq we kéanehenotao. We pokína nahtápéq kieráhtao.

<sup>11</sup> Mibeqté áboáwáh wéhyábé, Íwáhnori anínká mahraréna, Ínéreq íné séníráh kéreqka sótaikú iahreraq kéh tánáhráq táhútáhúq nanehboq mi paqnáhípeq sokigi aio ire etao. <sup>12</sup> Wega ménsámehnsá aiq kaweria anotah paqnáhípeq sokigi ínaraq mitaq itene táhutahuq kaweraráhtao éna eqmaq suowe.

<sup>13</sup> Eqmaq suowara pokue Sísaga teriunserah tagéra mitaq sótaikú tanahráq siahreraq ko tahútáhúq kaweraróye.

*Sísaga párétiakákáq sera ano ko kahpúákákáq náriu ehwéhne.*

*(Mátíyu 26.26-30; Máhka 14.22-26; 1 Kórína 11.23-25)*

<sup>14</sup> Táhutahuq tanahráq sinaútaq Sísareq we kéro kereqka táhutahuq naneheéra pokue tútuue míówe. <sup>15</sup> Sísaga sensabé, Níeraníra tanáhráq aiq wahtonire. Ebeqme mina sótaikú tanahráq iahreraq kéh táhútáhúq itereq moráráq naneheéna iwíáh iwíáhuge. <sup>16</sup> Teiníboq írátíáhro. Mah

tahutáhúq nahnaraq mah marákóipéq míó tánáhráq mó íre nanie. Manikánka wahnah wahnahnirabeq míáhnaraq mitaq nanauge úwe.

<sup>17</sup> Wega náhniáq sera anonkakaq káhpú mewena Manikánsabe, Kaweróne atena sensabé, Umah. Moranínká moranínkáue nahro. <sup>18</sup> Íné mah marákóipéq míó tánáhráq náhniáq sera ano mó íre nanie. Manikánka wahnah wahnahnirabeq míáhnaraq mitaq nanie éna <sup>19</sup> páréti mewena Manikánsabe kaweróne atena keqme náriena sensabé, Mahnawé niwaq mire. [Nehrataqmé ínénsabe iahreraq matiáhro éna ite séhréh aitanieéna pukinie úwe.

<sup>20</sup> Segá mi tahutáhúq parabagútaq Sísaga náhniáq sera ano mónkakáq mewe páréti náriunserahne siena sensabé, Mahnawé néne korahq mire. Ité séhréh aitanieéna néne korahqka tuinawire úwe.]

<sup>21</sup> Sísaga mó mahraréna, Tagahro. Néne naruo koweriranai ani itereq moráráq míéhre. <sup>22</sup> Manikánka aiq irarinserah íné wehukení úku aní pukinie. Néne naruo koweriranai anímé anotahtaq kamah awinawire úwe. <sup>23</sup> Úwara we kéro kega sío síóera, Insega mirainabo ue kasenuwe.

*Sísaga we séhréh atéhoro ú ehwehne.  
(Mátíyu 20.25-28; Máhka 10.42-45)*

<sup>24</sup> Sísá kéro kega seye ehwehéra, Ínéga ite kio-taiku aní múge éra mó anínká mó anínkáue mira íwíáhéra ehwehuwe. <sup>25</sup> Ehwehunsabe Sísaga sensabé, Mah marákóipéqté kéráq págege wahnáhno ke míáhwe. Págege wahnáhno ke méra sensuwahrahaq wahnahnéra, Ité kawerue séhréh

aitáh wáhnáhne ewe. <sup>26</sup> Itega mina tahnsa íre oro. Ite míáhrabeqte ání anotah anímé iteríbáq tahnsa míáhno. Wahnah aní míanie íwíáhina anímé arambehri aní méq we séhréh atehoro.

<sup>27</sup> Tútuue táhutahuri anímé anotah aníne íwíáhowe. Wene arambehri aní wene táhutahuq kaweraréh anímé pehgáriq aníne íwíáhowe. Íné iteba míó anímé arambehri aní tahnsanéna séhréh aita aitaue.

<sup>28</sup> Níwíoqnah tanáhráq itega íné íre nuwasa ínéba mía míaconsabé <sup>29</sup> Nániboga ínénsabe wahnahnúno aintéhserah ínéga itensabé moq wahnahnoro aitóge. <sup>30</sup> Ínéga wahnah wahnahnonarabeq itega mitaq tútuue méq táhutahurigehe. Ísara kahnáh airápété téhtaré míáhwe. Itega wahnah kené tahberaq tútuue méq mi kahnáhné ehweh iwíáhue tagéq tábúsoq sitagéhe úwe.

*Sísaga Pítansabé, Íné nuwaniewóne ú ehwehne.*

*(Mátíyu 26.31-35; Máhka 14.27-31; Sóni 13.36-38)*

<sup>31</sup> Sísaga Pítansabé mahraréna, Sáímónio, Sáímónio, írátíahno. Owainawanka iwíáhéna, Ahrreronká námúq sibinsibinonserahnue ite abehq náneq tahnsá úkigeheéna íwíoqnanie ire.\*

<sup>32</sup> Amahnága arega ínénsabe aiq pútare ainte néne sánsá ambubu atiahne. Néne sánsá súéhneho éna arensabé púreratóge. Arene ahbabáq sue íné séraníe íwíáhinaraqmé arereq morá árámbehri ké séhréh arito úwe.

---

\* **22:31:** Kárikí ehwéhmé íre námúqtaq pabeqme peh wítiraq pabeqme ehwéh mirarire.

<sup>33</sup> Úwana Pítaga Sísansabé, Néne Wahnahno, are kérénsabé karábúsiipéq móintaneherabomo nubiq suaneherabomo. Anetaníbo. Kéraníe úwe.

<sup>34</sup> Úwana Sísaga wensabé, Teawiníboq írátíahno. Iborá kokórega ehwehnina ínaraq arega íné íre tagaríóge apahtáróráq irariniewóne úwe.

*Sísaga we kéro keyabé, Poka paiqmáráhro ú ehwehne.*

<sup>35</sup> Sísaga sensabé, Mónewe, unahmé, súwe meyého ue eqmaq íúwátáutaq ite aneq tabonahuroo kasenúwara sega wensabé, Írakaumo uwana <sup>36</sup> wega sensabé, Amahnága móneakáq unahnkákáq matíéh rataqmé mína mewe nogóro. Poka íre matíéh rataq sáhkétiraté móne mewe q mi monératé poka paiqmaráhro. <sup>37</sup> Aneqsabé teiugo? Manikáne ehwehnka aiq mahraréna, Wereq ahbabáq kereq morábí sáharitagéhe ire. (*Ai-saia 53.12*)

Teiníboq írátíahro. Segá íné mirairansabé mi ehwéhnká aiq pútaraginawire úwara <sup>38</sup> we kéro kega wensabé, Itene Wahnahno, tagáhno. Ite téhtaré pókánkákáq míone uwana wega sensabé, Mína aiq awehrare úwe.

*Sísaga Óríwi sawéhrápéqté mátábúrápéq kobúrerú ehwehne.*

(*Mátíyu 26.36-46; Máhka 14.32-42*)

<sup>39</sup> Sísaga mitaq suena Óríwi sawéhrápéq poku pokuúnserahnue pokúwara we kéro kega kérowe. <sup>40</sup> Sísaga mitaq kéna sensabé, Ahbabáq aitehnehboq púreroro éna <sup>41</sup> se suena wahtotaq móbeq pokéna marakóraq káuqmunue ména púrerúwe. <sup>42</sup> Púrerue mahraréna, Nániboo,

are awahbáhnaraqmé nirupipeq umehi naneq menuahráhone. Íre íné nuwahbeh sansá peh are awahbáhna sansánúno ue púrerúwe.

<sup>43</sup> [Púrerúwana íópeqté ánínká weba tuena págege atowe. <sup>44</sup> Págege atowana wene arupipeq áhnte umehúwana mónkakáq págegeue púrerúwe. Págegeue púrerú púana áhnte munsínsínká tuwe. Munsinsínka korahq tahnsánue marakóipeq tabagúwe.] <sup>45</sup> Púrerúrabeqte irigue we kéro ke koragówara sirupipeq umehúnsabe sugówe. <sup>46</sup> Wega sensabé, Aneqsabé sugaho? Owainawanka ahbabáq aitehnehboq iriwe púreroro úwara áhnte wehuké weba suwe.

*Súrásaga Sísane naruo koweriro ehwéhne.*

*(Mátíyu 26.47-56; Máhka 14.43-50; Sóni 18.3-11)*

<sup>47</sup> Sísaga ehwehnútaq we kéro aní Súrásareq áhnte mó kereq weba suwe. Súrásaga ebeq séna weba wahtotaq sewéna we nánkóqnanaútaq <sup>48</sup> Sísaga wensabé, Súrásao, íné wehukení úku aní mónuwanieé nánkóqnanibo úwe.

<sup>49</sup> Su kegá Sísá táhtoraneherautaq we kéro kega tagéra wensabé, Itene Wahnahno, pokatate api-aranéhnkono uwe. <sup>50</sup> Uwana peh morá kéro anínká wene pokatate Manikáne ehweh mibeq mahbeq arítéh áníné arambehri aní apiwe wene púpeqte áhré kiraq auwowe. <sup>51</sup> Ahre kiraq auwowana Sísaga sensabé, Aiq míre. Túbáh agoro éna kiraq auwo aníné ahre táhtoqme kaweratowe.

<sup>52</sup> Manikáne ehweh mibeq mahbeq arítáh kéreq Manikánsabe iwíáh íwíáh atáh náhtápéqté wáhnáh kéreq Sarúsarama suwahpeqte ábóáwáh wéhreqka táhtoranehera utaq wega sensabé,

Aneqsabé aebó ání táhtoráhnserah pokankakaq sahnkákáq íné meniraneheéq seo? <sup>53</sup> Mó wehekáh mó wehekáhnue Manikánsabe iwíáh íwíáh atáh náhtápéq íteba míarautaq ítega íné íre táhtotiarowe. Amahnága iteitene tánáhrárirana sunkíkírirabeqte sánsánká aiq kiotaikire úwe.

*Pítaga, Íné Sísá íre tagaríoge ú ehwehne.*

*(Mátíyu 26.69-75; Máhka 14.66-72; Sóni 18.25-27)*

<sup>54</sup> Segá Sísá táhtoqme meqmera kure se mótaq we mótarue Pítaga sinehe kaqme kure sega Manikáne ehweh mibeq mahbeq arítáh kéné wahnahne nahtapeq kuwe. <sup>55</sup> Mi matábúráq ira parewe tútuue míowana Pítaga mitaq kowéna tútuue míowe. <sup>56</sup> Tútuue míowana ira kawerue téhrówana mibeqté árámbéhrí áhrárigá Píta ebitáwéna mahraréna, Mah anímé Sísaba mía míai aníne úwana <sup>57</sup> Pítaga ahqáho éna wensabé, We íre tagaríoge úwe. <sup>58</sup> Úwana mótaq tahnsa mó wehgá Píta tagéna wensabé, Are moq mi kahnáh ání móne úwana Pítaga, Íné Írakaumo úwe.

<sup>59</sup> Anehe mó wehgá págegeue mahraréna, Mah aní Kehrari marákórápéqté ání púana wereq mía míai aní míre úwana <sup>60</sup> Pítaga wensabé, Arega irarénawe íné íre tagaríoge úwe. Pítaga mi ehwéh irarútaq kokórega ehwehnúwana <sup>61</sup> Sísaga pabeqme Píta tagówe. Tagówana Sísane ehweh ahrreraq matawéna iwíáhúwe. Mi ehwéhnúme, Kokórega ehwehnina ínaraq arega íné íre tagaríoge apahtáróráq irariniewóne únsabe Pítaga iwíáhéna <sup>62</sup> kéirigue móbeq pokéna anotahtaq ibisówe.

*Sega Sísá áwíoqno ehwéhne.*

*(Mátíyu 26.67-68; Máhka 14.65)*

<sup>63</sup> Sísa auráq matió kega wensabé awiréh atera subiqmarówe. <sup>64</sup> Segá ambantataté wene aura akariue táhrarera we subiqmarera kasenára, In-sega subiq marehro? Teio uwe. <sup>65</sup> Teio éra sega wensabé áhnte íre kaweq ehwéhnatówe.

*Wahnah kegá aboawah weh míórabeq Sísa ehweh ató ehwehne.*

*(Mátíyu 26.59-66; Máhka 14.55-64; Sóni 18.19-24)*

<sup>66</sup> Ahbiahipaq Asiu kené aboawah wehwárínseq Manikáne ehweh mibeq mahbeq aritáh kéreq Mósísine ehweh síwáhnoro kereqka momiwíuríówara Sísa meqmera mi kaunsírí kébá móátówe.

<sup>67</sup> Móátówara sega wensabé, Manikánka ite meirena kaweraitankeheéna peh morá ání omaq atowe. Arewe mi anípo? Pahsuqme teio uwana Sísga sensabé, Ínéga teiénaraqmé itega íre aiq pútare aintaneheqmóe. <sup>68</sup> Ínéga itensabé kasenonaraqmé íre tenieneheqmóe. <sup>69</sup> Wahtotaq tanáhráq íné wehukení úku anínká Maniká Iteribone ayah púpeq tútuue mía míainauge úwe.

<sup>70</sup> Úwara sega wensabé, Are Manikáne ahninkáwábo kasenuwana wega sensabé, Itega aiq irarewe. Íné werahu mino úwara <sup>71</sup> seye náhenéra, Iteitega wene ehweh aiq ironayabé mó kegá kasenáyabe anetaníbo uwe.

## 23

*Páhirátiga wahnahnútaq sega Sísansabé ehweh ató ehwehne.*

*(Mátíyu 27.1-2,11-14; Máhka 15.1-5; Sóni 18.28-38)*



<sup>1</sup> Minayabe Sísansabé ehweh ató kega we meqmera Páhírátiba kure <sup>2</sup> mitaq mó ehwéh atera mahraréra, Iteruwahrah moke íre kaweraruanieéna péhe éhwéh síwáhnorire. Wega, Aroma kené wahnah aní Sísáhri táhkísi moné íre náwéro aitáraire. Wega, Íné Asiu ke kaweraranieéna su aní múge uraire. Íné anotah Wahnáh aní múge uraire ue ehweh atówe.

<sup>3</sup> Ehweh atówana Páhírátiga Sísansabé, Arewe Asiu kené wahnahpo kasenúwana wega wensabé, Arega aiq iraréne úwana <sup>4</sup> Páhírátiga Manikáne ehweh mibeq mahbeq aritáh kéreq momiwíurío kereqsabé, Mah aniné ahbabáq íre ahteboqe úwe.

<sup>5</sup> Úwara sega págegeue mahraréra, Mi anínká síwáhnoréna pagu paguninsabé wene ehweh íráh kégá ahbabárorahi iwíáhowe. Téhwe Kehrari marákórápéq síwáhnoréna moke Súría marákórápéq síwáhnoréna amahnága mahtaq síwáhnorire uwe.

*Sega Érótiga wahnahnútaq Sísansabé ehweh ató ehwehne.*

<sup>6</sup> Páhírátiga mi ehwéh irena sensabé, Mah aní Kehrari marákórápéqté ánipo kasenúwara, <sup>7</sup> Ee. We mibeqté ánine teawúwe. Páhírátiga mi ehwéh irena, Érótiwe mibeqté wáhnáhne iwíáhéna mi tanáhráq we moq Sarúsarama suwahpeq míonsabe Sísareq we ehweh ató kereq Érótiba eqmaq suowe.

<sup>8</sup> Érótiga Sísá éhweh mó tanáhráq mó tanáhrárué irena, Wega ótaq sansá miraína tagéyabe níre iwíáhéna íre wahto tanáhráq Sísá tagéyabe awahbéna sega Sísá meqmera sutaq wene

arupipeq anotahtaq eyoyóúwe. <sup>9</sup> Wega Sísa áhntetaq kasenúwana íre ehwehnia peh ehiya míowe.

<sup>10</sup> Manikáne ehweh mibeq mahbeq arítáh kéreq Mósísine ehweh síwáhnoro kereqka mitaq iriwe méra Sísansabé págegeue ehweh atówe. <sup>11</sup> Érótireq wene sóntía kereqka Sísansabé awiréh atera abehq éhwéh atówe. Segá kaweq karósí Sísa suki atera eqmarówara Sísa meqmera Páhírátiba kouwekuwe.

<sup>12</sup> Nahomé Érótireq Páhírátireqka seye abiahnsa aruqaruruye. Anehemé mi wehékáh insahwé ue míoye.

*Páhírátiga, Sísa awankátaq táhparáhro ú ehwehne.  
(Mátíyu 27.15-26; Máhka 15.6-15; Sóni 18.38-19.16)*

<sup>13</sup> Páhírátiga Manikáne ehweh mibeq mahbeq arítáh kéreq mibeqté aboawah wehwárinseq míó kereqsabé, Íráhro éna <sup>14</sup> sensabé, Ínéba méátáh ánínsabé ehweh ateq mahraréq, Wega péhe éhwéh síwáhnorire ewe. Itega irare atáh éhwéhnsabé ite míáhtáq kasenéna we íre ahbabáq anine íwíáhuge.

<sup>15</sup> Érótiga moq wene ahbabáqsabe kasenué tagéna ahbabáq íre kéhre íwíáhire. Mah anímé itega we subiq suahráhúna ahbabáq íre kéhre. <sup>16</sup> Minayabe áréti sahtaté subóro aritena anehe pugeq iníe úwe.

<sup>17</sup> [Asiu kené sótaikú siahreraq ko tánáhráq Páhírátiga mó opéq mó opérue karábúsiipéqté peh morá aní pugeq suaq pugeq suarúwe.]

<sup>18</sup> Páhírátiga Sísa pugeqiníe úwara ómi míó kega ehweh kikiréra, Ahqáho. Sísa subiq sue Párehba pugeqio uwe. <sup>19</sup> Párehbareq Aroma kereq ebe-hutaq wega mó aní subiq suonsabe Aroma kegá

we karábúsiipéq móátówe. <sup>20</sup> Páhirátiga, Sísa pugeq auwanuage íwíáhéna míó keyabé, Párehba íre pugeqinié. Sísa pugeqinié úwara <sup>21</sup> sega anotah ehwéhnabaéra, Ahqáho. Awankátaq táhpawe subiq suo. Awankátaq táhpawe subiq suo uwana

<sup>22</sup> Páhirátiga sensabé anehe mó kasenéna, Aneqsabébo? We aneq ahababáiro? We subiq suahráhúna ahabábáq íre kéhre. Íre kéh púaq áréti sahtaté subóro aritena anehe pugeq iníe úwe.

<sup>23</sup> Úwara sega mi ehwéhnsábé anotahtaq ahqáho atera anotah ehwéhnéra, Awankátaq táhpawe subiq suo uwe. Sene ehwehnka Páhirátine ehweh kiotaikúwe. <sup>24</sup> Minayabe Páhirátiga sensabé, Itega irarenserah mirainie úwe.

<sup>25</sup> Aroma kereq ebehú anínká mó aní subiq suonsabe sóntía kegá karábúsiipéq móátó aní pugeq auwowe. Pugeq auwena Sísa awankátaq táhpawe subiq suo irare kegá sene iwíáh sansa miraigeheéna sóntía kebá móatowe.

*Sísa awankátaq níriraté táhparó ehwehne.*

*(Mátíyu 27.32-44; Máhka 15.21-32; Sóni 19.17-27)*

<sup>26</sup> Sóntía kegá Sísa meqmera pokuwana ahtapeq piehgiú ani, Sáiríni marákórápéqté aní wenáwíq Sáimóni, sure Sarúsarama suwahpeq pokinaúwe. Pokinaúwara sega we saiqnatera Sísa táhparéhra awánká we abaq atera, Sísa kéro atówe.

<sup>27</sup> Áhnte kegá sinehe kure mibeqté ínínsónká Sísansabé arutaboiráera ibisowe. <sup>28</sup> Minayabe Sísaga pabeqme sensabé, Ínénsabe íre ibisahro. Itereq itene anímárinseqsabé ibisahro. <sup>29</sup> Mókake Sarúsarama suwahpeqte ké kamah ariéna tanáhráq sega mahraréra, Orahinínsómé, inahunahni

íre maqmiáh íninsómé, náh íre nárié íninsómé, sega iwíáh íwíáhigehe irarigehe. <sup>30</sup> Mi tanáhráq, Mi kegá anotah sawéhwárínkákáq pehgáriq sawéhwárínkákáqsábé, Ite apubúue pukonehboq me mewe ite akariúno igehe. *(Hosea 10.8)*

<sup>31</sup> Íné o awánká tahnsa míahnara sega íné miraonehera onsabé mókakewe ite ehyatia awánká tahnsa míéhra puara mó kegá aneq miraoneherabo úwe.

<sup>32</sup> Sóntía kegá ahbabáq anité Sísareq subiq suaneheéra meriqmera kuwe. <sup>33</sup> Sega sáwéh áwíq Ayahqno Tánúnsutapéq kíútaq mitaq Sísá awankátaq níriraté wene ayahnkaratáq subiqmaq aigárátáq subiqmarue táhparera awanká pankeqme marakóipeq pearówe. Ahbabáq anité moq awankátareráq níri pewe táhparera pankeqme ayehré ayehré pearówe. <sup>34</sup> Pearówana Sísaga púrerue mahraréna, Nániboo, mah kegá mirao naneq sega íre ahtebahwe. Minayabe mi ahbabáqsábé íre iwíáhúno úwe.

Sóntía kegá, Wene korósi insega meyanabomo éra saraqmianeheéra káhsiue saraqme meyówe.

<sup>35</sup> Mitaq momiwíu kegá iriwe awahnkanuwara Asiu kené wahnahmarínká Sísansabé awiréh atera mahraréra, Wegá mó ke kawerarítáráire. We wehuke merirena Manikáne arambhiri mirainkeheéna omaq atéh ánínínaraqmé wewe moq kawerarahíhire uwe.

<sup>36</sup> Sóntía kegá moq awiréh atera weba séra kítah nahniáq sérá ano pankeqme awera, Náhno éra <sup>37</sup> arewe aiq pútaq Asiu kené Wahnah anínínaraqmé arerene anonka kawerúno uwe.

<sup>38</sup> Kanehraq sehiranúwara wene ayahqno abobóráhpeq awankátaq táhparówe. Mi sehiránká mahraréna,

Mah anímé Asiu kené Wahnahne úwe.

<sup>39</sup> Awankátaq táhparó ahabábáq ánínká moq Sísansabé awiréh atena, Arewé Manikánka omaq ato anípo? We inaraqmé arere séhréhé ite moq séhréh aito úwe.

<sup>40</sup> Séhréh aito úwana mó ahabábáq ánínká ebeq irarú aninsabé ehweh atena, Arewé Manikánsabe íre áhreonó? Segá ite awankátaq táhpawe subiq súáhro aítáhwe. <sup>41</sup> Arereq ínereqme ahabábáq anité púara iubówe. Mi anímé we íre ahabábáq aninirarawe pehipi subiq súáhwe éna <sup>42</sup> Sísansabé, Sísao, arega wahnahninagake ínénsabe ahrreraq mati-ahno úwe. <sup>43</sup> Úwana Sísaga wensabé, Teawiníboq írátíahno. Iboramé Manikáne kaweq matábúrápéq ínereq míankehe úwe.

### *Sísa pukú ehwehne.*

*(Mátíyu 27.45-56; Máhka 15.33-41; Sóni 19.28-30)*

<sup>44</sup> Wéhékáhnabubu moke mah marákó marákó sunkíkíragúwana íó tunsorerutaqkákáq peh sunkíkíratíowana <sup>45</sup> pópoqnah mi tanáhráq íre téhrówe. Manikánsabe iwíáh iwíáh atáh náhtápéqté páráhnekéq tahnsa ónsá senahpeqté subame tunse téhtaré úkúwe.

<sup>46</sup> Sísaga anotahtaq mahraréna, Nániboo, néniwa arene ayahpi máróge éna putiowe.

<sup>47</sup> Putiowana sóntía kené kíápéténiga tagéna Manikánsabe iwíáh iwíáh atena mahraréna, Mah anímé íre ahabábária peh kaweqtaq míéh áníne úwe.

<sup>48</sup> Úwara mitaq taganeheéra awahnkanu kegá we putio tagéra sene sirupipeq umeh agúwara mitaq suera sene nahtapeq abae aguwe.

<sup>49</sup> Moke Sísane iyahnaboreq Kehrari marákórápéqté we kéro ininsónseqka moberue iriwe méra moke minawari tagowe.

*Sísane anonka maisé onápípeq maisaró ehwehne.  
(Mátíyu 27.57-61; Máhka 15.42-47; Sóni 19.38-42)*

<sup>50</sup> Súría marákórápéq Árímatéa suwahpeqte wéh wenáwíq Sósépa míowe. We aboawah wehéna kaweqtaq mía míaúwe. <sup>51</sup> Mó abóawáh wéhwárínká, Sísá subiq suo atótaq wega íre kowe aritowe. Manikánka wahnah wahnahni tanáhráq áwénunue taga tagaúwe.

<sup>52</sup> Wega Páhírátiba kure wensabé, Sísane anonka mewena mómaisaranínkono úwana kowe atowana <sup>53</sup> Sóséparehga Sísane anonka kiwewe marakóraq márumarera íre wahto taberábe ambántáípeq úbíqme mewera ubusa onápípeq mómaisarówe. Mitaq mó aní íre maisia peh o oná kowe. <sup>54</sup> Táhutahuq kaweré tanáhráq pehnkinaútaq Asiu kené ahrena ahrena wehekáh sinaútaq maisarówe.

<sup>55</sup> Kehrari marákórápéqté Sísareq su inínsónká Sósépareh kérirera mi oná tagéra Sísá mitaq maisaró tagowe. <sup>56</sup> Tagéra mitaq suera se káúrabeq kure kaweq kunkúni naneqkakáq wériakáq kawerarówe. Mósísine ehwehnka irarúnserah sega ahrena ahrena wehekáh túbáh aguwe.

## 24

*(Mátíyu 28.1-10; Máhka 16.1-8; Sóni 20.1-10)*

1 Ahrena ahrena wehekáh parabagúwara ahbiahipeq íó kiembogútaq mi inínsónká kaweq kunkúni naneq mewera Sísa maisarórabeq pokuwe. 2 Wahtotaq kutaq óna méhpeh paiqmáro ebáh móbeq kowara tagéra 3 ónapipéq kibekue tagowana sene Wahnah Sípane anonka íre kowara tagowe. 4 Tagéra sirupipeq iwíáh kikiruwara anotah tehró ambántánkákáq ánité ábóraragéra mitaq iriwe míóyara tagowe.

5 Tagéra mi inínsónká anotah ahréera marakóipeq káuqmunuríówara ábóraraguya anitégá sensabé, Pusa aní matorabeqme aneqsabé oga míéh ánínsabé kabaroo? 6 We irigi puana mahtaq íre míéhre. We Kehrari marákórápéq míaraitaq teiátái ehwéh iwíáhue tagahro. 7 Wega mitaq ména mahraréna, Sega íné wehukení úku aní ahbabáq keba móintehrara awankátaq táhpawe nubiq suehrana apahtáróráq iriwe oganúq intankéhe uraire uye.

8 Uyara mi inínsónká wene ehweh siahreraq matawéra 9 maisarórabeqte kouwekue airápété morá we kéro kereq mó kereqsabé moke koreríúwe. 10 Mi inínsómé, apahq ínitó síwíqmé Sóánawe, Mágára suwahpeqte íní wenáwíq Máhríawe, mó Máhría we Sémísine anowae. Sereq mó inínsónseqka mi ehwéh eqmaro ke teríúwara 11 sega iwíáhéra, Mi inínsónká irare ehwéhmé peh múguwahgu ehwéhne éra íre aiq pútare arítówe.

12 [Pítaqa mi ehwéh irena pehbeheráh maisarórabeq pokue káuqmunue mitaq tagówana peh maisaró ambántámáí mitaq kowana tagéna kaurabeq kouwekue wene arupipeq iwíáh kikirue

tagówe.]

*Sísa kéroya ánitégá ahtapeq Sísa tagoya ehwéhne.  
(Máhka 16.12-13)*

<sup>13</sup> Mi inínsónká maisaróabeq pokuro wehekáhmé mó weh anitégá Sarúsarama suwahpeq suera íre wahtotaq 11kírómíta Éméása suwahpeq koyehe éra <sup>14</sup> Sísa pukú ehwehnsábé iwíáhéra iraruye. <sup>15</sup> Mi anitégá ahtapeq nogera ehweh iraruyataq Sísa sinehe kure moráráq nogúwe. <sup>16</sup> Sega we tagéra sirupipeq Sísa wire iwíáh íre orahuye.

<sup>17</sup> Íre orahuyana wega sensabé, Aneq ehwéh mirareyo úwara sega mitaq kowéra sirupipeq umehúnsabe abiah máróye. <sup>18</sup> Mó morá ání wenáwíq Kíópaga Sísansabé, Mah tanáhráq áhnte kegá Sarúsarama suwahpeq sure míahnah arebataq mirauro naneq íre ahtebahno kasenúwana <sup>19</sup> Sísa sensabé, Aneq mirauro naneqpo úwe.

Úwara sega wensabé, Sísa Néhsara suwahpeqte aní éhwehne éra we Manikáne ehweh irarurai aní ména págege sansánéna págegeue iwáhnorurai puaq Manikánseq ite Asiu kereqka págege aní míre ataráúne. <sup>20</sup> Iteribo iteruwah wehwárinseq Manikáne ehweh mibeq mahbeq arítáh kéreqka subiq súáhro arito urowara awankátaq táhpawe subiq sutowe. <sup>21</sup> Íre subiq sutotaq itega iwíáhéq, Wegá ite Ísara ke kaweraitankéhe iwíáhuraune. Subiq sutotaqté ibora apahsoq kire. <sup>22</sup> Iteruwahrah inínsónká miraonsabé áhtenéwone. Sega ahbiahipaq we maisatorabeq koragéra, <sup>23</sup> Wene anonka mitaq íre kéhre ewe. Sega iteba kouweéwótaq mahraréra, Maisatotaq



iteiyuwanka tagehtaq íopeqté ánité tagóne. Mi anitégá itensabé, We aiq oga míéhre teieye ewe. <sup>24</sup> Minayabe mó iteruwahrah kegá koragéra mi inínsónká irarenserah tagéra pusa ániné anonka íre tagahwe uye.

<sup>25</sup> Mi anitégá mi ehwéh teawúyana Sísaga sensabé, Itewe múguwahgu iwíáhóye. Manikáne ehweh iraru kegá teié éhwéhnsábé íre apubúue aiq pútare aritoye. <sup>26</sup> Manikáne ehweh iraru kegá mahraréra, Wehuke merirena kaweraritankeheéna Manikánka omaq ato aní ebeq anotah érue pukéna anehemé téhráhnarabeq kinkéhe uwe. Minayabe ite íre ahtebehyo? Íre ahtebehyo éna Manikáne púkuipéqté éhwéh síwáhnorúwe. <sup>27</sup> We pukú ehwehnsábé Mósísiga sehgióro ú ehwehnikákáq Manikáne ehweh iraru kegá sehiranu ehwehnikákáq ebeq síwáhnoréna anehe moke mó pukúipéqté éhwéh síwáhnorue teriuwe.

<sup>28</sup> Mi anitégá pokoyeherauya ke suwahpeq wahtotaq kuyataq Sísaga mi anité suena móbeq pokinaútaq <sup>29</sup> sega we saiqnatera wensabé, Penkinainsabé itereq kaenéhe. Itereq kaenéhe uyana wega kowe éna nahtapeq kérirowe. <sup>30</sup> Sega táhutahuroneheéra moráráq tútuue míówe. Sísaga páréti mewena Manikánsabe kaweróne atena páréti keqme náriuwe. <sup>31</sup> Náriuwará sega, We Sísá wire iwíáhhuyana Sísawe tabanagúwe. <sup>32</sup> Tabanagúwará seye náhenéra, Itega ahtapeq súnaraq wega Manikáne ehweh teiena íwáhnoritaq itene irupipeq áhnte eyóyóéwéhre uye.

<sup>33</sup> Segá apubúue irigue Sarúsarama suwahpeq

kouwekéra airápété morá we kéro kereq momiwíuríó kereq tagoyara <sup>34</sup> sega mi anítéyábé, Itene Wahnah aiq pútaq iriwe oganúkire. Oganúkirana Sáímóniga aiq tagehre uwe. <sup>35</sup> Ai q tagehre uwara mi anítégá ahtapeq kutaq irarú ehweh teríúye. Teríéra, Páréti keqme náriutaq itega, Sísa wire úye teríúye.

*Sísaga ábóraragúwara we kéro kega we tago ehwéhne.*

*(Mátíyu 28.16-20; Máhka 16.14-18; Sóni 20.19-23)*

<sup>36</sup> We kéro kega mi ehwéhnsábé ehwehnutaq Sísaga seba ákáhpi seiriwe ména [sensabé, Pehwehribeq miáhro úwara] <sup>37</sup> sega anotah ahréera, We wahnsa wire íwíáhuwana <sup>38</sup> wega sensabé, Aneqsabé áhreoo? Irupipeqmé aneqsabé iwíáh kikiroo? <sup>39</sup> Íné wire ahtebagehboq niyahnkarankákáq nigáránkákáq tagahro. Wahnsawé íre anonkankakáq ayahnsankakáq áníne. <sup>40</sup> [Íné wire ahtebagehboq íné sosanoro éna wene ayahnkarankákáq aigáránkákáq sokigi ariuwe.] <sup>41</sup> Sokigi ariuwara áhtenéra iwíáh íwíáhéra Sísa oga míonsabe íre aiq pútare atahráhuwana wega sensabé, Táhutahuq mahtaq kehro úwara <sup>42</sup> sega tira páh áwúwana <sup>43</sup> mewena sega tagotaq nówe.

*Manikáne Awanka iteba tuinkéhe ú ehwehne.*

<sup>44</sup> Sísaga we kéro keyabé, Mósísine ehwehnikakáq Manikáne ehweh iraru kegá sehiranu ehwéhnikákáq púkuipéqté ígónkónkákáq íné éhwehme aiq pútaraginawire. Menah iteba mía míaurataq mína teiátáuge úwe. <sup>45</sup> Teiátáuge éna Manikáne ehweh kawerue irageheéna ahtebé

iwiáh aritena <sup>46</sup> sensabé, Manikáne ehwehka mahraréna,

Manikánka wehuke merirena kawerinieéna omaq  
ato anímé ebeq anotahtaq érué pukínana  
apahtáróráq iriwe oganúq atankéhe ire úwe.

<sup>47</sup> Sísaga mó mahraréna, Wene púkuga mó mahraréna,

Wenáwirue Manikánka kawerarítéh éhwéh ebeq  
Sarúsarama suwahpeq koreriera anehe mah  
kehiná kéhíná korerigéhe. Mi ehwéh irera  
sene ahbabáq súáh kéwé Manikánka kawer-  
aritankéhe ire úwe.

<sup>48</sup> Sísaga mó mahraréna, Mi sehiránká aiq  
pútaragínaq tagagehe. <sup>49</sup> Manikánka itensabé,

Néniwa eqmaraníe uraire. Ínéga kieqmarahnana  
iteba tuínkéhe. Mahtaq iteruwahpeq méq  
áwénunoro. Wega iteba tuena págege aitankéhe  
úwe.

*Manikánka Sísaga íópeq tumero ehwehne.*

*(Máhka 16.19-20; Eqmaro 1.9-12)*

<sup>50</sup> Sísaga we kéro ke meriqmena Sarúsarama  
suwahpeq suena wahtotaq Pétáni suwahpeq  
kiuwe. Mitaq kowéna wene ayahnkara  
pankeqme Manikánsabe, Mah ke kawerarito  
úwe. <sup>51</sup> Kawerarito éna se suowana Manikánka  
we íópeq tumerowe. <sup>52</sup> [Íópipeq móatowara

tago kegá Sísansabé sirehunseraráq méra iwiáh  
íwiáh atera] sirupipeq anotahtaq eyoyóúwara  
Sarúsarama suwahpeq kouwekuwe. <sup>53</sup> Kouwekéra  
Manikánsabe iwiáh íwiáh atáh náhtápéq kibekéra  
mitaq Manikánsabe iwiáh íwiáh ata atauwe.

**Manikáne O Ehwehne**  
**God's New Talk: The New Testament in the Awa**  
**Language of Papua New Guinea**  
**Nupela Testamen long tokples Awa long Niugini**

copyright © 1974, 1997 Wycliffe Bible Translators, Inc.

© Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 21 Feb 2024 from source files dated 31 Aug 2023

9673cf68-887a-574e-9ac8-846469c86b12